



W. Dole

Sculpt.

Joannis Miltoni Effigies
Ætat. 63. 1674.



W. Dole

Sculptor

Joannis Miltoni Effigies
Ætat. 63. 1671.

70 ANNIS MILTONI

Angli,

Artis Logicæ

Plenior Institutio,

AD

PETRI RAMI

Methodum concinnata,

Adjecta est Praxis Annalytica &
Petri Rami vita; Libris duobus.

LONDINI,

Impensis S. H. Prostant pro R. Boulter
ad Insigne Capitis *Turce* exadversum
Mercatorio Regali in Vico vulgò
Cornhill dicto, 1673.

JOHN MILTON

Aug.

Artis Logice

Principia Institutionis

AD

PETER A. M. I.

Methodus Institutionis

Adiecta est Praxis Institutionis
Praxis Institutionis Institutionis

LIBRARIUS

London: J. B. Johnson & Co. R. F. Johnson
at the Old Currier's Yard, 1733
Metropolitan Library, 1733
Cambridge, 1733.



PRÆFATIO.



Uanquam Philosopho-
rum multi, suopte in-
genio freti, contemp-
sisse artem Logicam
dicuntur, eorum ta-
men qui vel sibi, vel
aliis propter ingenium
aut iudicium natura
minus acre ac perspicax utilissimam
esse sibiq; diligenter excolendam ju-
dicarunt, optime est de ea meritus, ut ego
quidem cum *Sidneo* nostro sentio, *Petrus*
Ramus. Cæteri fere Physica, Ethica,
Theologica Logicis, effrænata quadam li-
centia, confundunt. Sed Noster dum bre-
vitatem sectatus est nimis religiose, non pla-
ne luci, sed ubertati tamen lucis, quæ in
tradenda arte, non parca, sed plena & co-

P R Æ F A T I O.

pioſa eſſe debet, videtur deſuiſſe : id quod
tot in eum ſcripta commentaria teſtantur.
Satiuſ itaq; ſum arbitratus, quæ ad præ-
cepta artis plenius intelligenda, ex ipſius
Rami ſcholis Dialecticis aliorumq; com-
mentariis neceſſario petenda ſunt, ea in ip-
ſum corpus artis, niſi ſicubi diſſentio,
transferre atq; intexere. Quid enim bre-
vitate conſequimur, ſi lux aliunde eſt pe-
tenda? Præſtat una opera, uno ſimul in
loco artem longiuſculam cum luce conjun-
gere, quam minore cum luce breviffimam
aliunde illuſtrare; cum hoc non minore
negotio multoq; minus commode hæcenus
fiat, quam ſi ars ipſa ut nunc ſuapte copia
ſeſe explicaverit. Quam artis tradendæ
rationem uberioſiorem ipſe etiam *Ramus* in
Arithmetica & Geometria aliquanto poſt a
ſe editis, edoctuſ jam Longiore uſu, ſe-
cutuſ eſt; ſuaſq; ipſe regulas interjecto
commentariolo explanavit, non aliis expla-
nandas reliquit. Quorum cum pleriq; neſ-
cio an nimio commentandi ſtudio elati,
certi omniſ methodi quod in iis mirum ſit,
obliti, omnia permisceant, poſtrema pri-
mis, axiomata Syllogiſmos eorumq; regu-
las primis quibuſq; ſimplicium argumento-
rum

P R Æ F A T I O.

rum capitibus ingerere soleant, unde caliginem potius discentibus offundi quam lucem ullam præferri necesse est, id mihi cavendum imprimis duxi ut nequid præriperem, nequid præpostere quasi traditum jam & intellectum, nequid nisi suo loco attingerem; nihil veritus, ne cui forte strictior in explicandis præceptis existimer, dum per pendenda magis quam percurrentia proponere studebam. Nec tamen iis facile assenserim, qui paucitatem regularum obijciunt *Rampo*, quarum permultæ etiam ex *Aristotile* ab aliis collectæ, nedum quæ ab ipsis cumulo sunt adjectæ, vel incertæ vel futiles, discentem impediunt atque onerant potius quam adjuvant: ac si quid habent utilitatis aut salis, id ejusmodi est, ut suoapte ingenio quivis facilius percipiat, quam tot canonibus memoriæ mandatis, addiscat. Multoq; minus constitui, canones quidvis potius quam Logicos, a Theologis infercire; quos illi, quasi subornatos in suum usum, tanquam e media Logica petitos, depromant de Deo, divinisq; hypostasibus & sacramentis: quorum ratione, quo modo est ab ipsis informata, nihil est a Logica, adeoq; ab ipsa ratione, alienius.

P R Æ F A T I O.

Prius autem quam opus ipsum aggredior, quoniam ars Logica omnium prima est suisq; finibus latissime patet, præmittam quædam de arte generalia, deq; artium distributione; artem deinde ipsam persequar: ad extremum, Analytica quædam exempla, sive usum artis, exercitationis causa, iis quibus opus est, & in eo genere exercere se libet, exhibebo: Quibus opus est inquam; quibus enim ingenium per se viget atq; pollet, iis ut in hoc genere Analytico cum labore nimio ac miseria se torqueant, non sum author. Ad id enim ars adhibetur, ut naturam juvet, non ut impediat: adhibita nimis anxie nimisq; subtiliter, & præsertim ubi opus non est, ingenium per se jam satis acutum, obtundit potius quam acuit; ita plane ut in medicina remediorum usus vel nimius vel non necessarius, valetudinem debilitat potius quam roborat. Quod autem *Aristotelis* aliorumq; veterum auctoritatem ad singulas fere Logicæ regulas adjungimus, id quidem in tradenda arte supervacuum fuisset, nisi novitatis suspicio, quæ *Petro Ramo* hæcenus potissimum obfuit, adductis ipsis veterum authorum testimoniis, esset amolenda.

Artium

PRÆFATIO.

Artium omnium quasi corpus & comprehensio ἐγκυκλοπαιδεία Græce, i. e. eruditionis circuitus quidam in se redeuntis, adeoq; in se absolutæ atq; perfectæ, vel Philosophia dicitur. Hæc cum sapientiæ studium proprie significat, tum vulgo artium omnium vel doctrinam, vel scientiam: doctrinam, cum præcepta artium tradit; scientiam, cum ars, quæ habitus est quidam mentis, præceptis illis percipitur, quasiq; possidetur. Eodem modo & artis significatio distinguitur: cum doctrinam significat, de qua nobis potissimum hic est agendum, est ordinata præceptorum exemplorumq; comprehensio sive methodus, qua quidvis utile docetur.

Artis materia præcepta sunt: quæ qualia esse debeant, artis Logicæ, quam nunc tradimus, proprium est suo loco præscribere.

Forma sive ipsa ratio artis, non tam est præceptorum illorum methodica dispositio, quam utilis alicujus rei præceptio: per id enim quod docet potius, quam per ordinem docendi, ars est id quod est: quod

P R Æ F A T I O.

ex cuiusq; artis definitione perspicitur, ut infra ostendetur.

Præceptorum artis tria genera sunt : duo præcipua *definitiones & distributiones* ; quarum doctrinam generalem Logica etiam loco idoneo sibi vendicat ; tertium , minus principale , *confectarium* nominatur ; estq; proprietatis alicujus explicatio, ex definitione fere deducta.

Exempla sunt quibus præceptionum veritas demonstratur , ususq; ostenditur : suntq; , ut scite *Plato*, quasi obsides sermonum : quod enim præcepto in genere docetur , id exemplo in specie confirmatur.

Efficiens artis primarius neminem reor dubitare quin sit Deus, author omnis sapientiae : id olim Philosophos etiam non fugit.

Causæ ministræ fuerunt homines divinitus edocti, ingenioq; præstantes ; qui olim singulas artes invenerunt. Inveniendi autem ratio eadem prope fuit quæ pingendi :
ut

P R Æ F A T I O.

ut enim in pictura duo sunt, exemplum si-
ve archetypus, & ars pingendi, sic in arte
invenienda, archetypo respondet natura
sive usus, & exemplum hominum perito-
rum, arti pictoris respondet Logica; sal-
tem naturalis, quæ facultas ipsa rationis in
mente hominis est; juxta illud vulgo dict-
um, Ars imitatur naturam.

Ratio autem sive Logica, primum illa
naturalis, deinde artificiosa, quatuor ad-
hibuit sibi quasi adjutores, teste *Aristot.*
Metaphys. 1. c. 1, sensum, observatio-
nem, inductionem, & experientiam. Cum
enim præcepta artium generalia sint, ea
nisi ex singularibus, singularia nisi sensu
percipi non possunt: sensus sine observati-
one, quæ exempla singula memoriæ com-
mittat, observatio sine inductione, quæ
singularia quam plurima inducendo gene-
ralem aliquam regulam constituat, inductio
sine experientia, quæ singulorum omnium
convenientiam in commune & quasi con-
sensum judicet, nihil juvat. Hinc recte
Polus apud *Platonem* in *Gorgia*, experien-
tia artem peperit, imperitia fortunam, i. e.
præcepta fortuita, adeoq; incerta. Et
Aristot.

PRÆFATIO.

'Aristot. Prior. 1. c. 30. cujusq; rei principia tradere, experientia est: sic Astrologica experientia, illius scientia principia suppeditavit. Et Manilius;

*Per varios usus artem experientia fecit,
exemplo monstrante viam ----.*

Et Cicero; omnia quæ sunt conclusa nunc artibus, dispersa quondam & dissipata fuerunt, donec adhibita hæc ars est, quæ res dissolutas divulsasq; conglutinaret & ratione quadam constringeret. Ea ars Logica est, vel hæc saltem naturalis, quam ingenitam habemus, vel illa artificiosa, quam mox tradimus: hæc enim præcepta artis invenit ac docet. Hactenus de efficientibus causis artium.

Forma artis, ut supra dixi, non tam præceptorum dispositio est, quam præceptio ipsa rei alicujus utilis, eademq; est finis. Quemadmodum enim non tam præceptorum Logicorum methodica dispositio quam ipsum bene differere, & forma Logicæ & finis est, ut infra docebitur, ita in genere non solum præceptorum dispositio,

P R Æ F A T I O.

fitio, sed ipsa rei utilis præceptio, forma artis & simul finis est : quod autem præcipitur, id esse utile in hominum vita debere, quod *Græci*, *βιωφελές* vocant, omnes consentiunt ; indignamq; esse artis nomine, quæ non bonum aliquod sive utile ad vitam hominum, quod idem quoq; honestum sit, sibi proponat, ad quod omnia præcepta artis referantur ; adeoq; formam artis esse rei alicujus utilis præceptionem, per quam scilicet ars est id quod est, necessario sequitur. Verum ad hunc finem perveniri non potest, nisi doctrinam natura commode percipiat, exercitatio confirmet, utraq; simul doctrina & exercitatio artem quasi alteram naturam reddant. Sed ingenium sine arte, quam ars sine ingenio plus proficere censetur : proficere autem non admodum utrumq; , nisi accesserit exercitatio : unde illud *Ovidii* :

solus & artificem qui facit, usus erit.

Exercitatio duplex est ; analysis & genesis. Illa est, cum exempla artis in sua principia quasi resolvuntur, dum singulis partibus ad normam, i. e. ad præcepta artis.

P R Æ F A T I O.

artis examinantur: hæc, cum ex artis præscripto efficimus aliquid aut componimus.

Haftenus causæ artium : sequuntur species. Artes sunt generales vel speciales : generales, quarum materia subjecta est generalis. Materia autem illa vel artificis est, vel artis. Artificis materia generalis generalibus cunctis artibus est communis ; artis autem, singularum est propria : estq; artificis quidem generalis materia, omne id quod revera est, aut esse fingitur ; artis, quod in eo omni efficiunt singulæ. Id omne vel ratio complectitur, vel oratio : generalium itaq; artium materia generalis, vel ratio est, vel oratio : versantur enim in excolenda vel ratione ad bene ratiocinandum, ut Logica ; vel oratione, eaq; vel ad bene loquendum, ut Grammatica, vel ad dicendum bene, ut Rhetorica. Omnium autem prima ac generalissima, Logica est ; dein Grammatica, tum demum Rhetorica, quatenus rationis usus sine oratione etiam magnus, hujus sine illa potest esse nullus. Grammaticæ autem secundum tribuimus locum,

P R Æ F A T I O.

eo quod oratio pura esse etiam in ornata ;
ornata esse nisi pura sit prius , facile non
queat.

Artes speciales sunt, quæ materiam hã-
bent specialem ; nempe naturam fere vel
mores ; earum enim acuratio distributio
non est hujus loci.

ERRA-

1871

of the
...

...

1871

TYPOGRAPHI ERRATA.

Página 6. Cap. 3. l. 14. post sunt inferre veras. p. 9. l. 14.
 post dicitur inferendum vel. p. 10. l. 3. ha'ent leg. habet.
 p. 11. l. 2. leg. efficientia. p. 12. l. 33. quæ leg. quas. p. 15.
 l. 20. quam lege quanquam. p. 18. l. 7. convenientit us lege
 convenientius. p. 20. cap. 8. l. 2. post Phil. 1. 3. inferendum
 quarta causa. p. 21. l. 20. quâ leg. qui. p. 23. cap. 9. existet
 leg. existit. p. 24. l. 31. quilibet leg. quilibet. p. 26. l. 2.
 appendicu'a lege appendicula. p. 28. l. 13. tractandum lege
 tractandam. p. 30. l. 18. rerum lege verum. p. 30. l. 26. post
 adjunctum inferendum subjecto. p. 31. l. 24. Loilam leg. Zoilum.
 l. 26. Zoile. p. 33. l. 16. refertus, lege refertur. p. 35.
 l. 2. unitis lege unitatis. p. 36. l. 18. quæ lege quoq;. p. 46.
 l. 27. post id inferendum ne. l. 28. reponat lege teponas. l. 32.
 opposita lege oppositæ. p. 48. l. 17. Tu lege cum. p. 56. l. 13.
 huic lege hunc. p. 58. l. 4. post differentia inferendum formæ
 primitus est. l. 9. dele forma primitus est. p. 60. l. 4. distin-
 guntur, lege distinguitur. p. 62. l. 22. hi lege si. p. 73. l. 19.
 post Agr. lege quæ. p. 81. cap. 22. l. 9. post attribua. ut inte-
 rendum Itaq; de verisiorum uno negato, alterum affirmatur; dis-
 simila siue diversa siue opposita simul affirmari aut negari pos-
 sunt. l. 8. capitis 22. idem lege eidem. p. 92. l. 23. proinus
 lege protinus. p. 107. cap. 30; l. 10. circumscri et lege cir-
 cumscribit. p. 129. l. 2. dele (;) post non; p. 130. l. 22. ex
 lege est. p. 135. l. 33. necessarium lege necessariam. p. 138. l.
 34. distincta lege distincta. p. 150. l. 20. mutabiles lege immu-
 tabiles. l. 7. disjuncta lege disjunctæ. p. 165. l. 5. Ut lege &.
 p. 170. l. 29. ergo quidam divitos, lege ergo quidam dicti sum
 divites. p. 173. l. 15. explicatum. lege explicatam. p. 177. l.
 31. post magnanimus, inferre Maximus est. p. 182. l. 29. mo-
 dis lege modi. p. 190. l. 3. affirmata & composita, lege affir-
 matæ & compositæ. p. 191. l. 17. non si est animal, idcirco est
 homo, lege non si non est animal, idcirco non est homo. p. 192.
 l. 16. connexa lege connexæ. p. 198. l. 22. disjuncta lege dis-
 junctæ. p. 212. l. 28. tamq; lege tamenq; p. 219. l. 5. instru-
 mentales lege instrumentalis. p. 221. l. 20. multas lege mul-
 tos. p. 223. l. 15. talibus lege tabulis.

JOANNIS

THE OREGONIAN
PUBLISHED WEEKLY
BY THE OREGONIAN PUBLISHING CO.
101 N. BROADWAY
PORTLAND, OREGON
Subscription price, \$5.00 per annum in advance.
Single copies, 10 cents.
Entered as second-class matter, June 15, 1902.
Postage paid at Portland, Oregon.
Acceptance for mailing at special rate of postage provided for in Act of October 3, 1917.
Copyright, 1918, by The Oregonian Publishing Co.
Printed and Published by The Oregonian Publishing Co., Portland, Oregon.



J. MILTONI Angli,

Artis Logicæ

Plenior Institutio, &c.

Liber Primus.

CAPUT. I.

quid sit Logica?



Logica est ars bene ration-
cinandi. Eodèmq; sensu
Dialectica sæpe dicta est.

Logica autem, *i. e.* ars
rationalis, α λόγῳ dici-
tur: quæ vox Græcè
rationem significat; quam
excolendam Logica sibi
sumit.

Ratiocinari autem est rationis uti facultate Ad-
ditur bene, *i. e.* rectè, scienter, expedite; ad
perfectionem artis ab imperfectione facultatis na-
turalis distinguendam.

Logicam potius, quàm cum *P. Ramo* Dialecti-
cam, dicendam duxi, quòd eo nomine tota ars
rationis aptissimè significetur; cùm Dialectica à

B

verbo

verbo Græco *διαλέξαι*, artem potius interrogandi & respondendi, i. e. disputandi significet; ut ex *Platonis Cratylō*, ex doctrina *Peripateticorum* & *Stoicorum*, *Fabio*, *Suida*, aliisq; docetur. Et tamen *Plato* in *Alcibiade* primo idem vult esse τὸ *διαλέξαι*, quod ratione uti. Prior significatio ad rationis usum nimis angusta est; posterior, si inter authores de ea non convenit, nimis incerta.

Ratiocinandi autem potius dico quàm differendi, propterea quòd ratiocinari, non minus late quàm ipsa ratio, idem valet propriè quod ratione uti; cùm differere, præterquam quod vox non planè propria, sed translata sit, non latius plerumq; pateat, quam disputare.

Addunt nonnulli in definitione subjectum *Dialecticæ*, i. e. de re qualibet: sed hoc cum *Grammatica* & *Rhetorica* commune *Dialecticæ* fuit, ut in procemio vidimus; non ergo hîc repetendum.

C A P. II.

De partibus Logicæ,

Deq; Argumenti Generibus.

Ratiocinatio autem fit omnis, rationibus vel solis & per se consideratis, vel inter se dispositis; quæ argumenta etiam sæpius dicta sunt.

Logicæ itaq; partes duæ sunt ; rationum five argumentorum inventio, eorumq; dispositio.

Secutus veteres *Ramus*, *Aristotelem*, *Ciceronem*, *Fabium*, Dialecticam partitur in inventionem & iudicium. Verùm non inventio, quæ nimis lata est quocunq; modo sumatur, sed argumentorum inventio, pars prima Logicæ dicenda est : dispositio autem eorum, cur sit secunda, non iudicium, secundi libri initio respondebimus. Sed neq; hæc partitio suis auctoribus vel iisdem vel aliis caret : *Plato*, in *phædro*, dispositionem inventioni addidit ; *Aristoteles* τῷ 8. i. quod idem est. Et *Cicero*, de *Orat.* fatetur, inventionem & dispositionem, non orationis esse, sed rationis.

Inventionem autem & dispositionem quarum tandem rerum nisi argumentorum.

Argumentorum itaq; inventio *Topica* Græcè nominatur ; quia τῶπος, continet, i. e. locos unde argumenta sumuntur, viamq; docet & rationem argumenta bene inveniendi, suo nimirum ordine collocata ; unde vel ad genefim, expromantur, vel in analysi explorentur, inventorumq; simul vim atque usum exponit.

Argumentum est quod ad aliquid arguendum affectum est, Id est, quod habet affectionem ad arguendum ; vel ut *Cic.* in *Top.* quod affectum est ad id de quo quæritur : id interpretatur *Boethius* refertur, vel, aliqua relatione respicit id de quo quæritur.

Ista

Ista affectione sublatâ, argumentum non est ; mutata, non est idem ; sed ipsum quoq; mutatur.

Ad arguendum autem, i. e. ostendendum; explicandum, probandum aliquid. Sic juxta illud tritum, *degeneres animos timor arguit, Aeneid. 4. & illud Ovidii ; Apparet virtus, arguiturq; malis.* Explicare autem & probare etiam simplicis argumenti propria atq; primaria vis est, unde aliud ex alio sequi, vel non sequi, i. e. uno posito, alterum poni vel non poni primitus judicatur : quod de inductione quidem recte monuit Baconus noster, de Augment. scient. l. 3. c. 4. uno eodemq; mentis opere, illud quod queritur, & inveniri & judicari: sed hoc de singulis argumentis simplicibus non minus verum est.

Ex quo etiam sequitur, judicium non esse alteram Logicæ partem, sed quasi effectum utriusq; partis communem & ex utraq; oriundum ; Ex syllogismo in re presertim dubia clarius quidem at secundario tamen contra ac pleriq; docent.

Aliquid autem, est id quodcunq; arguitur : quicquid enim est, aut esse fingitur, subjectum est Logicæ, ut supra demonstravimus. Argumentum autem propriè neq; vox est neq; res ; sed affectio quædam rei ad arguendum ; quæ ratio dici potest ut supra.

Tractat igitur Logica neq; voces, neq; res. Voces quidem, quamquam & sine vocibus potest ratiocinari, tamen, quoties opus est, distinctas & tantum non ambiguas, non improprias, ab ipso usu loquendi videtur jure sanè postulare : res ip-

fas artib. quasq; suis relinquit; arguendi duntaxat inter se quam habeant affectionem sive rationem considerat.

Ratio autem dicitur, voce à Mathematicis petita, qua terminorum proportionalium inter se certa habitudo significatur.

Argumentum est artificiale aut inartificiale. Sic Aristot. Rhet. 1. 12. quem Fabius sequitur, l. 5. c. 1. Cicero in insitum & assumptum dividit. Artificiale autem dicitur, non quo inveniatur arte magis quàm inartificiale, sed quòd ex sese arguit, i. e. vi insita ac propria.

Artificiale est primum, vel à primo ortum. Primum, quod est suæ originis. Id est, affectionem arguendi non modò in se habet, sed etiam à se; quod infrà clarius patebit, cùm quid sit à primo ortum docebitur.

Primum est simplex aut comparatum.

Simplex, quod simpliciter & absolutè consideratur. Id est, simplicem habet affectionem arguendi id quod arguitur, sine quantitatis aut qualitatis cum eo comparatione.

Simplex est consentaneum aut dissentaneum.

Nam quæ sine comparatione considerantur, necesse est vel consentient inter se, vel dissentiant.

Consentaneum est quod consentit cum re quam arguit. Id est, ponit, sive affirmat esse rem quam arguit.

Estq; consentaneum absolutè aut modo quodam. Absolutè, i. e. perfectè; absolvere enim est perficere. Aristotelis quoq; hæc distributio est. Quæ autem absolutè consentiunt, eorum alterum alterius vi existere intelligitur; & sic consentiunt causa & effectus. Atq; hæ sunt argumentorum distributiones generales ex affectionum differen-

tiis desumptæ; suôq; nunc ordine singulatim tractandæ: argumentorum autem omnium primum *causa* est; id quod per se quivis intelligere potest.

C A P. III.

De Efficiente, procreante, & conservante.

C*Ausa est, cujus vi res est.* Vel, si ex capite superiore, quod intelligi memoriâq; teneri potest, repetito est opus, causa est argumentum artificiale, primum, simplex, absolute consentaneum, cujus vi, vel facultate, res, i. e. effectum, arguitur esse vel existere. Nec male definiatur *causa quæ dat esse rei.*

Cujus autem vi vel facultate, i. e. à quo, ex quo, per quod, vel propter quod res est, id causa esse dicitur. *Res* etiam, idem quod *aliquid* in definitione argumenti, vox generalis adhibetur, quæ significaret causam, sicut & reliqua argumenta, esse rerum omnium quæ vel sunt, vel finguntur: nam quæ revera sunt; quæ finguntur, fictas causas habent.

Hinc intelligitur *causam sine qua non*, quæ vulgò dicitur, improprie causam, & quasi fortuito, dici, ut cùm amissio rei alicujus dicitur causa recuperationis; quamvis amissio recuperationem necessario præcedat. Neq; enim causa sic intelligi debet, id quod & *Cicero* docuit, l. de Fato, ut quod cuiq; antecedit, id ei causa sit, sed quod cuiq;

cuiq; efficienter antecedit; i. e. ita ut res vi eius existat. Hinc causa propriè dicta, *principium* quoq; nominatur à *Cic.* I. de Nat. deor; sed frequentius apud Græcos.

Causa autem est cuius vi res non solum est, verum etiam fuit, vel erit. Ut enim præcepta Logica de omni re, sic omnium præcepta artium de omni tempore intelligenda sunt; unde & æterna esse, veritatisq; æternæ dicuntur.

Ex definitione autem causæ tertium illud artis præceptum, de quo in præfatione diximus, confectarium hoc oritur: *primus hic locus inventionis, fons est omnis scientiæ; sciriq; demum creditur cuius causa teneatur.*

Neq; aliud est *Aristotelis* decantata illa demonstratio, quàm qua effectum arguitur, probatur, cognoscitur, ponitur, ex causa posita; quodcumq; illud demum causæ genus sit: ut cum risibile probatur ex rationali, quippe, omnis homo est risibilis, quia rationalis: eoque erit clarior demonstratio, quo causa certior, propior, præstantior.

Causa est efficiens & materia, aut forma & finis. Cur sic causa dividatur quasi in duo genera anonyma, infra in doctrina distributionis facilius intelligetur.

Quot autem modis alicujus vi res est, tot esse species causæ statuendum est. Modis autem quatuor alicujus vi res est; ut rectè *Aristot. Phys.* 2.7. & nos suprà diximus; vel enim à quo, vel ex quo, vel per quod, vel propter quod res una quæq; est, ejus vi esse rectè dicitur. His modis nec plures inveniuntur, nec pauciores esse possunt: rectè igitur causa distribuitur in causam à qua, ex qua, per quam, & propter quam, i. e. efficientem &

materiam, aut formam & finem.

Efficiens est causa, à qua res est, vel efficitur.
Ab efficiente enim principium movendi est; ipsa tamen effecto non inest.

Ciceroni omnis causa efficiens nominatur: sic enim in Topicis; primus est locus rerum efficientium, quæ cause appellantur: & de Fato; causa est quæ id efficit, cujus est causa. Hinc fit ut causatum, à causis licet omnib. ortum habens, effectum tantummodo vocitetur: unde hoc solum intelligitur, efficientem esse causam præcipuam atq; primariam; omnem autem causam aliquo modo efficere.

Efficientis etsi, vera genera nulla sive species nobis apparent, ubertas tamen permagna modis quibusdam distinguitur.

Primò, quòd procreet, aut tueatur.

Sic pater & mater procreant; nutrix tueatur. Huc quoq; omnium rerum inventores, auctores, conditores, conservatores referendi sunt. Procreare igitur & tueri duo sunt modi quibus idem sæpe efficiens efficere solet: procreando quidem id quod nondum est, ut sit; conservando autem id quod jam est, ut porrò sit.

CAP. IV.

De Efficiente sola, & cum aliis.

Secundò, causa efficiens sola efficit, aut cum aliis. Earumq; omnium sæpe alia principalis, alia minus principalis, sive adjuvans & ministra. Quam Cicero, in Partit. causam consicientem vocat:

cat : & cuius, inquit, generis vis varia est, & sæpe aut major aut minor ; ut & illa quæ maximam vim habet, sola sæpe causa dicatur. Hinc, *Æneid.* 9. *Nysus* ab *Enriale* socio transfert in se factæ cædis & culpam & pœnam ; quasi solus auctor fuerit, quia fuit præcipuus. Et solitaria causa cum plerisq; & principalibus & sociis, pro *Marcello*, variè adhibetur. Sed hæc duo exempla vide post finem in praxi analytica.

Causa minus principalis (ut quidam volunt) vel est impulsiva, quæ principalem quoquo modo impellit ac movet, vel est instrumentalis.

Impulsiva duplex est Græcisq; vocibus receptis, *proegumena* dicitur, *procatartica*. Illa intus, hæc extrinsecus movet principalem : & vera si est, *occafio*, si ficta, *prætextus* dicitur.

Sic causa proeg. quæ intus movebat infideles ad persequendum Christianos (exemplis enim receptis hîc utemur) erat eorum ignorantia aut impietas, causa procat. erant nocturni conventus, vel potius quæ vis conventicula Christianorum. Olim interficiendi Christi causa proeg. erat Judæorum zelus ignarus : procat. objecta sabbathi violatio concionesq; seditiosæ. Notandum autem est ubi causa proegumena, sive interna, non est, ibi causa procatarticæ, sive externæ, vim nullam esse.

Ad causam autem procatarticam, ea sæpe referenda videtur, si omnino est in causis numeranda, quæ suprâ dicta est *causa sine qua non* ; siquidem quovis modo causam extrinsecus movere principalem dici potest.

Instrumenta etiam in causis adjuvantibus connumerantur. Quo argumento *Epicureus*, apud *Cic.* I. de nat. deor. disputat mundum nunquam esse factum, hoc etiam exemplum ad praxin retulimus.

mus. Instrumenta autem propriè non agunt, sed aguntur aut adjuvant. Et qui causam adjuvantem nullam nisi instrumenta habent, potest rectè *solitaria causa* dici: quanquam lata admodum instrumenti significatio admittitur; ut apud *Aristot. Polit. l. 3. instrumenta sunt animata, vel inanimata*. Quo sensu omnes ferè causæ adjuvantes & ministræ possunt *instrumentales* nominari.

Ad hunc locum referendus commodissimè videtur causarum ordo, quo alia dicitur *prima*, idq; vel absolutè, ut Deus, vel in suo genere; ut sol, & ejusmodi quippiam; alia *secunda*; & sic deinceps, quæ à prima vel à prioribus pendet, & quasi effectum est. Alia deinde *remota* dicitur, alia *proxima*: quò spectat illud vulgo dictum; *quicquid est causa causæ, est etiam causa causati*. Quæ regula in causis duntaxat necessariò inter se ordinatis valet. Sed hæ causarum divisiones in Logica non magnopere sectandæ sunt; quandoquidem tota vis arguendi in causa proxima continetur; deq; ea sola generalis definitio causæ intelligitur.

C A P. V.

De Efficiente per se, & per accidens.

Tertio, *causa efficiens per se efficit, aut per accidens*. Tertium hoc par modorum efficiendi est, ab *Aristotele* etiam & veteribus notatum.

Per se efficit causa, quæ sua facultate efficit. Id est, quæ ab interno principio effectum producit.

Ut

Ut quæ natura vel consilio faciunt. Naturalis efficiens est elementorum, fossilium, plantarum, animalium. Consilii exemplum est illa Ciceronis de se ad Cæsarem confessio: nulla vi coactus, iudicio meo ac voluntate, ad ea arma profectus sum, quæ erant sumpta contra te.

Naturæ, appetitum; consilio, artem nonnulli adjungunt. Sed appetitus aut naturalem, aut ad naturam, aut ad naturæ vitium; ars ad consilium sine incommodo referetur: ars n. & consilium quatenus aliquid efficiunt, non illa ab intellectu, hoc à voluntate; sed ut utrumq; ab utroq; proficisci videtur: etenim ars ferè non invita, non proximæ saltem invita; & concilium prudens sciensq; agit. Hi quatuor modi efficiendi per se, ad eundem nonnunquam effectum concurrunt: ut cùm quis loquitur, naturâ; hoc vel illud, consilio simul & appetitu; eleganter, arte.

Videtur itaq; huc proprie referenda etiam causa impulsiva, sive ea proegumena, sive procatactica sit, de quibus capite superiore diximus; quæ non tam causæ sunt principali sociæ aut ministræ quam modi efficientis, quibus vel affectu aliquo impulsus, vel ex occasione aliqua oblata, consilio adductus hoc vel illud agit, ut ex allatis ibi exemplis intelligi potest.

Quæ autem naturâ necessariò, quæ consilio, libere agunt, necessariò agit quæ aliter agere non potest, sed ad unum quidpiam agendum determinatur, idq; solum sua propensione agit quæ necessitas naturæ dicitur; ex hypothesi nimirum. Nisi Deus aliud voluerit, aut externa vis aliorsum impulerit, ut Lapidem sursum. Libere agit efficiens non hoc duntaxat ut naturale agens, sed hoc vel illud pro arbitrio idq; absolute vel ex hypothesi.

pothesi. Absolute solus Deus libere agit omnia; id est quicquid vult; & agere potest vel non agere; Testantur hoc passim sacræ literæ: Libere ex hypothesi, illæ duntaxat causæ quæ ratione & consilio faciunt, ut angeli & homines; ex hypothesi nimirum divinæ voluntatis, quæ iis Libere agendi potestatem in principio fecit. Libertas enim potestas est agendi vel non agendi hoc vel illud. Nempe nisi Deus aliud voluerit, aut vis aliunde ingruat.

Per accidens efficit causa, quæ externa facultate efficit. Id est, non sua; cum principium effecti est extra efficientem, externumq; principium interno oppositum: sic .n. efficiens non efficit per se, sed per aliud. Hinc vere dicitur, omne effectum causæ per accidens potest reduci ad causam per se.

Ut in his quæ fiunt coactione, vel fortuna. Duo .n. hæc sunt externa principia internis, naturæ nempe & voluntati sive consilio, opposita. Sic Aristot. Rhet. 2. 20. cum dixisset, homines facere quædam non per se, quædam per se; subiungit, eorum quæ non per se, alia per fortunam, alia ex necessitate. Sed necessitas vox nimis lata est, ut ex supra dictis de efficiente naturali patebit.

Coactione fit aliquid, cum efficiens vi cogitur ad effectum. Ut cum lapis sursum vel recta projicitur qui suapte natura deorsum fertur. Hæc necessitas coactionis dicitur & causis etiam liberis nonnunquam accidere potest. Sic necesse est mercatori in tempestate merces ejicere, siquidem salvus esse vult. Hæc itaq; necessitas mixtas quasdam actiones produxit, quæ facit quis volens nolente animo, quod aiunt.

Fortuna

Fortuna sive fortuito fit aliquid, cum præter scopum efficientis accidit. Non enim fortuna, sed efficiens, quæ per fortunam sive fortuito agit, est propriè causa per accidens rerum fortuitarum: eò quòd earum principium, occulta nimirum illa causa quam fortunam dicimus, extra illam efficientem est: fortuna autem est eventuum eorum principium, etsi occultum, non per accidens tamen, sed per se. Fortuna itaq; apud veteres aut nomen sine re esse existimabatur, quo usi sunt homines, teste alicubi Hippocrate, cum secundarias contingentium causas ignorarent, aut est ipsa latens causa: ut Cicero in Top. cum enim nihil sine causa fiat, hoc ipsum est fortuna, eventus obscura causa, quæ latenter efficit. Inter fortunam & casum hæc volunt interesse Aristot. Phys. 2. 6. Et Plutarch. de Placit. & de, Fato, ut casus quàm fortuna latius pateat: fortuna in iis duntaxat qui ratione utuntur; casus in omnibus tam animantibus quàm inanimatis dominetur: sed loquendi ferè usus fortunæ sub nomine casum etiam complectitur, quotiescunq; præter scopum sive finem efficientis aliquid accidit. Sic casu fortuito, ait Tullius, 3. de nat. deor. Phæro Jasoni profuit hostis, qui gladio vomerem ejus aperuit, quam medici sanare non poterant.

In hoc genere causarum imprudentia connumerari solet Sic etiam Aristot. Ethic. 3. 1. videnter non voluntaria esse, quæ per vim aut ignorantiam fiunt. Et Ovid. 2. Trist.

*Cur aliquid vidi? cur noxia lumina feci?
Cur imprudenti cognita culpa mihi est?
Inscius Actæon vidit sine veste Dianam:
Præda suis canibus nec nimis ille fuit.*

Scilicet

*Scilicet in superis etiam fortuna luenda est :
Nec veniam, læso numine, casus habet.*

Durum id esse queritur poeta : nam cæteroqui hinc sumitur plerumque deprecatio ; & excusationi etiam nonnunquam locus hîc est. Deprecationis exemplum est apud Cic. pro Ligario : ignosce pater : erravit ; lapsus est : non putavit : Et paulò post ; erravi : temerè feci : pœnitet ; ad clementiam tuam confugio.

Fortunæ autem nomen, ut suprâ dictum est, ignoratio causarum confinxit : cùm enim aliquid præter consilium spemq; contigerit, fortuna vulgò dicitur. Unde Cicero, apud Lactantium, Instit. 3. 29. ignoratio rerum atque causarum fortune nomen induxit. Nec in-scite Juvenalis :

*Nullum numen abest, si sit prudentia : sed te
Nos facimus, fortuna, deam ; cælòq; locamus.*

Certè enim & cœlo locanda est ; sed, mutato nomine, divina providentia dicenda. Unde Arist. Phys. 2. 4. sunt nonnulli quibus fortuna quidem videtur esse causa, sed ignota humanæ intelligentiæ, tanquam divinum quiddam. Et Cic. Acad. I. providentiam Dei quæ ad homines pertinet, nonnunquam, quidem fortunam appellant, quod efficiat multa improvisa nec opinata nobis propter obscuritatem ignoracionemq; causarum. Sed providentia rerum omnium prima causa est, five notæ five ignotæ sint earum causæ secundariæ : & providentiæ si necessitatem adjungas, fatum dici solet. Verùm de providentia meliùs Theologia quàm Logica disceptabit. Hoc tantùm obiter ; fatum five decretum Dei cogere neminem malefacere ;

& ex hypothesi divinæ præscientiæ certa quidem esse omnia, non necessaria. Non excusandus itaque Cicero, pro Ligario, cum ait, fatalis quedam calamitas incidisse videtur & improvidas hominum mentes occupavisse; ut nemo mirari debeat humana consilia divina necessitate esse superata. Multo rectius alibi, datur quidem venia necessitati; sed necessitati, quæ instituto efficientis repugnat, & voluntati.

CAP. VI.

De Materia.

Materia est causa ex qua res est. Efficientem ordine naturæ sequitur materia; & efficientis effectum quoddam est; præparat enim efficiens materiam, ut sit apta ad recipiendam formam. Ut autem efficiens est id quod primum movet, ita id materia quod primum movetur, hinc efficiens, agendi; materia, patiendi principium appellatur. Hæc autem definitio materiæ apud omnes eadem ferè occurrit. Est causa: materiæ enim vi affectum est. Illa autem vis particula ex qua significatur: quam hæc vulgò non materiæ solum nota est, sed nunc efficientis, ut, ex ictu vulnus: nunc partium, ut, homo constat ex anima & corpore; nunc mutationis cujusvis, ut, ex candido fit niger. Res: nempe quam arguit; effectum scilicet materiatum; ut intelligamus materiam etiam esse omnium entium & non entium communem; non rerum sensibilium & corporearum propriam: Quales autem res ipsæ sunt, talis

talis materia earum esse debet ; sensibilibus sensibilis, æternarum æterna ; & ita in reliquis. Sic artium materia sunt præcepta. *Est. i. e. efficitur & constat : unde Cic. I. Acad. materia ea causa est, quæ se efficienti præbet, ut ex sese non modo effectum fiat, sed etiam postquam effectum est, constet.* Hoc argumento ficto, apud *Ovid. 2. Metam. solis domus auro, pyropo, ebore, argento componitur. Regia solis erat &c.* Sic *Cæsar I. Bell. civil. navium materiam describit : carinæ primum ac statumina ex levi materia fiebant &c.*

Dividitur vulgo materia in primam & secundam ; secunda in proximam & remotam. Verum hæc distributio Physica potius est. Id enim solum Logicus in materia spectat, ut res ex ea sit ; & potissimum quidem ut proximè ex ea sit ; proxima enim potissimum arguit.

C A P. VII.

De Forma.

CAuse primum genus ejusmodi est in efficiente & materia : secundum sequitur in forma & fine. Quia scilicet ordine temporis est posterius. Efficiens enim & materia sub genere priore continentur, quòd in effecto producendo præcedunt ; forma & finis sub, posteriore, quòd efficientem & materiam sequuntur effectumq; ipsum comitantur : positis enim efficiente, & materiâ, non continuo sequuntur forma & finis : efficiens enim etsi materia suppetit, forma tamen & fine suo nunquam frustratur ; forma & finis si adsit, necesse

cesse est efficientem & materiam fuisse. Qui autem in usu observatur ordo causarum, idem debet in doctrina quoq; observari. Nec tamen ordo iste ad constituenda causarum genera satis valet, sed aliud quiddam quod nomine caret. Unde meritò non satis accurata videtur illa causarum distributio, quæ affertur *Aristotilis*, in causas vel effectum præcedentes, ut efficientem & materiam; vel cum effecto simul existentes, ut formam & finem: tam etsi enim hæc distributio ordinem causarum servat, naturam tamen earum non distinguit; immo causæ neq; convenit, neq; propria est: non convenit, quia causa quælibet, ut causa, non præcedit, sed cum effecto simul est. Præcedunt autem utcunq; efficiens & materia effectum vel naturæ ordine, vel temporis: si naturæ, id & cum reliquis causis & cum subjectis omnibus commune habent; si temporis, hoc efficienti & materiæ neq; omni commune est (quædam enim cum effecto non nisi simul sunt) neq; solis iis proprium; nam & subjecta pleraq; adjunctis suis tempore priora sunt. Nec scèlicius ab eodem *Aristotele* dividuntur causæ in externas, efficientem & finem; & internas, materiam & formam: hæc enim distributio etsi usus ejus aliquis esse potest, ad leges tamen artis minus accommodata est: esse enim externum vel internum, non est causis proprium, sed effecto etiam & adjuncto commune. Deinde materia & forma cùm intra effectum sunt, non tam causæ quàm partes effecti sunt: quid? quòd finis, quæ perfectio rei est aptitudòq; ad usum, interna potius causa diceretur. Postremò, hæc distributio turbat ordinem causarum, methodi proinde legem: efficiens enim est principium motus &

cau-

causarum prima; finis, ultima est: si igitur internum externo præmittitur, materia & forma, quæ efficientis quodammodo effecta sunt, efficienti præponentur; si externum interno, finis efficienti, i. e. ultima primæ, adjungetur; mediis, materiæ neme & formæ, præmitteretur. Cautius itaq; *Ramus* atq; arti convenientibus, causarum genera anonyma reliquit: quod ut ostenderemus, longiuscule cum venia digressi, nunc ad alterum genus causarum, formam & finem, redeamus. Formæ autem est prior locus concedendus, cum finis nihil aliud sit quam fructus quidam formæ.

Forma est causa per quam res est id quod est. Hæc definitis *Platonicam* & *Aristotelicam* conjunxit: ille enim definit formam esse causam per quam, hic, quod quid est esse. Ut autem materia, sic etiam forma effectum quoddam efficientis quidem est. Formam enim efficiens & producit nondum existentem, & inducit in materiam: forma autem effecti & causa est, & præcipua quidem, solâq; effectum arguit, quod vi formæ potissimum existit. Efficientis enim frustrari formâ, forma effecto non potest. *Per quam* itaq; particula eam causam significat eamq; vim, quæ rem sive effectum informat atq; constituit. Res enim nulla est quæ suam non habeat formam, nobis licet incognitam.

Res etiam singulæ, sive individua, quæ vulgò vocant, singulas sibiq; proprias formas habent; differunt quippe numero inter se, quod nemo non fatetur. Quid autem, est aliud numero inter se, nisi singulis formis differre? Numerus enim, ut rectè *Scaliger*, est affectio essentiam consequens. Quæ igitur numero, essentiâ quoq; dif-

differunt; & nequaquam numero, nisi essentiâ, differrent. *Evigilent hinc Theologi.* Quòd si quæcunq; numero, essentiâ quoq; differunt, nec tamen materiâ, necesse est formis inter se differant; non autem communibus, ergo propriis. Sic anima rationalis, forma hominis in genere est; anima *Socratis*, forma *Socratis* propria. *Per quam res est id quod est*; i. e. quæ dat proprium esse rei. Cùm enim cujusq; ferè rei essentiâ partim sit communis, partim propria; communem materia constituit, forma propriam. Et per alias quidem causas esse res potest dici; per solam formam esse id quod est.

Ideòq; hinc à cæteris rebus omnib. res distinguitur. Id est, distinctione, quam vocant essentiali: ex sola enim forma est differentia essentialis. Immo quæcunq; inter se quovis modo, eadem etiam formis differunt; fonsq; omnis differentię forma est; nec aliis argumentis inter se res, nisi formis primariò discreparent. Et hoc quidem conspectarium ex definitione est primum, sequitur alterum.

Forma simul cum re ipsa ingeneratur. Hinc illud verissimum: posita formâ, res ipsa ponitur; sublatâ, tollitur. Ad exempla nunc veniamus. Anima rationalis est forma hominis, quia per eam homo est homo, & distinguitur à cæteris omnibus naturis: geometricarum figurarum in triangulis, quadrangulis sua forma est: Physicarum, coeli, terræ, arborum, piscium sua.

Unde præcipua rerum ut natura est, sic erit explicatio, si possit inveniri. Tertium hoc conspectarium est ex definitione formæ. Unde illud quod de causa in communi suprâdictum est, nempe fontem esse omnis scientię, formæ potissimum con-

convenire intelligitur. Quæ enim causa essentiam præcipuè constituit, eadem si nota sit, scientiam quoq; potissimum facit. Sed formam internam cujusq; rei nosse, à sensibus, ut ferè fit, remotissimam, difficile admodum est. In artificiosis autem rebus forma, ut pote externa, sensibûsq; exposita, facilius occurrit; ut apud Cæsarem de bell. Gall. l. 7. *muri autem omnes Gallici hæc ferè forma sunt &c.* Sic forma Virgiliani portus explicatur, *Æneid. 1. est in secessu longo locus &c.*

Distributio autem formæ nulla vera est. Nam quod nonnulli internam vel externam esse volunt, ea distributio neq; ad res omnes, sed tantum ad corporeas pertinebit; & externa non minus essentialis cuiq; rei est artificiosæ, quàm interna naturali.

C A P. VIII.

De Fine.

Finis est causa cujus gratia res est. Sic etiam Aristoteles, *Phil. 1. 3. est cujus & bonum: hoc enim generationis omnis finis est.* Cum enim efficiens assecutus est finem, in eo acquiescit, actioniq; suæ finem imponit. Finis itaq; est causarum ultima. Verum ut rectè *Aristot. Phys. 2. 2. non omne ultimum finalis causa est, sed quod est optimum:* Finis enim vel terminum rei significat, vel bonum rei; sicut & terminus est vel durationis, vel magnitudinis aut figuræ. Finalis autem causa non est nisi bonum quid; eodemq;

démq; sensu finis & bonum dicitur; verumne an apparens, ad vim causæ nihil interest. Sic etiam *Aristot. Phys. 2. 3.* idémq; in *Eth.* passim: mali etiam evitatio habet rationem boni. Nonnulli tamen inter finem & finalem causam ita distinguunt, ut finis sit usus rei, finalis autem causa de usu cogitatio. Atqui non cogitatio, sed res, i. e. finis ipse effecti causa finalis vera est: nam de materia quoq; & de forma prius cogitatur, sine hac tamen distinctione: cogitatur etiam de causa impulsiva, eaq; movet efficientem, nec tamen finalis causa dici potest; cum eam efficiens non appetat, sed sapius aversetur, quoties affectus aut habitus aliquis pravus ad bonum aliquod apparens consequendum impellit. Idémq; finis in animo efficientis primus, in opere atq; effecto est postremus. Dum autem in animo tantum efficientis est, & nondum obtinetur, nondum sanè existit; cum nondum existit, causa esse quâ potest? Cum itaq; vulgò dicitur, finis quatenus efficientem quasi suadendo movet ut materiam paret, eiq; formam inducat, non modò effecti, verum etiam causarum causa earumq; optima est, id improprie & per anticipationem quandam dicitur. In opere autem & usu licet sæpe sit ultimus, aptitudine tamen ad usum nisi simul cum forma & tempore & naturâ esse intelligatur, erit posterior effecto per formam jam constituto, & adjunctum potius effecti quàm causa. Sic non habitatio, sed ad habitandum, aptitudo, quæ cum inducta forma simul & tempore & naturâ est, proprius finis domus est statuendus, reiq; perfectio & formæ quasi fructus est. Hinc *Græci* non modò τελειω perficio, à τέλει; i. e. finis deducunt, sed etiam perfectum

fectum τέλος, à fine vocant, teste *Aristotele*, *Phil.* 8. 24.

Vis autem propria qua finalis causa aliis ab causis distinguitur, his verbis, *cujus gratia*, exprimitur; ut & aliis etiam particulis, nempe *cujus causa*, *ad*, *ob*, *pro*, *propter*, *quo*, *quorsum*, & similibus. Ne autem est nota illius finis, qui in mali alicujus vitiatione versatur. Finis autem dicitur non eorum solum qui finem sibi proponunt, i. e. efficientium rationalium, sed eorum quæcunq; ad finem referuntur, i. e. quorumvis effectorum. Sic Physicis rebus finis homo propositus est, homini Deus. Quod nec ignoravit *Aristoteles*, *Phys.* 2. 2. *rebus* inquit, *utimur*, *quasi nostra causa essent omnia: nam & nos quodammodo finis sumus*. Deum esse omnium finem docet sapiens *Hebræus*, *Proverb.* 16. 4. *Deus propter se fecit omnia*. Omnium artium est aliquod summum bonum & finis extremus; quæ & earum forma est: ut *Grammaticæ*, bene loqui; *Rhetoricæ*, bene dicere; *Logicæ*, bene ratiocinari.

Quod autem forma finis quoq; esse potest, testatur haud semel *Aristoteles*, *Phil.* 8. 24. & *Phys.* 2. 7, 8. Et *Plato* in *Philebo*, essentiam sive formam rei, generationis finem statuit: unde *Arist.* de part. 1. 1. idem.

Ut formæ, ita & finis distributio vera nulla est: quæ vulgò efferuntur, non sunt Logici finis distributiones, sed specialium finium pro varietate effectorum distinctiones. Distinguitur ab *Aristotele*, de *Anima*, l. 2. 4. *finis* *cujus*, & finis cui: finis *cujus*, est finis operæ, sive operandi; finis *cui*, est finis ipsius operis: e. g. in domo ædificanda; finis *cujus*, sive operæ, est domus; finis *cui*, sive ipsius operis, i. e. do-

mus

mus ædificatæ, est aptitudo ad habitationem.

Afferuntur & aliæ distributiones finis, quæ ad finem cui pertinent ut ex *Aristot. Mag. mor. 1. 2. finis alius est perfectus, alius imperfectus*; vel, quod idem est, ex aliis, *finis est summus, aut subordinatus*. Summus autem est, qui propter se expetitur: estq; vel universalis, omnib. scilicet rebus communis, vel specialis, cuiq; speciei peculiaris & proprius. Subordinatus autem non tam finis est, quàm destinatum quiddam ad finem: & esse summum vel subordinatum, esse universale vel speciale, ad alia æque argumenta pertinet, atque ad finem. Postremò, lex distributionis jubet partes distributionis esse oppositas: at inter summum & subordinatum oppositio nulla est. Ad omnes igitur omnium rerum fines intelligendos, unica finis definitio satis est; ut id sit cuius gratia res est: utrum autem sit summus an subordinatus, universalis an specialis, id Logica non spectat, sed inferioribus quibufvis disciplinis relinquit.

C A P. IX.

De Effecto.

EFFECTUM est, quod à causis existet. Effectum cum sit vi omnium causarum, à causa tamen principe, scilicet efficiente, effectum denominatur. Sed quoniam, si propriè loquimur, effectum ab efficiente solo efficitur, omnium autem causarum vi est, idcirco non definitur ex denominatione quòd à causis efficitur, sed ex re potius,

tius, i.e. ex communi caufarum vi, quod è caufis est vel existit. Jam illud hîc monendum est, ex cap 2. quod in causa explicanda monuimus, effectum esse argumentem absolute cum causa five causæ consentaneum, i. e. causam absolutè arguere; ita ut quemadmodum posita causa, ponitur effectum; sic posito effecto, ponatur causa: ut enim causæ dant esse effecto, ita effectum esse suum habet à caufis, i. e. ab efficiente, ex materia, per formam, propter finem existit. Effectum igitur causas arguit, & ab iis vicissim arguitur; sed non pari ratione: effectum enim arguit causam esse aut fuisse, *Græcis ὅτι*; causa autem, quare sit effectum demonstrat, *Græcis διότι*. Causæ sunt priores & notiores effectum, ut posterius, ita minus arguit. Sic argentum materia poculi, magis arguit & manifestum reddit naturam poculi, quàm poculum argenti. Interdum autem effecta, non per se quidem, sed nobis notiora, clarius causas arguunt, quàm arguuntur à caufis. Sic etiam *Aristoteles, Post. 1. 10. nihil prohibet eorum quæ se reciprocè arguunt, ut causa & effectum, id notius nonnunquam esse quod non est causa.*

Sive igitur gignatur, sive corrumpatur, sive modo quolibet, moveatur quilibet, hic motus & res motu facta effectum dicitur. Ut caufarum modi quidem fuere, ita nunc effectorum quidam his verbis ostenduntur. Modi effectorum generales sunt, vel speciales. Generales sunt vel motus quilibet, quæ operatio & actio dicitur; vel res motu factæ, quæ sunt opera. Modi speciales, sive exempla specialia sunt generatio, corruptio & similia à Physicis petita. Causa enim corrumpens est causa procreans corruptionis. Notandum

randum autem est hîc rem quamlibet, non motam, sed motu factam, Effectum dici: nulla enim res mota, moventis effectum est, nisi res effecta: res enim corrupta corrumpenti contraria est.

Hujus loci sunt laudes & vituperationes, quarum pleni sunt libri sacri & prophani. A factis enim quisque potissimum laudatur & vituperatur.

Huc etiam dicta scriptaque referenda sunt; consilia item & deliberationes, etiamsi ad exitum perductæ non fuerint. Neq; enim facta solum, sed etiam consulta & cogitata pro effectis habenda sunt.

Sunt etiam effecta virtutum & vitiorum. Horatius hoc modo ebrietatis effecta describit:

Quid non ebrietas designat? operta recludit, &c. Volunt hîc pleriq; Rami interpretes motus doctrinam, utpote rei generalis, ad Logicam pertinere; sed non recte. Quid enim potest Logica docere de motu, quod naturale & Physicum non sit. Scientias, inquit, ex Aristot. Phys. 8. 3. & opiniones, motu uti omnes. Utuntur quidem, sed ex natura, quam Physica docet, petito. Sic Logica ratione utitur, nec tamen rationis naturam, sed ratiocinandi artem docet. Omnis quidem causa movet, effectum movetur; nec tamen quid moveat aut moveatur, sed quid arguat aut arguatur Logicus considerat. Ipsum etiam arguere & argui non quatenus motus est, aut res motu facta, sed quatenus relatione quadam arguendi vel facultatem ratiocinandi juvat vel artem tradit, ad Logicam pertinet.

Duos hîc canones causæ & effecti communes, quamvis in Physica potius quàm in Logica tractandos, ut & multa alia quæ Aristotelici conge-

rere huc solent, tamen quia sæpe occurrunt & fallaces sunt, appendicula in modum libet cum suis cautionibus hic attingere. Primus est, *qualis causa, tale causatum*: ex *Aristot.* 2 *Top.* c. 9. Quod verum non est primò in causis per accidens: ut, *hic futor est vir bonus*; at non ergo *bonos confuit calceos*; potest enim esse futor non bonus. Secundò, non in causis universalibus: ut, *sol omnia calefacit*; at non idcirco ipse est *calidus*. Tertiò, non in causis voluntariis, nisi velint. Quartò, si res in qua effectum est producendum, id per naturam suam recipere non potest.

Canon secundus est, *propter quod unumquodq; est tale, illud est magis tale*: *Aristot.* 1 *Post.* c. 2. Scilicet primò rursus in causis per se: ut, *hic est ebrius*; non ergo *vinum magis ebrium*. Secundò, si id à quo tales denominantur utriq; insit: ut, *cera fit mollis à sole*; non ergo *sol est mollior*. Tertiò, si causa illa recipiat magis & minus: non ergo si *filius est homo propter patrem, pater propterea magis homo*. Sed canon hic valet præcipuè in causis finalibus: ut, *hic studiis dat operam propter questum*; *questui igitur studet magis*.

C A P. X.

De Subiecto.

Argumentum modo quodam consentaneum succedit, ut *subiectum & adjunctum*. Absoluta enim consensio causæ & effecti hanc modo quodam consensionem subiecti & adjuncti merito præ-

præcessit. Modo quodam consentire cum re quam arguunt dicuntur, quæ leviter & extrinsecus tantum consentiunt, i. e. citra rationem essentia; ; cùm non ut causa effecto, ita subjectum det esse adjuncto ; neq; hoc ab illo essentiam accipiat. De subjecto prius est agendum : etenim subjectum omne suis adjunctis naturâ prius est, & quodammodo se habet ad adjunctum, ut causa ad effectum.

Subjectum est, cui aliquid adjungitur. Hoc argumentum Cicero rem *subjectam* appellat, quia nimirum alicui subijcitur : subijci autem id dicitur, cui, cùm ex causis constitutum jam est, aliquid tanquam additamentum quoddam præter causas adjungitur : adjungitur itaq; aliquid, quod alteri, nempe subjecto, perfectio jam suisq; causis constituto, extrinsecus sive præter essentiam accedit. Subjectum ergo est quod ad aliquid arguendum est affectum, quod sibi præter illam essentiam, quam è causis habet, insuper accedit.

Ut causa, ita & subjectum suos quosdam habet modos : subijci enim aliquid dicitur vel recipiendo adjuncta vel occupando. Unde subjectum distingui potest in *recipiens*, quod Græci *ὑποκείμενον* appellant, & *occupans* quod *objectum* dici solet, quia in eo adjuncta occupantur. Recipiens vel in se recipit adjuncta, vel ad se : recipiens in se adjuncta, vel sustinet ea & quasi sustentat, quæ idcirco *insita* & *inherentia* appellantur, vel continet, ut locus locatum.

Primus ergo modus est cùm subjectum recipit adjuncta insita sive inherencia. Sic anima est subjectum scientiæ, ignorantia, virtutis, vitii ; quia hæc animæ adjunguntur, i. e. præter essentiam accedunt : corpus sanitatis, morbi, roboris,

infirmittatis, pulchritudinis, deformittatis; quia corpori quidem in sunt, sed præter essentiam.

Secundus modus est subiecti adjuncta in se continentis, i. e. *loci*. Sic locus est subiectum rei locatæ, sive in quo res locata continetur. Sic Philosophi divinis entibus, licet parte & magnitudine carentibus, attribuunt locum. Sic Geometræ locum lociq; differentias in rebus Geometrecis. Physici multo etiam diligentius in rebus Physicis considerant, in mundo, in elementis simplicibus, in rebus compositis. Hinc nonnulli Dialectici suæ artis amplificandæ studio, ut motus, ita loci doctrinam in Logica tractandum esse contendunt. Verum cum locus externa sit affectio cuiusvis naturæ sive corporeæ sive incorporeæ, miror quid illis, *Rami* præsertim discipulis, in mentem venerit, ut cum argumenta, i. e. non res, sed rationes subiectum esse Logicæ doceant; res tamen aut rerum naturalium affectiones, motum, locum, tempus in Logica tractandas esse statuerent. Locus inquit omnium omnino rerum communis est: ergo, inquam, ad artem aliquam non corporum duntaxat, sed rerum naturalium omnium sive Physicam, universalem, non ad Logicam pertinet: quæ non quid sit Locus, spatiumne an superficies corporis ambientis, sed quomodo arguat rem locatam, id solum considerat; nempe ut subiectum arguit adjunctum.

Tertius modus est subiecti ad vel circa se recipientis adjuncta: quæ idcirco *adjacentia* & *circumstantiæ* appellantur. Sic homo est subiectum divitiarum, paupertatis, honoris, infamiæ, vestitus, comitatus, & eorum serè quæ dicuntur *antecedentia*, *concomitentia*, *consequentia*,

si quam omnino affectionem inter se habent non necessariam; quæ causarum & effectorum quæq; ab his orta sunt argumentorum affectio duntaxat esse solet. Hactenus de subiecto recipiente.

Quartus modus est subiecti occupantis, in quo nimirum adjunctum occupatur & exercetur: atq; hoc propriè *objectum* dicitur. Sic sensilia sensuum, & res virtutib. ac vitiis propositæ, subiecta vitiorum & virtutum hoc modo nominantur. Color est subiectum visus, sonus subiectum auditus; quia hi sensus in his sensilibus occupantur & exercentur. Virtutes & vitia declarantur in Ethicis hoc argumento: temperantia & intemperantia, voluptate; fortitudo & ignavia, periculis; liberalitas & avaritia divitiis. Sic res numerabilis Arithmeticæ; mensurabilis, ut ita dicam, Geometriæ subjicitur. Ejusmodi subiecto Cicero 2 Agrar. disputat, inter *Campanos* nullam contentionem esse, quia nullus sit honor: *Non gloriæ cupiditate*, ait, *efferebantur, propterea quod ubi honos publicè non est, ibi cupiditas gloria esse non potest.* &c.

C A P. XI.

De Adjuncto.

Adjunctum est cui aliquid subjicitur. vel quod affectum est ad arguendum subiectum. Doctrina adjuncti doctrinæ subiecti per omnia respondet. Cicero hoc argumentum *adjunctum* & *conjunctum* vocat. Ab *Aristotele*. Accidens
C 3 vocatur,

vocatur, nec male. Quicquid enim ulli subiecto extrinsecus accidit, sive fortuito sive non, adjunctum ejus est. Animi, corporisq; & totius hominis bona & mala, quæ dicuntur, adjuncta sunt animi, corporis, hominis.

Cùm igitur adjunctum subiecto præter essentiam accedat, non mutatur ejus accessione vel decessione essentia subiecti, neq; aliud inde fit subiectum, sed alio duntaxat modo se habet. Unde & modi, qui dicuntur, in adjunctis numerandi sunt. Sic in causis *procreare* & *tueri*, modi, ut suprà dictum est, sive adjuncta quædam vel efficientis vel efficiendi sunt.

Hoc argumentum etsi subiecto est levius, attamen est copiosius & frequentius. Subiecto suo levius est, quia subiectum prius est, & adjuncti sui quoddammodo causa. Id quod de adjunctis non quibuscvis rerum esse docebitur. Hinc *Aristot.* Phil. S. I. *adjunctum subiecto est posterius ratione, tempore, cognitione & natura:* quod etiam de omni adjuncto ita duntaxat verum est, si de tempore excipias, Existentiam enim Adjuncti non spectat Logica, sed mutuam quam cum subiecto habet affectionem quæ utrobique simul est ita ut Subjectum Adjuncto non magis sit tempore prius quam Adjunctum sublato igitur subiecto, tollitur adjunctum, ut, *mortuus non est; ergo nec miser est.* Hinc strepitur in scholis, *ab est secundi adjecti, ad est tertii adjecti valet consequentia negando.* Et posito adjuncto, ponitur necessario subjectum; ut, *si mortuus est miser, certè necessario mortuus est.* Quod & scholæ sic balbutiunt; *ab est tertii adjecti, ad est secundi, valet consequentia affirmando.* Est autem adjunctum subiecto copiosius & frequentius, quia u-
nius

nus ejusdemq; subjecti plurima adjuncta esse possunt. Itaq; quod de ejusmodi signis ait Ovid. 2. de Remed.

*Forſitan hæc aliquis (nam ſunt quoq;) parva vocabit
Sed quæ non profunt ſingula, multa juvant.*

Huc itaq; referuntur ſigna, quæ ad effecta potius referenda ſunt; vimq; arguendi perinde habent ut eorum cauſæ certæ ſunt & cognitæ. Sic tumor uteri ſignum eſt gravidæ; incertum tamen, quia cauſæ tumoris illius aliæ eſſe poſſunt: læc mammarum multo certius, quia cauſa certior & notior. Ejusdem generis ſunt ſigna phyſiognomonica, prognostica Astrologorum & Medicorum. Itaq; ut cauſæ & effecta ſcientiam, ſic ſubjecta & adjuncta conjecturam ferè pariunt. Hoc genere argumenti Fannium Chæream Cicero pro Roſcio Comædo cavillatur; & ab adjuncta corporis habitudine, ſigna malitiæ colligit: *nónne ipſum caput & ſupercilia illa penitus abraſa olere malitiæ, & clamitare calliditatem videntur? nónne ab imis unguibus uſq; ad verticem ſummum (ſi quam conjecturam aſſert homini tacita corporis figura) ex fraude, fallaciis, mendaciis conſtare totus videtur?* Sic Martial. l. 2. *Loilum ludit.*

*Crine ruber, niger ore, brevis pede, lumine luſcus.
Rem magnam præſtas, Loile, ſi bonus es.*

Subjectorum porrò modis, adjunctorum reſpondent modi. Quemadmodum igitur ſubjectum erat recipiens vel occupans, ita adjunctum eſt receptum vel occupatum. Receptum vel in ſubjectum recipitur vel ad ſubjectum: quod in ſubjectum recipitur, vel ſuſtinetur ab eo, vel

in eo continetur aut collocatur : quod sustinetur, est adjunctum insitum, five inhærens.

Primus ergo, modus est adjunctorum inhærentium five insitorum. Omninoq; qualitates (qualitas autem est qua res qualis dicitur) subjectis præter causas, i. e. formas externas (quæ etiam in qualitatibus, numerantur) adjunctæ ; five propriæ sint, quæ omni soli q; subjecto semper conveniunt, ut homini risus, equo hinnitus, cani latratus ; five communes, quæcunq; non sunt eo modo propriæ. Propria autem quatuor modis vulgò dicuntur : soli, sed non omni ; ut homini proprium est Mathematicum esse, sed non omni : omni, sed non soli ; ut bipedem esse homini : omni & soli, sed non semper ; ut homini canescere in senectute : omni, soli, & semper ; ut risibilem esse homini : hoc demum verè proprium est & reciproqum ; ita ut omnis homo sit risibilis, & omne risibile, proprie dictum, sit homo. Adjunctum itaq; proprium etsi naturâ est posterius subjecto, adéoq; levius, tempore tamen simul est, nobisq; ferè notius ; positóq; adjuncto proprio, ponitur subjectum, & contrà : subjectum enim adjuncto proprie est modo quodam essentielle, adjunctumq; à forma subjecti fluit : habet igitur à forma subjecti, non ab natura sua, quòd subjectum ponit & tollit.

Communis etiam qualitas est separabilis vel inseparabilis : ut aquæ frigus, qualitas est separabilis ; humiditas verò inseparabilis ; utraq; autem communis. Atq; istæ qualitatum distinctiones, communium & propriarum, separabilium & inseparabilium, ad judicium faciendum valde sunt utiles, ut secundo libro facile perspicimus.

Ad

Ad hunc modum refertur etiam quantitas, quâ res magnæ vel parvæ, multæ vel paucæ dicuntur; & passio, quâ res aliquid pati dicitur: adeoq; motus, ad rem motam si referatur, hujus loci est. Hactenus de adjuncto quod in subjecto sustinetur.

Secundus modus est adjunctorum quæ continentur in subjecto, ut locatum in loco: atq; huc etiam situs locorum refertur; nisi si cui ad primum potius modum referendus videatur; cum situs passio sit quædam rei locatæ, & ad priorem modum sic pertineat. Atq; hæc de adjunctis quæ in subjectum recipiuntur.

Tertius modus est adjunctorum quæ recipiuntur ad subjectum; quæ vulgò circumstantiæ nuncupantur, quia extra subjectum sunt. Huc *tempus* refertus, duratio nempe rerum præterita, præsens, futura. Sic etiam Deus dicitur qui est, qui erat, & qui futurus est, *Apocal.* 1. 4, & 4. 8. Deo tamen ævum sive æternitas, non tempus attribui solet: quid autem est ævum proprie, nisi duratio perpetua, Græcè *αἰών*, quasi *αἰὼν ὧν* semper existens. Sed quod superioribus capitibus de motu & loco, idem nunc de tempore monendum est; non pertinere ad Logicam quid sit tempus philosophari, sed quo in genere argumenti ponendum sit, hîc nempe in adjunctis. Huc etiam referuntur divitiæ, paupertas, honor, infamia, vestitus, comitatus, & ejusmodi quicquid adesse, adjacere, circumstare, aut citra vim causæ antecedere, concomitari, sequi, ut supra in subjecto diximus, dici potest, vel, ut Cic in *Top.* Quicquid ante rem, cum re, post rem, dummodo non necessariò, evenit.

Quo circumstantiæ genere, *Dido venatum proficiscens, magnifice 4. Aneid. depingitur :*

*Oceanum interea surgens aurora reliquit.
It portis, jubare exorto, delecta juventus :
Retia rara, plagæ, lato venabula ferro : &c.*

In hoc exemplo *Dido* est subiectum : cuius adjuncta adjacentia sive circumstantiæ variæ hic enumerantur : 1. *Tempus, oceanum interea, &c.* 2. *Comitatus, nimirum delecta juventus, equites, principes pænorum.* 3. *Instrumenta (quæ quatenus ad habentem referuntur) adjuncta ; & hujus quidem modi sunt, retia, plagæ, venabula, canes, sonipes.* 4. *Habitus sive vestitus, Sidonio chlamys, purpurea vestis, &c.* Atq; hæc de adjuncto recepto.

Quartus modus est adjuncti occupati. Et enim adjunctorum ad subiecta, quibus occupantur, usus item magnus.

Hoc argumento *Plato* miseras civitates augurat, quæ medicorum & judicum multitudine indigeant, quia multam quoq; & intemperantiam & injustitiam in ea civitate versari necesse sit. Quia nempe in effectis intemperantiæ sanandis, medici ; in effectis injustitiæ vindicandis, judices tanquam adjuncti occupati in subiecto suo occupante versantur.

Sed categoria sive locus argumentorum consentaneorum sic est, unde quidvis alteri consentaneum, vel idem vel unum dici possit ; omnesq; modi unitatis & (ut ita dicam) identitatis huc sunt tanquam ad primos & simplices fontes referendi.

Ad explicandum consentaneorum in comparisonibus usum hæc clausula adjecta est. Námq; ut

ut consensionis omnis duorum in uno tertio, ita & unitis modi hinc sunt petendi. Quot autem modis plura dicuntur inter se consentire, tot etiam modis dicuntur unum & idem: absolute scilicet aut modo quodam: absolute unum vel idem causâ & effecto; modo quodam unum & idem subiecto & adjuncto. Causa vel efficiente vel materia vel forma vel fine. Sic plures statux, efficiente sunt eadem, si ejusdem artificis; materia, si ex eadem, auro scilicet aut ebore; forma si effigies ejusdem, *Alexandri* puta vel *Cæsaris*; fine, si ad eundem ornandum. Sic subiecto idem sunt adjuncta duo vel plura in eodem subiecto; adjuncto idem sunt plura subiecta quibus idem adjungitur: ut duæ vel plures res albæ vel nigræ, albedine vel nigredine idem sunt.

C A P. XII.

De Diversis.

Argumentum consentaneum expositum est in causa & effecto, subiecto & adjuncto.

Altera species argumenti artificialis, primi, simplicis, dissentaneum, sequitur. Et sequi debet: ut enim affirmatio negatione, sic consensio prior est dissensione; prior autem non natura solum, verum etiam usu & dignitate. Ab affirmatione enim & consensione, ut scientia omnis, ita ars omnis atq; doctrina deducitur.

Dissen-

Dissentaneum est quod dissentit à re quam arguit. Ab altero nempe sui generis ac nominis dissentaneo. Nam in hoc genere argumentorum, argumenta inter se affecta eodem nomine, idéoq; plurali numero enunciantur, eademq; definitione & doctrina explicantur.

Sunt autem dissentanea inter se æquè manifesta: alterumq; ab altero æqualiter arguitur; tametsi sua dissensione clarius elucescant.

Hæ duæ sunt proprietates dissentaneorum communes. Primum n. in consentaneis causæ effectis, subjecta adjunctis, priora, notiora, firmiora, præstantiora fuerunt: in dissentaneis alterum altero neq; prius neq; notius; sed natura simul, in illa nempe dissensione, & æquè nota, æquè firma inter se sunt: id quod necesse est cùm eodem nomine ac definitione tractentur.

Secunda quæ proprietas, quam *Aristoteles* contrariis alligat, dissentaneorum est omnium communis; nempe *sua dissensione clarius elucescere*. Quod nisi fieret, argumentum dissentaneorum nullius usus esset. Debet enim omne argumentum affectum esse ad aliquid arguendum & illustrandum. Quorum autem hæc est proprietas ut æquè nota & ignota sint, eorum alterum ab altero argui aut illustrari non potest. Priori igitur proprietati secunda hæc subvenit: quamvis enim dissentanea sint inter se æquè manifesta, ita ut unum ab altero tanquam notiori argui non queat, ex dissensione tamen sua, sive, ut alii loquuntur, juxta se posita, clarius elucescunt. Sic bonæ valetudinis commoda adversæ valetudinis incommodis manifestiora fiunt; virtutum laudes contrariorum vituperatione vitiorum illustrantur.

Utiles.

Utiles itaq; sunt hi loci dissentaneorum, teste etiam *Aristotele*, Top. 3. 4. non solum ad arguendum & illustrandum, verum etiam ad impellendum ac refutandum: ut enim consentaneorum loci valent maximè ad arguendum, probandum & confirmandum, sic loci dissentaneorum ad redarguendum, impellendum & refutandum: ut qui consentaneo argumento doceri non vult, dissentanei absurda consecutione eò redigatur, ut nolens etiam non possit veritati non assentiri. Hinc *Aristot.* Rhet. 3. 17. *refutantia demonstrativis* anteposit.

Dissentanea sunt diversa vel opposita.

Diversa sunt dissentanea, quæ sola ratione dissentiunt. Nomen hoc videtur aptissimum ad hanc levissimam dissensionem significandam: hac enim voce ea significantur quæ cum consensionem quandam inter se habere videantur, possintq; per se suâq; natura eidem subjecto simul convenire, tamen nec idem sunt, nec ei subjecto competunt cujus ratione dissentire dicuntur: quæ autem dissentiunt in eodem tertio, dissentiunt etiam inter se.

Sola igitur ratione dissentiunt, quia non per se suâq; natura dissentiunt, sed solummodo ratione attributionis, i. e. ratione ac respectu aliqujus subjecti, cui simul non attribuuntur. Distributio itaq; dissentaneorum pro ratione dissensionis rectè instituta est: nam ut consensio alia arctior est & absoluta, alia remissior & imperfecta (unde consentanea divisa sunt in ea quæ absolutè vel modo quodam consentiunt) ita dissensio omnis vel remissior est, ut in distinctione
five

sive discretionem diversorum, vel acrior, ut in disjunctione oppositorum: ergo dissentanea aut ratione & modo quodam dissentiunt, ut diversa, aut re & absolute, ut opposita. Verum quod de consentaneis etiam obijci potuit, speciebus æque communicandum est genus (has enim voces etiam communi usu citra artem vulgò intellectus, pace methodi nonnunquam anticipare fas sit) respondetur, quemadmodum consentanea absolute & modo quodam erant æque consentanea, sed non æque consentiebant, sic diversa & opposita æque dissentanea sunt, sed non æque dissentiunt; in diversis tam est dissensio quam in oppositis, sed non tanta: ut in re simili Cic. de Fin. 4. *æquè contingit omnib. fidebus, ut incontentæ sint; illud non continuo, ut æquè incontentæ.* Diversa autem idcirco priore loco tractantur, quòd propter levissimam dissensionem videntur affinitatem quandam cum consentaneis præ se ferre. Quanquam autem diversorum doctrina ab omnibus præter Ramum Logicis omissa est, constat tamen locum in argumentorum doctrina diversis etiam assignandum, cum ex arguendi varia affectione argumenta distinguenda sint, affectio autem dissensionis in diversis, ut diximus, levior sit, in oppositis acrior. Cur diversa Logici hætenus omiserint, videtur hoc esse; quod ad unum syllogismum omnia referunt, in quo diversa locum non habent, ut l. 2. ostendetur.

Diversorum autem notæ sunt frequentissimè non hoc, sed illud, quanquam, tamen: ut pro Pompeio; non victoriam, sed insignia victoriæ reportarunt. Victoria & victoriæ insignia res ad-

admodum affines sunt ; possuntq; ac debent eidem duci competere : ad Syllam autem & Murenam si spectas qui non reportata victoria triumpharunt, dissentanea sunt, & distinguuntur, alterq; affirmato alterum negatur. Sic Ovid. 2. de Arte.

Non formosus erat, sed erat facundus ulisses.

Et Aneid. 2.

Hic Priamus quanquam in media jam morte tenetur, non tamen abstinuit.

Ut victoria & victoriæ insignia respectu Syllæ & Murenæ, sic formosum & facundum respectu *ulyssis*, in media morte teneri non & abstinere à convitiis ratione Priami, diversa adeoq; dissentanea sunt. Pauló secus in Eunucho :

Nam si ego digna hac contumelia

sum maxime: at tu indignus qui faceres tamen.

Sed idem est ac si dictum esset, quanquam ego digna ; tamen tu indignus qui mihi hanc contumeliam facerès. Dignam se quidem esse contumelia *Thais* affirmat ; à *Cherea* tamen negat. Cic. 5. Tusc. *Quanquam sensu corporis judicantur, ad animum tamen referuntur.* Hoc affirmato, negatum intelligitur non ad corpus.

Item illa alijsmodi. Pro Ligario : scelus tu illud vocas, Tubero ? cur ? isto n. nomine illa adhuc causa caruit : alii enim errorem appellant, alii timorem ; qui durius, spem, cupiditatem, odium, pertinaciam ; qui gravissimè, temeritatem : scelus præter te adhuc nemo. In hoc genere exemplorum aliquid conceditur, ut aliud vicinum possit

possit negari: cujusmodi & illud est; veritas premi potest, opprimi non potest; & similia.

Atq; hi modi quidam diversorum sunt: in quibus plerunq; accidit, ut quæ sua natura sunt opposita, ratione tamen certi alicujus subiecti sint tantum diversa; ut in exemplo superiore error, timor, spes, cupiditas, pertinacia, scelus. Sic aurum, argentum, æs opposita sunt, ut infra liquebit: ratione tamen attributionis huic vel illi subiecto, qui unum vel aliqua horum habet, alterum vel reliqua non habet, cum habere simul possit, diversa sunt.

C A P. XIII.

De Disparatis.

Opposita sunt dissentanea, quæ ratione & re dissentiunt. Opposita respondent nomine quidem iis, quæ ab *Aristotele ἀντιθέμενα* dicuntur; sed re & significatione latius patent: nam ἀντιθέμενα *Aristoteli* (qui disparata non attigit) nihil aliud quàm contraria sunt. Possunt etiam repugnantia dici; siquidem repugnare ea dicuntur, quæ ejusmodi sunt, ut coherere nunquam possint; quod *Cic.* ait in *Top.* ejusmodi enim sunt opposita. Re autem & ratione, est non solum ratione certi alicujus subiecti, cui cum tribuuntur, simul non conveniunt, verum etiam re ipsa, i. e. per se & inter se, sua ipsorum natura dissentire, etiam subiecto cuivis non attributa; cui si attribuuntur, non solum non conveniunt, sed, servata, quæ sequitur, oppositorum lege, con-

convenire non possunt. Ea lex quæ ex ipsa definitione oritur, & est oppositorum omnium communis, non, ut docuit *Aristoteles*, contrariorum propria, hæc est, *Opposita eidem attribui, secundum idem, ad idem, & eodem tempore non possunt. Eidem, i. e. eidem numero rei sive subjecto. Secundum idem, i. e. eadem parte. Ad idem, i. e. eodem respectu*; ut, *sol & major est terra & minor*; sed non eodem respectu; in se quidem, major; ut nobis videtur, minor. Extra has tres conditiones possunt eidem subjecto attribui opposita. Sic *Socrates, albus & ater non potest secundum idem, i. e. eadem parte esse*; *pater & filius ejusdem, sive ad eundem relatus*; *sanus & æger eodem tempore*: at *albus esse potest alia parte, ater alia*; *pater hujus, filius illius*; *sanus hodie, cras æger*.

Itaq; ex altero affirmato alterum negatur.

Ex quo facile apparet quid intersit inter diversa & opposita: in illis enim altero affirmato; in his, ex altero affirmato alterum negatur: i. e. ex affirmatione unius, necessario sequitur negatio alterius. Ut, sumpto ex diversis exemplo, non *victoriam, sed insignia victoriæ reportarunt*: hic insignia victoriæ affirmantur, victoria negatur; non ex his affirmatis negatur illa: at in oppositis, dicta lege servata, *Socrates est homo, ergo non est equus*: juxta illud; *opposita se invicem tollunt*.

Opposita autem sunt disparata aut contraria.

Dis-

Disparata sunt opposita quorum unum multis pariter opponitur.

Disparatorum ergo remissior videtur esse oppositio, contrariorum acrior. Disparata etiam à Boethio nominantur, quæ tantum à se diversa sunt, nulla contrarietate pugnantis, ut vestis, ignis. Apud Ciceronem tamen, Invent. I. & Fabium, l. 5. c. 10. contradicentia significant. Nos verborum inopiâ coacti, Boethium sequimur. Multis. nempe sine ulla certa oppositionis lege aut numero: nam & infinitæ ferè res hoc modo opponi inter se possunt: & sic intelligendum est verbum *opponitur*, juxta illud; *Vocabula in artibus facultatem significant*: ut vestis & ignis etsi res duæ, inter se tamen disparata sunt, eò quòd multis pariter opponi possunt. *Pariter*: i. e. æquè pari ratione, eodem dissensionis modo: ut enim disparata sint, non multis tantum, sed pariter opponi debent. Albedo opponitur nigredini, flavedini, rubedini, ut unum pluribus; non autem singulis, ut disparatum quia non pariter: nigredini enim opponitur ut contrarium, cæteris rebus omnibus ut disparatum. Viride, cineraceum, rubrum media sunt inter album & nigrum, quæ singula extremis, & inter se disparata sunt. Sic liberalitas & avaritia inter se disparantur. Sic homo, arbor, lapis, & ejusmodi res infinitæ disparantur; nec eadem res potest esse homo, arbor, lapis. *Virgil. I. Aneid.* hoc argumento disputat:

O quam te memorem, virgo! namq; haud tibi vultus mortalis; nec vox hominem sonat; o dea certè.

C A P. XIV.

De Relatis.

Contraria sunt opposita, quorum unum uni tantum opponitur.

Intelligitur autem unum uni in eodem genere opponi contrariorum, ut relatorum unum uni tantum, & sic in reliquis: nam in diversis speciebus contrariorum, plura possunt ut contraria, uni eidemq; rei opponi; ut *videnti, non videns, & cecus*; *motui, motus contrarius, & quies*; *servo, dominus & liber*.

Quæ Aristoteles ἀντιθέτωρ & ἀντιθέτωρ, et Cicero in *Topicis* (quem Ramus sequitur) contraria appellat: quas etiam in species quatuor Aristoteles ἀντιθέτωρ, in eadem Cicero contraria distribuit.

Prius autem quàm ad contrariorum distributionem in species accedimus, inferenda est distinctio quædam non inutilis, & ad ea quæ diximus capite superiore clarius intelligenda, & ad eas, quæ secundo libro dicuntur, disjunctiones necessarias à contingentibus dijudicandas. Dictum est superiore capite, viride, cineraceum, rubrum media esse inter album & nigrum, quæ singula extremis & inter se disparata sunt. Sciendum itaq; est contraria, quasi extrema quædam habere, alia medium, alia medio carere: medium vel est negationis vel participationis; ex Aristotele, *Top. 4. 3. & Phil. V. 7.* Medium nega-

negationis est quicquid inter duo contraria dici potest, quod sit neutrum eorum: ut inter præceptorem & discipulum, is qui neq; est præceptor neq; discipulus. Medium participationis est, quod utriusq; extremi naturam participat; ut viride inter album & nigrum, tepidum inter calidum & frigidum. Contrariorum igitur quæ medium habent, non est necesse alterutrum affirmari; potest enim affirmari medium: quæ autem medio carent, eorum alterum necesse est affirmari. Quænam autem contraria medium habeant aut non habeant, ex eo dignoscitur quod & *Gellius* tradit l. 16. Noct. Att. c. 8. Contraria quorum contradicentia, cum attribuuntur ei subjecto cui propriè possunt attribui, sunt etiam inter se contraria, ea medium non habent. Sanum & ægrum contraria sunt: eorum contradicentia, non sanum non-ægrum, si animali attribuas cui soli possunt attribui, contraria etiam reperiēs: non sanum enim, est ægrum; non ægrum, sanum; sanum ergo & ægrum medio carent: sic nox & dies, non nox & non dies, æquè sunt inter se contraria; non nox enim, est dies; non dies, nox; medio igitur carent: sic visu præditum, & cæcum esse, si homini tribuis. Quorum verò contradicentia non sunt contraria, ea medium habent; ut præceptor & discipulus: non præceptor enim, non est discipulus; neq; non discipulus, est præceptor; etenim potest alteruter aliquid esse tertium sive medium. Sic album & nigrum: namq; non album & non nigrum de quovis colore medio dici possunt. Nunc ad distributionem contrariorum veniamus.

Contraria sunt affirmantia aut negantia.

Affir-

Affirmantia, quorum utrumq; affirmat. Scilicet rem, siue veram siue fictam; vel quorum vox utraq; rem certam ponit atq; significat; quorumq; unum alteri ut res rei opponitur; ut pater filio, calor frigori. Contraria itaq; affirmantia, quod hic notandum est & distinguendum, sunt quorum utrumq; affirmat rem, non affirmatur de re siue subiecto eodem, id enim supradictæ oppositorum regulæ, qua ex altero affirmato alterum negatur, planè repugnet. Quæ igitur affirmat rem aut negat, topica affirmatio aut negatio dicitur; qua res de alio affirmatur aut negatur *axiomatica*, de qua lib. 2.

Contraria affirmantia sunt relata aut ad-versa.

Relata sunt, quorum alterum constat ex mutua alterius affectione.

Atq; ita quidem ut ex eorum illa mutua affectione, contrarietas ipsa nascatur, ut infra demonstrabitur. Quid ergo? num idcirco relata nunc consentanea nunc dissentanea sunt? Nequaquam, ut relata quidem: sed ea tamen quæ relata sunt, aliis atq; aliis argumentorum generibus possunt subijci; ipsa interim argumentorum genera inconfusa & distincta manent. Sic causa & effectum, quæ arguendo inter se relata sunt, adeoq; dissentanea & æque manifesta, suam tamen vim propriam arguendi retinent, qua & consentanea sunt, & causa prior notiorque effecto. Relata esse contraria ex definitione & consuetariis contrariorum liquet; sunt enim opposita, quorum unum uni tantum opponitur,
ut

ut pater & filius. At, inquis, unus multis, pater filiis, frater fratribus, præceptor discipulis, herus famulis, opponi potest. Respondetur, opponi patrem filio ut relatum; neq; aliud quicquam patri quàm filium, neque filio quàm patrem; & sic de cæteris: sed hunc patrem & hunc filium, hunc præceptorem & hunc discipulum, &c. Non esse relata, sed disparata: neq; enim horum alter ex mutua alterius affectione constat; neq; natura simul sunt, & alter sine altero existere potest. Itaq; primæ substantiæ, sive individua & singularia, ut ait *Aristoteles*, *Categor. 5. Non sunt relata.* Et *Categor. 6.* ait multa genera relata esse, singularia verò nulla: Sed non video cur relata, quemadmodum & alia argumenta, etiam in singularibus considerari non possint; singularia enim exempla sunt ferè omnia. Nec magis video cur in uno relato singulari non possit ad correlata multa esse multiplex relatio; dummodo relatio una numero inter bina tantummodo sit, totiesq; consideretur quot sint correlata; patris nimirum toties quot sunt filii; filii, quot sunt parentes, pater nempe & mater; fratris, quot sunt fratres & sorores; nam nisi quicquid de relatis in genere dici solet de singulis quoq; Relatis vere dicatur. Id toto quidem de genere verè dici posset. Si reponat ex *Aristot. Philos. 5.* Relata non Significare existentiam, ne cetera quidem argumenta idne significant. Sed mutuam tantummodo affectionem. Sunt *affirmantia.* i. e. ut duæ voces sunt, ita etiam duæ sunt res inter se opposita; ut pater, filius. Constare autem alterum ex mutua alterius affectione, est nullam aliam habere essentiam, quatenus relata sunt, præter mutuam
illam

illam unius affectionem ad alterum & alterius ad illud. Atq; inde nominata sunt relata, quòd ad se invicem referuntur, totaq; illorum natura in relatione consistit. Sic patrem esse, est habere filium; filium esse, est habere patrem. Hinc illud; Omnia relata convertuntur: ut pater est filii pater; filius est patris filius. Hujus mutua affectionis ratione relata sunt mutua sibi causæ & mutui effectus, nam quòd quis pater est, id habet à filio; quòd filius, à patre: & tamen hujus mutua affectionis vi ita sibi invicem opponuntur, ut neq; unum de altero nec ambo de tertio dici possint; ut *Aneas* est pater *Ascanii*, ergo non est *Ascanii* filius; *Ascanius* est filius *Anee*, ergo non est *Anee* pater. Sed quoniam relatorum unum constat ex mutua alterius affectione, mutuaq; sibi, ut diximus, causæ atq; effecta sunt, confectarium hoc inde est quod sequitur.

Relata simul sunt natura: ut qui alterum perfectè norit, norit & reliquum.

Relata autem simul esse natura docuerunt & veteres Logici, *Aristoteles*, *Damasceus*, & alii; relatq; se mutuò inferre mutuòq; tollere; ut posito patre, ponatur filius; sublato, itidem tollatur: etiamsi enim ille manet qui filius fuit, non tamen filius manet. Neq; solum unum existere nequit sine altero, sed ne intelligi quidem. Necessè est igitur, quod & meminit *Aristat. Top.* 3. *ut alterum in alterius definitione comprehendatur; utq; alterum perfectè, i. e. definite, qui norit, norit continuò alterius definitionem; quæ sicuti & essentia eorum, reciproca est.* Supra itaq;

itaq; *Ramus* definitivum subiectum, cui aliquid adiungitur; non, quod alteri subicitur, ut alii malebant; etiam si his verbis non modò essentia subiecti, sed etiam notatio contineri videatur: deinde adiunctum definitivum, cui aliquid subicitur, non quod alteri adiungitur quia subiectum & adiunctum relata sunt; & subiectum adiuncti, adiunctum subiecti, ex qua alterum alterius mutua affectione constat, eà erat definiendum, quæ ipsum essentia est. Ad exempla nunc veniamus.

○ *Pro Marcello*: Ex quo profectò intelligis quanta in dato beneficio sit laus, cum in accepto tanta sit gloria. Hic dare & accipere relata sunt, quorum unius consequens ex consequente alterius intelligi ait *Cicero*. *Martialis* in *Sosibianum*. l. I.

*Tu servum scis te genitum, blandeq; fateris;
Cum dicis dominum, Sosibiane, patrem.*

Arguebat se servum esse genitum *Sosbrianus*, dum negare videbatur, quia dominum vocabat patrem. Sic apud *Quintilianum*, l. 5. c. 10. Si portorium *Rhodiis* locare honestum est, & *Hermacreonti* conducere. Quomodo & in *Oratore* profecto *Tullius*: Num igitur est periculum, ait, ne quis putet in magna arte & gloriosa turpe esse docere alios id quod ipsi fuerit honestum discere? Apud *Ovidium* in ætatis ferrea descriptione, *Metam.* I. Varia relatorum exempla afferuntur:

---- Non hospes ab hospite tutus,
Non socer à genero: fratrum quoq; gratia rara est.
Imminet exitio vir conjugis, illa mariti:

Lurida

*Lurida terribiles miscent aconita noverca :
Filius ante diem patrios inquirat in annos.*

Atqui argumentum talis relationis contrarium nihil habet, immo arguit mutuas causas : ut sum tuus pater ; tu es igitur meus filius. At quum dico, sum tuus pater, non igitur sum tuus filius, tum contraria verè sunt ; atq; ex ipsa quidem hac mutua relatione.

CAP. XV.

De Adversis.

A*Dversa sunt contraria affirmantia, quæ inter se velut è regione absolute adversantur.*

Sic etiam à Cicerone appellantur in Topicis. *Sunt contraria*, quia eorum unum uni tantum opponitur ; ut honestum turpi : duo n. duntaxat possunt sibi invicem è regione adversari. *Sunt affirmantia* ; quia unum uni opponitur, ut res rei ; quod supra demonstratum est, & infra clarius patebit. His autem verbis *è regione absolute adversantur*, nihil aliud quàm directa oppositio, adeóq; maxima, intelligitur ; qualis est inter duo puncta diametri in eodem circulo. His etiam verbis distinguuntur adversa à suis mediis, quæ inter se & cum extremis disparantur. *Absolute* ; i. e. omninò, perfectè ; ut in *Consentaneis*, quæ absolute consentiebant. *Ramus perpetuo dixerat* : sed assentior aliis, qui *absolute* malunt

lunt: nam perpetuò opponi, omnib. oppositis, etiam relatis, commune est, quatenus opposita sunt, i.e. ratione & re dissentiunt. *Absolutè* autem additur, ut hac particula distingui adversa possint à relatis, in quibus consensio quædam est, quatenus alterum ex mutua constat alterius affectione, cujusmodi hic omninò nulla est. Sic albor & nigror, calor & frigus opponuntur.

Aristoteles, contraria (sic enim *adversa* vocat *Categ.* 6.) definit, *que plurimum inter se distant in eodem genere: & rursus Categ.* 8. *Contraria sunt vel in eadem specie, vel in eodem genere.* Quem *Cic.* est secutus in *Top.* & *Galen* de *Opt.* secta. Verùm adversa, ut docet idem *Aristot.* cap. de *Contrariis*, non in eodem solum genere plurimum differunt, ut album & nigrum, verumetiam in contrariis, ut justitia & injustitia; vel ipsa genera, ut bonum & malum, virtus & vitium. Quid quod in eodem genere differre, commune videtur adversis cum relatis: pro eodem igitur genere, rectius in definitione ponitur è regione, prout *Cicero* interpretatur.

Æneid. 11.

Nulla salus bello; pacem te poscimus omnes.

Libertas & servitus apud Tibullum, l. 2.

Sic mihi servitium video, dominamq; paratam;

Tu mihi libertas illa paterna vale.

Sic consilium & casus; pro *Marcello*: nunquam enim temeritas cum sapientia commiscetur, nec ad consilium casus admittitur. Et *Parad.* 1. contra *Epicureos*: illud tamen *arctè* tenent accuratèq; defendunt, voluptatem esse summum bonum: *que quidem mihi vox pecudum videtur, non hominum,*

num, &c. Pecudem & hominem adversa Cicero opposuit: voluptas pecudis bonum est, non igitur hominis. Usus enim hujus argumenti non in qualitatibus duntaxat, ut vulgò putant, verum in substantiis etiam & quantitativis, immo omnibus in rebus versatur: id quod Aristot. non diffitetur, cum ait Phil. x. 3. *Contraria etiam ad primas entis differentias referri: & rursus; in omni genere contrarietatem esse.* Contrarietas deinde argumentum esse Logicum ab omnibus agnoscitur: nihil ergo obstat quominus ad quævis rerum genera pertineat. Quædam denique formæ vel maximè substantiæ sunt: formas autem específicas omnes sibi invicem adversas esse, apud omnes receptissimum est: immo verò major videtur esse formarum contrarietas quàm qualitatium; qualitates enim commisceri facile possunt, formæ vix unquam. Quod ergo idem Aristot. alibi docet, substantiæ & quantitati nihil esse contrarium, id non ratione tantum, sed ipsius etiam testimonio suprâ citato refellitur; non substantiarum autem pugna etsi non Physica, Logica tamen est, dum ex altera substantia singulari affirmata, negatur altera.

CAP. XVI.

De Contradicientibus.

Contraria negantia sunt, quorum alterum ait, alterum negat idem. Ab altero negante sic nominantur: in puris enim negantibus, ut loquuntur, nullus est rationis usus. Atq; hinc demum nunc clarius patet, quænam essent contraria affirmantia: de quibus cùm dictum est, de negantibus quoq; est dictum quod satis sit.

Ea sunt contradicentia aut privantia.

Contradicentia sunt contraria negantia, quorum alterum negat ubiq;: ut justus, non justus, animal, non animal; est, non est.

Contradicentia sunt contraria, quia una negatio uni affirmationi opponitur, & contrà; immo sine medio. Sic etiam Aristot. Post. 1. 2. Contradictio est oppositio cujus nullum est medium per se. Quorum alterum negat ubique; i. e. in re qualibet: negare enim ubique est de re qualibet dici, de qua affirmatum non dicitur: ut de quo videt non dicitur, de eo non videt dicitur. unde illud vulgò dictum, contradicentia sunt omnia: & illud Aristot. 1 Post. 1. 2. quodvis verè est vel affirmare vel negare: verè affirmare et negare simul, impossibile est. & Top. 6. 3. de qualibet re vel affirmatio vel negatio verè dicitur. Alterum autem negare vbique dicitur, vel expressè vel implicite. Expressè ut suprà, cum negandi

Negandi particula: implicite, cum reipsa non minus contradicit & repugnat alteri, quam si verbo negaret; ut corpus infinitum, proprietas communis. Vulgo vocatur contradictio in adjecto; quia id subiecto adjungit quod subiectum plane tollit; atq; ita contradictionem implicat. Atq; hinc etiam est quod contradicentia medio carent non solum participationis verum etiam negationis, quia necesse est affirmare vel negare unum quodvis de altero. Sic etiam Boethius in Topicis: *inter affirmationem & negationem nulla est medietas*. Contradicentium porro exempla hæc sunt. In defensione Murenæ contradicitur sententiis Catonis & Ciceronis; illius Stoici, hujus Academici. Dialogus est his verbis: *nihil ignoveris: immo aliquid, non omnia. Nihil gratiæ causa feceris: immo ne resistito gratiæ, cum officium & fides postulabit. Misericordia commotus ne sis; etiam in dissolvenda severitate: sed tamen est aliqua laus humanitatis. In sententia permaneto: enim vero nisi sententia alia vicerit melior.* In hoc exemplo quadruplex contradictio est: nihil ignoveris; nonnihil ignoveris; nihil gratiæ causa feceris; nonnihil gratiæ causa feceris, &c. *Martial. l. 1.*

*Bella es; novimus: & puella; verum est:
Et dives; quis enim potest negare?
Sed dum te nimium, Fabulla, laudas,
Nec dives, neq; bella, nec puella es.*

Cicero in Tusc. cogit hoc argumento Atticum Epicureum fateri mortuos miseros non esse, si omnino non sint, ut Epicurei credebant. *Quem esse negas; eundem esse dicis: cum enim miserum*

esse dicis, tum eum qui non sit, esse dicis. Sic Terentianus Phædria Dori eunuchi dictum elevat, quod affirmasset prius, quæ post inficiaretur: modo ait, modo negat.

Sunt qui contradictionem nullam esse statuunt, nisi axiomaticam; de qua *lib. 2.* Verùm si affirmatio & negatio Topica datur, ut suprà demonstravimus, necesse est dari quoq; Topicam contradictionem: qualis est illa *Rom. 9. Vocabo non populum meum, populum meum; & non dilectam, dilectam.* In distinctionibus etiam frequentissimus est hujus contradictionis usus; præsertim ubi alterum distinctionis membrum apta voce exprimi non potest: ut Dialecticæ materia est ens, & non ens; lex est scripta, vel non scripta. Sic ad *Critonem Socrates; videris opportune quidem non excitasse me.* In his exemplis axiomatica contradictio nulla est: uti neq; in illo quod suprà in hoc capite ex *Martiale* allatum est: *Bella es; novimus, & puella, &c.* Non enim verbum est sive copulatio negatur, sed partes. *Fabulla est bella & puella & dives; Fabulla est & non bella, & non puella, & non dives.* Axiomatica enim contradictio hujusmodi fuisset: *Fabulla non est & bella & puella & dives: quod lib. 2. clarius intelligetur.*

C A P. XVII.

De Privantibus.

Privantia sunt contraria negantia, quorum alterum negat in eo tantum subiecto, in quo affirmatum suapte natura inest. Atq; hinc affirmatum dicitur habitus, quo quis quid habet, negatum autem privatio, quâ quis ea re privatur, aut caret: ut visus & cæcitas, motus & quies in iis rebus quæ motu conservantur. Sunt contraria, quòd unum uni opponitur, habitus privationi; qua ex parte negantia quoq; dicuntur: nam & hinc rei alicujus affirmationi ejusdem negatio, i. e. enti non ens opponitur: privatio enim, ut inquit *Aristot. Phys. 2. 8. per se est non ens*: & *Plut. de primo frigido*; privatio est essentie negatio; habituiq; opponitur, non ut natura quedam aut essentia per se existens, sed ut ejus corruptio & ademptio. Quorum alterum negat in eo tantum subiecto, in quo, &c. His verbis forma privantium qua distinguuntur à contradicentibus, exprimitur. In contradicentibus enim negatio infinita est, affirmatum suum ubiq; , i. e. qualibet in re negans; ut quicquid non est justum, est non justum in privantibus verò finita est negatio, atq; in eo tantum subiecto affirmatum five habitum negans, in quo affirmatum suapte natura inest: aut inesse potest? ut etiam *Aristot. in Categor.* Sic cæcitas est negatio visus, non ubiq; & in re qualibet, sed in qua solum visus inesse natura debuit: nam

privari aliquid tum demum dicitur, cùm eo caret quod natum est habere : non ergo quicquid non videt , propriè cæcum dicitur, Deinde in contradicentibus negatum contradicendo negat, & est pura negatio ; ut videns, non videns : in privantibus negat privando ; nec solum negatio est, sed privans negatio & extinctio habitus alicujus qui inesse naturâ subjecto debuit aut potuit ; ut videns, cæcus. Hinc illæ privationis proprietates ex *Plut.* de primo frigido, non inutiles : *privatio iners & agendi impos est : non suscipit magis aut minus ; neq; enim quis dixerit huic illo cæciorem ; aut tacentem, magis minúsve tacere ; aut defunctum, magis minúsve esse mortuum : habitus enim gradus esse possunt, non entis non item : Illa autem Aristot. à privatione ad habitum non datur regressus*, incertior est : cùm enim habitus quo quis habere quid dicitur duo modi sint, potentia & actus, à privatione potentiæ vel facultatis, idq; naturâ duntaxat, regressus negatur. Contradicentia deniq; medio carent non solum participationis, verum etiam negationis : privantia verò carent quidem medio participationis, nulla enim est habitus cum privatione permixtio ; non carent autem medio negationis ; multa enim sunt, quæ neq; vident, neq; cæca sunt ; ut lapis, arbor, &c. nisi cùm ei subjecto attribuuntur. cui natura inesse debuerunt : tum enim negationis etiam medio carent ; quippe omnis homo aut videns est aut cæcus, gnarus aut ignarus. Exempla porro privantium sunt dives & pauper : *Martial. l. 5.*

*Semper eris pauper, si pauper es, Emiliane :
Dantur opes nullis nunc, nisi divitibus.*

Vita

Vita & mors, ut in *Miloniana*: hujus mortis sedetis ultores, cujus vitam, si putetis per vos restitui posse, nolitis. Item loqui & tacere: *Catil.* quid expectas auctoritatem loquentium, quorum voluntatem tacitorum perspicis. Cætera exempla quæ *Ramus* attulit, minus quadrant: ut ebrius & sobrius, mortalis & immortalis, quæ potius adversa sunt. Neq; enim in præpositio in compositis privationem semper, sed adversum habitum sæpe significat; unde nec peccatum privationem esse dixerim; siquidem hoc vel illud peccatum sive vitium, privatio non est. Atq; hæ quidem species contrariorum sunt. Sed quæri hic solet, quænam earum sint maximè inter se contrariæ. *Aristoteles* maximam contrarietatem nunc adversis tribuit, nunc contradicentibus. Sed videtur maximam esse dissensionem inter privantia: deinde inter adversa; minorem adhuc inter contradicentia; minimam inter relata: nam relata propter illam mutuam affectionem, partim consentanea sunt: contradicentia purè quidem contraria negantia sunt, sed tamen propter infinitam illam negationem, pro mediis & disparatis crebro accipiuntur, ut non calidum non tam opponitur calido quàm frigidum; quoniam non calidum potest tepidum esse; sic non bonum, medium quiddam esse potest & adiaphorum: non album de rubro dici aut intelligi potest: adversa è regione quidem adversantur; non ita tamen, quin commisceri queant: privantia verò mixtionem non admittunt; & privatio ferè est habitus extinctio atq; ereptio aut saltem deficientia; habitusq; est ens, privatio non ens; enti autem nihil, æquè ac non ens, contrarium est.

Sed dissentaneorum categoria sic est, unde quidvis ab altero differre quolibet modo possit.

Quamquam enim causa omnis essentialis differentiae reliquarum, argumenta reliqua consentanea, ut quot modis consentire totidem dissentire res dicantur, causa nempe vel effecto, subiecto vel adjuncto, modi tamen omnes, quibus res inter se differunt vel ratione scilicet vel re, forma primitus est, non tractantur nisi in dissentaneis, vel si comparantur, in comparatis. Unde illud genere vel specie differre, nihil aliud est quam communi vel propria forma, quarum illa symbola sunt, ut infra dicetur.

C A P. XVIII.

De Paribus.

Argumenta simplicia ita fuerunt in consentaneis & dissentaneis.

Comparata sunt argumenta prima, quae inter se comparantur.

Simplex rerum affectio comparatione prius tractanda fuit: hanc enim si removes, comparata omnia aut consentanea erunt aut dissentanea. Platonis doctrina & Xenophontis ante adjuncta utriq; erat, quam comparata. Sunt argumenta prima non orta, eo quod orta, ut patebit infra, eandem habent affectionem cum primis unde orta sunt; comparata etsi simplicia prius fuere, simplicium tamen affectionem non habent. In-
ter

ter se comparantur; nimirum quæ sunt ejusdem generis: genera autem distributio mox docebit. Nunc proprietates comparatorum sunt dicendæ.

Comparata etsi ipsa comparationis natura æque nota sunt; attamen alterum altero alicui notius & illustrius esse debet.

Ubi hoc advertendum, non sua sed comparationis natura dici æquè nota esse comparata. Ita sunt, inquis, & relata vi relationis; immo argumenta omnia quæ etiam relata sunt. At, inquam, relatio & comparatio non sunt idem; & reliqua argumenta, & si quatenus relata sunt notionem Logicam, æque nota sunt, suâ tamen naturâ, prout quæq; est, vel æquè vel non æquè sunt manifesta; dissentanea quidem æquè, consentanea non æquè, ut jam supra est dictum. Debet autem ei quicum disputamus comparatorum id quod arguit sua natura & priusquam comparatio instituitur, notius esse atq; illustrius eo quod arguitur; æque enim obscurum nihil argueret. Unde in signis comparatorum usus elucet; quo fit ut inæqualis rerum notitia comparationis vi æqualis reddatur. Sic consentanea ad probandum, dissentanea ad refellendum, comparata ad illustrandum aptissima sunt.

Comparata autem sæpe notis brevius indicantur; aliquando partibus plenius distinguuntur; quæ propositio redditioq; nominantur.

Duplex ergo est comparationis forma: altera contracta, altera explicata. Contracta est quæ uno verbo concluditur, ut infra cap. 21. Explicata, quæ partibus distinguntur; partésq; istæ propositio & redditio nominantur. Propositio præcedit sæpe, & argumentum est: redditio sæpe sequitur, éstq; id quod arguitur; si secus occurrit, inversio est. Omnis autem forma comparationis contracta, suis partibus explicari potest.

Atque omnino comparata etiam ficta arguunt fidémq; faciunt.

Arguunt scilicet rem veram; in quo cæteris argumentis præcellunt; quæ ficta si sunt, rem fictam duntaxat arguunt; ut materia ficta, fictam solis domum. At comparata etiam ficta, non sua quidem natura, sed comparationis vi, res veras arguunt fidémq; faciunt.

Comparatio est in quantitate vel qualitate.

Quantitas est qua res comparata quantitate dicuntur.

Estq; parium vel imparium. Non hic loquimur de quantitate solum mathematica, quæ magnitudinis est aut numeri, sed de quantitate Logica, quæ ratio quælibet sive affectio est, qua res quæcunq; inter se comparatæ quantæ, i. e. æquales vel inæquales, pares vel impares dici possunt.

Paria sunt, quorum est una quantitas.

Sic etiam definit *Aristoteles*, *Phil.* 8. 15. Quod idem valet ac si diceretur, quorum par ratio est. *una*, i. e. eadem, æqualis: unde in plurali numero eodem nomine ac definitione explicantur.

Argumentum igitur par est, cùm par illustratur à pari.

Ad exempla veniamus; atq; ad ea primùm quæ in forma, ut diximus, contracta notis brevius indicantur. Hæ autem notæ præcipuæ sunt *par*, *æquale*, *equare*; ut in his: *Æneid.* 2.

--- *Par levibus ventis.*

Ubi *levitas Creusæ* umbræ comparatur *levitati* ventorum. *Æneid.* 3.

Et nunc æquali tecum pubesceret ævo.

Æneid. 6.

*En hujus nate auspiciis, illa inclyta Roma
Imperium terris, animos æquabit Olimpo.*

His notis aliæ sunt affines, *pariter*, *æquè*, *æqualitas*, *æqualiter*, *perinde*, *acsi*, & id genus alia.

Sequitur forma explicata; in qua *propositio* & *redditio* distinguuntur, quæ in contracta forma erant implicitæ. In hac autem forma explicata *par* quantitas vel notis apertè indicatur, vel sine notis mente & ratione concipitur: Notæ istæ sunt vel propriæ *parium*, vel *negationes imparium*: *parium* propriæ, *idem*, *quod*; *tam*, *quàm*; *tanto*, *quanto*; *tot*, *quot*. In quibus singulis notarum paribus prior quæq; redditioni intervit, posterior verò propositioni. *Catil.* 4.
Cujus

*Cujus res geste atque virtutes iisdem, quibus solis
cursus, regionibus ac terminis continentur. Æ-*
neid. 4.

Tam fecti praviq; tenax quàm nuntia veri. Ca-
tull. 4.

*Tantò pessimus omnium poëta,
Quanto tu optimus omnium patronus.*

Ovid. 4. Trist.

*Littora quot conchas, quot amœna rosaria flores
Quotq; soporiferum grana papaver habet, &c.
Tot premor adversis.-----*

Negationes imparium sunt; vel majoris & minoris seorsim vel utriusq; simul non magis, non minus. *Philippic. 9.* Neque enim ille magis *Jurisconsultus* quàm *justitiæ fuit*, &c. Neque *constituere litium actiones* malebat, quàm *controversias tollere.* *Ovid. 2. de Arte.*

Non minor est virtus, quàm querere, parta tueri. *Utriusq; simul pro Muræna*: Paria cognosco esse ista in *L. Muræna*, atq; ita paria, ut neque ipse dignitate, *vinci potuerit*, neque te dignitate superavit. *Observandum est autem negationem majoris vel minoris seorsim non semper esse notam parium*: neq; enim si *servus non est major domino*, ergo est *equalis*; nec hi, *dominus non est minor servo*, ergo *par*.

Hactenus cum notis; nunc sine notis hæc quæ sequuntur. Atq; in hoc potissimum genere exemplorum sine notis, apparet vis eadem arguendi in utramq; partem; adeo ut si unum, alterum quoq; sit; si non sit unum, neq; alterum. Itaq; ex uno eorum affirmato, alterum affirmatur; ex negato, negatur: 2 *Philippic. Quorum facinus*

facinus commune, cur non eorum praeda communis?
Ter. in Adel.

Quando ego non curo tuum, ne cura meum.

Hujus loci, parium nempe sine notis, sunt consecutaria illa è contrariis quidem orta, sed parium collatione tractata. ut ex adversis ista; Cicerone pro Sylla: neq; verò quid mihi irascere intelligere possum; sed, quòd eum defendo quem tu accusas, cur tibi quoque ipse non succenseo, qui accuses eum quem ego defendo? Inimicum, inquis, accuso meum: & amicum, inquam, ego defendo meum. Sic 3. Tusc. quod cum fateantur, satis magnam vim esse in vitiis ad miseram vitam; nonne fatendum est eandem vim in virtute esse ad beatam vitam? Contraria enim contrariorum sunt consequentia.

Quæ tamen regula non est perpetuo vera primo nisi collatio sit verè parium: non ergo sequitur, mala opera damnant; ergo bona justificant. mala n. opera omnino mala, bona imperfectè bona sunt; illa nostra, hæc non plane nostra. Secundo, sed in iis duntaxat paribus, contrariorum ex loco petitis, quorum parium propositio reciprocatur. Quod in relatis quidem fit frequentissimè: ut apud Martialem.

*Tum servum scis te genitum, blandeq; paternis,
Cum dicis dominum, Sosibiane, patrem.*

Pater est filii dominus, & filii dominus est pater: pariter ergo filius est patris servus. Sic ex adversis: bonum est appetendum; pariter ergo malum est fugiendum. Nempe quia propriè adeòq;
reci-

reciprocè, omne appetendum est bonum. Et ex privantibus: *Ovid. 1. Fast.*

*In pretio pretium nunc est, dat census honores,
Census amicitias: pauper ubique jacet.*

Dives est in pretio, & quisquis est in pretio, est dives; ergo omnis pauper jacet.

Quoties autem collationis propositio non reciprocatur, vel quoties uni parium id quasi proprium tribuitur quod utrisque commune est, eorum consequentia contraria non sunt, sed sæpe eadem. Fallit ergo hoc ex relatis: pater est dives; ergo filius est pauper: quia propositio non est reciproca; omnis enim dives non est pater. Et hoc etiam ex adversis: homo est sensu præditus; bestia igitur sensu caret. Homo mortalis; bestia igitur immortalis: quippe nec sensu præditum, nec mortale est homini proprium; sed utriq; contrario commune, & homini & bestię. Hoc etiam ex contradicentibus: homo est animal; ergo non homo est non animal. Hoc denique ex privantibus: videns vivit; ergo cæcus est mortuus: vivere enim & videnti & cæco commune est. Non enim idem non dici de contrariis, sed contraria de eodem dici non possunt: immo quod suscipit unum contrariorum, suscipit alterum; & quod unum non suscipit, neque alterum; ut, in quo est amor, in eo potest esse odium. Quibus nullum est ius, iis nulla fit injuria.

Est & alius parium sine notis modus, quo interdum laceffiti, par pari reponimus. Qualis est *Virgil. Ecl. 3.* In illa pastorum alterna contentione repetitum illud; *Dic quib. in terris, &c. Cujusmodi est & illud Mat. 21. 23. &c.* Qua

authoritate facis ista, &c. Interrogabo vos ego etiam quiddam: Baptisma Joannis unde erat? Affine est illud Cic. Off. 2. Cato, cum ab eo quæreretur, quid esset fœnerari? respondit, quid hominem occidere.

Paria verò ficta quorum esse proprium supra diximus rem veram arguere, sunt illa apud Ciceronem, Invent. 1. ex *Aschine Socratico*; ubi *Aspasia* cum *Xenophontis* uxore & *Xenophonte* ipso sic inducitur locuta: dic mihi, quæso, *Xenophontis* uxor, si vicina tua melius habeat aurum quàm tu habes, utrum illius an tuum malis? Illius, inquit. Et si vestem? Illius verò respondit. Age verò, si virum illa meliorem, an illius malis. Hic mulier erubuit. Comparatio sic se habet: si aurum, si vestem vicinæ meliorem habere malle quàm tuam, malle etiam meliorem vicinæ virum argueris. Non dicit vicinam habere aurum aut vestem meliorem, sed fingit aut ponit, eamq; si mallet *Xenophontis* uxor, arguitur malle virum quoq; vicinæ si melior sit.

C A P. XIX.

De Majoribus.

Imparia sunt, quorum quantitas non est una.

Non una, i. e. non eadem; quorum par ratio non est: contrariorum enim contraria ratio est.

Impar est majus vel minus.

Majus est cujus quantitas excedit.

Major

Major autem vel minor quantitas æstimanda est ex rerum quæ comparantur, elatione vel summissione, ut inquit *Cic.* in *Top.* i. e. excessu vel defectu; quæ vel notis indicantur, vel, si desunt notæ aliis vocibus, quæ excessum vel defectum significant, intelliguntur. Ex eo autem quod suprà de Logica quantitate diximus, intelligendum est id Logicè majus quoq; esse, cujus non solum magnitudo, mensura, aut numerus, sed etiam auctoritas, potentia, præstantia, probabilitas, difficultas, aut quid hujusmodi majus est; vel brevius, quod quavis ratione excessum habet, id majus est; idq; non solum rei ipsius natura, sed vel opinione differentis. Majus igitur est cujus quantitas excedit id quod minus est: majus enim hic adhibetur ad arguendum minus.

Quemadmodum autem parium, ita argumenti à majore, forma alia contracta est, quæ notis brevius indicatur; alia explicata, quæ partibus plenius distinguitur.

Contractioris formæ notæ sunt vel nomina comparativa & superlativa suos casus regentia, vel verba quædam; & ea quidem utraq;, non solum quæ excessum significant, ut *major*, *melior*, *peior*; *præstare*, *superare*, *vincere*, *excedere*, *preferri*, cum referuntur ad id quod arguit, verum etiam ea cum nomina tum verba quæ defectum significant, ut *minor*, *inferior*, *posthabeo*, *cedo*, *vincor*, *superor*, si referuntur ad id quod arguitur.

Explicata autem forma nunc est cum notis, nunc sine notis. Notæ sunt *non solum*, *sed etiam*; *non*, *tam*, *quam*, & *comparationes*, *verbâq;*, ut suprà, non modò elationem significantia cum
par-

particula *quàm*, si ea particula tribuatur ei semper quod arguitur, sed etiam ea quæ summisionem significant, si modò particula *quàm* referatur ad id quod arguit: ut, *minus est amicum pulsare, quàm patrem*. Sed hoc exemplum arguit potius à minori quàm grave scelus sit pulsare patrem, quàm à majori non admodum grave esse pulsare amicum. Idem de cæteris hujusmodi est dicendum.

Exemplum primæ notæ: *Cic. pro Murena: Tollitur è medio non solum ista verbosa simulatio prudentiæ, sed etiam illa domina rerum sapientia. Spernitur orator non solum odiosus in dicendo aut loquax, verùm etiam bonus. In hujusmodi exemplis sed etiam est propositio, &, ut majus, arguit redditionem non solum, ut minus.*

Huic nota affinis est immo, vel immo verò. Cujusmodi est illud apud Terent. *Thr. Magnas verò agere gratias Thais mihi? Gn. Ingentes. Thr. Ain tu? leta est? Gn. Non tam ipso quidem dono, quàm abs te datum esse: id verò seriò triumphat. Hic faciliè intelligitur immo ingentes & immo id seriò triumphat. Ingentis gratiæ arguunt magnas; & triumphare, lætam esse. Sic Catil. 1. Hic tamen vivit, vivit? immo verò in senatum venit. Et illud Ver. 3. Non furem, sed raptorem; non adulterum, sed expugnatorem pudicitiae, &c.*

Exemplum secundæ notæ, comparativorum scilicet & verborum cum particula *quàm*, est ex *Cic. pro Marcello: Plus admirationis habitura, quam gloriæ*. Sed ambiguum: aut enim plus admirationis arguit minus gloriæ, & sic argumentum est à majori, aut minor gloria si magna sit, arguit maximam admirationem.

Verborum elationem significantium cum particula *quàm* exemplum hoc erit; *mendicare præstat, quàm furari*. Hic mendicare, quanquam in honestum, ut magis tamen & potius faciendum, arguit multo minus esse furandum.

Sic malo illud, scilicet quod arguit, quàm hoc, scilicet quod arguitur: ut Juvenal. satyra 8. adversus gloriosum nobilem.

*Malo pater tibi sit Thersies, dummodo tu sis
Æacidae similis, Vulcaniâq; arma capeffas,
Quàm te Therfitæ similem producat Achilles.*

Quod malit ignobilem fortem, quod tamen non est ita optandum, ex eo arguit atq; ostendit à majori sive à potiori quàm minime velit nobilem ignavum. *Cæsar: Malo modestiam in milite, quàm virtutem*. Modestia, judicio *Cæsaris*, præstantior & major, arguit virtutem sive fortitudinem in milite minus esse quàm modestia requirendam: vel potius à minori exaggerat modestiæ laudem in milite præ virtutis laude.

Sequitur majorum tractatio sine notis.

Atq; in hoc solum genere id majus est cujus probabilitas aut difficultas est major. Hic etiam Logici regulas consequentiæ tradere solent non solum negando, ut vult *Aristot. Rhet. 2. 23.* Verum etiam affirmando, pro quantitatis diversa vi & consideratione, in exemplis diversis: ejusdem enim exempli una tantum ratio est. Si majus est probabilius, duntaxat negando, in hunc modum: *quod non valet in majore, non valebit in minore*. Si majus est difficilius aut in-

incredibilius, duntaxat affirmando: quod in re
 majore valet, valet in minore, ut inquit Cic. in
 Top. Hujus exemplum est *Æneid.* 1.

*O socii (neq; enim ignari sumus ante malorum)
 O passi graviora! dabit Deus his quoq; finem.*

Si gravioribus malis dedit Deus finem, dabit
 his certè. Sic Cic. pro *Marena*: Noli tam esse
 injustus, ut cum tui fontes vel inimicis tuis pate-
 ant, nostros rivulos etiam amicis putes clausos esse
 oportere.

Ficta etiam majora idem valent in suis conse-
 quentiis vel refutandis vel probandis.

Refutandi exemplum est Terent. *Heaut.*

----- *Satrapes sibi et*

*amator, nunquam sufferre ejus sumtus queat:
 nedum tu possis. quasi diceret, finge satrapam esse.*

Et *Æneid.* 5.

*Magnanime Ænea, non si mihi Jupiter auctor
 Spondeat, hoc sperem Italiam contingere cælo:
 Mutati transversa fremunt, &c.*

*Nec nos obniti contrà, nec tendere tantum
 Jussicimus. i. e. multo nunc minus Jove non
 spondente.*

CAP. XX.

De Minoribus.

MAjus & minus inter se affecta & relata sunt : adéoque unius definitionem qui norit, norit alterius.

Ut igitur majus est cujus quantitas excedit, *ita minus est cujus quantitas exceditur*. Quantitas autem ut majoris erat in qualibet rerum elatione sive excessu, ita nunc minoris est in qualibet rerum summisione sive defectu. Sententiarum enim minor probabilitas aut difficultas locum non habet, nisi in minorum forma explicata ; quod ex majorum quoque explicata forma intelligi potest. Minus igitur est cujus quantitas exceditur à majore : argumentum itaque à minore est, cum id quod minus est, adhibetur ad arguendum id quod est majus.

Minora etiam vel brevius indicantur notis, vel plenius distinguuntur partibus. Hujus utriusque formæ vel propriæ sunt minorum notæ, vel negationes parium.

Propriæ notæ contractionis formæ sunt primum, voces comparativæ Grammaticæ, cum nomina tum verba, elationem utraq; significantia, si modò attribuantur ei quod arguitur. *Ovid. 2. de Trist. Seviore est tristi Busiride*. Hic minor sævitia *Busiridis* arguit majorem illius in quem poeta invehitur. *Prestat sapientia divitiis. Seviore & prestat* elationem significant, & notæ sunt majoris ; sed quia tribuuntur ei quod arguitur,

guitur, argumentum utrobique est à minori. Atque hoc sedulo advertendum est, ut argumentum majoris à minori dijudicare possis: majora enim & minora, contractæ præsertim formæ, easdem plerumque notas præ se ferunt; idemque exemplum utramvis in partem vel à majori vel à minori arguere potest: ut, *seviore tristis Busiride*. Hoc si ad sævitiam cujusvis exaggerandam dicatur, ut hoc loco, à minori est: si ad *Busiridis* extenuandam, à majori. Si igitur illa quæ elationem significant, referantur ad id quod arguitur, sunt illa quidem notæ majoris, argumentum autem est à minori; quoniam majus, cujus illa notæ sunt, est id quod arguitur: si illa quæ summissionem significant, referuntur ad id quod arguitur, sunt illa quidem notæ minoris, sed argumentum est à majori; quoniam id quod arguitur, minus est.

Secundò, comparationes Grammaticæ verbæque summissionem significantia, ut minor, inferior, &c. Posthabeo, postpono, cedo, vincor, superor, &c. Si modò ad id quod arguit, referatur: ut *cedant arma togæ*. Hic togæ dignitas arguitur à minori armorum dignitate, quæ cedit.

Atque hæ sunt notæ affirmantes contractæ formæ: quibus annumerandæ sunt etiam istæ formulæ, quæ fiunt negatione parium. *Philip. 9. Omnes ex omni ætate, qui in hac civitate intelligentiam juris habuerunt, si unum in locum conferantur, cum S. Sulpitio non sunt conferendi. i. e. non æquandi, quæ nota parium fuit. Hactenus contracta forma.*

Explicata forma vel cum notis est, vel sine notis. Propriæ notæ sunt primò, non modò non, sed

sed ne. Cic. 2 Catil. Nemo non modò Romæ, sed ne ullo in angulo totius Italiæ oppressus ære alieno fuit, quem non ad hoc incredibile sceleris fœdus asciverit. Hic posterior nota sed ne, est propositionis, & nota minoris; arguitq; non modò non, quæ redditionis est, & nota majoris, quod arguitur. Ne ullo in angulo Italiæ non fecit, quod minus utile sibi erat, non modò non igitur vel multo magis Romæ fecit, quod majus erat, vel sibi magis utile. Pro Fonteio: Non modò nulum facinus hujus portulerunt, sed ne dictum quidem aliquod reprehenderunt. Ne minus quidem fecerunt ut dictum aliquod reprehenderent, quæ propositio est & arguit non modò non majus i. e. ergo non majus, ut facinus aliquod proferrent, quæ redditio est, & arguitur.

Verùm in hujus notæ exemplis propositionis nota sed ne, aliquando omittitur. Ad Lent. Nullum meum minimum dictum, non modò factum pro Cesare intercessit. i. e. nullum non modò factum, sed ne dictum quidem. Huic notæ affinis est illa formula, tantum abest ab hoc, ut ne illud quidem. Pro Marcello: Tantum abes à perfectione maximorum operum, ut fundamenta, quæ cogitas, nondum jeceris. Ne hoc quidem fecisti quod minus est, abes ergo longe ab illo quod est majus.

Secundæ notæ sunt comparationes Grammaticæ & verba quædam cum particula quàm quæ vel elationem significant, ut potius hoc quàm illud, malo hoc quàm illud, vel summisionem, ut minor, inferior, ita ut quàm utrobique referatur ad id quod arguitur. Catil. 1. ut exul potius tentare, quàm consul vexare remp. possis. Quod potius erat Ciceroni ut exul tentaret remp. quàm consul vexaret, illud

illud ut minus malum arguit hoc esse majus. Hic comparatio Grammatica potius, ad id quod arguit, refertur, nempe ad minus malum; particula *quàm* ad id refertur quod arguitur, nempe ad majus malum. Sic maluit Metellus de repub. *quàm* de sententia sua dimoveri. Hic maluit, verbum elationis, refertur ad id quod arguit, nempe ad minus malum, judicio Metelli, de rep. dimoveri; particula *quàm* ad id refertur quod majus malum arguitur, dimoveri de sententia. Sic in iis notis quæ summisionem significant, particula *quàm* refertur semper ad majus quod arguitur, non secus atq; in iis quæ significant elationem: ut, *minus est accipere, quàm dare. inferior est Cæsar quàm Scipio.*

His notis affinis est *antequam*, i. e. potius quam. Pro Milone: *utinam Clodius dictator, esset, antequam hoc spectaculum viderem.*

Tertia nota est *cum tum*: I Agr. *cum omnib. est difficilis & magna ratio, tum verò mihi præter cæteros.*

Sequuntur negationes parium in hac forma explicata. *Non tam, quàm. Catil. 2. Quamquam illi qui Catilinam Massiliam ire distitant, non tam hæc queruntur, quàm verentur. Sic non tot, quot: pro Murena; Quod enim fretum, quem Euripum tot motus, tantas, tam varias habere putatis agitationes fluctuum; quantas perturbationes & quantos æstus habet ratio comitiorum? In hoc exemplo interrogatio fortius negat paria.*

Nunc ad exempla formæ sine notis explicatæ veniamus. *Cic. Off. 1. Ergo histrio hoc videbit in scena, non videbit sapiens in vita. Atq; hinc etiam consequentiæ ducuntur non solum affir-*

mando & probando, ut vult *Arist.* Rhet. 2. 23. & *Cic.* in *Top.* sed etiam negando & refutando: Si quidem hoc de exemplo non eodem intelligitur: fin de eodem, tum quidem vel solum affirmando, vel solum negando rectè proceditur. Affirmandi exemplum est *Ovid.* 1. de *Remed.*

ut corpus redimas ferrum patieris & ignes, &c.
ut valeas animo quicquam tolerare negabis?

Si corporis causa, multo magis animi quidvis tolerabis; animus enim dignior. Item pro *Archia*: *Bestie sepe immanes cantu fleuntur: nos non poetarum voce moveamur?* Sic illud *Mat.* 6. 26. *Passeres curat Deus: multo magis ergo homines.* At negando, nulla ex his consequentia deducitur: non ergo sequitur, si corporis causa quicquam non tolerabis ergo nec animi; & sic de cæteris. Rectè igitur, si hoc modo intelligitur *Aristoteles*, à minore ad majus affirmando solum proceditur. Verùm exempla non defunt, in quib. à minore arguitur etiam solum negando: cujusmodi est illud suprà citatum, pro *Marcello*; *fundamenta nondum jecisti, certè ergo non perfecisti.* Nec tamen idem affirmando; *fundamenta jecisti; ergo perfecisti.* Hic modò cavendum est, ne ponatur negatio quæ affirmationi æquipolleat: ut, *Deus non negligit passeres,* idem est quod *curat.* Sic enim utriusq; consequentiæ idem exemplum prout sententia eadem vel affirmando vel negando variatur, dari posset: ut, si *fures plectendi, multo magis sacrilegi.* Si *furib. non parcendum, multo minus sacrilegis.* Hic plectere & non parcere idem est; & minus fit

nota

nota majoris : non igitur notæ, sed rerum elatio vel summissio majus vel minus efficit. Atq; hæc de consequentiis minorum sine notis.

Verùm eadem consequentiæ ducuntur ab explicata forma, quæ etiam cum notis est, ut ex iis exemplis quæ suprà ponuntur, intelligas licet. In hac forma explicata sine notis est ubi occurrit minorum quædam gradatio : ut *Ver. 7. Facinus est vincere civem Romanum ; scelus verberare ; propè parricidium necare : quid dicam in crucem tollere ?*

*Finguntur etiam minora : Virgil. Ecl. 1.
Antè leves ergo pascentur in æthere cervi, &c.
Quàm nostro illius labitur pectore vultus.*

Philip. 2. Si inter cœnam in tuis immanibus illis poculis hoc tibi accidisset, quis non turpe duceret ? In cœtu verò populi R. negotium publicum, gerens, magister equitum, &c.

CAP. XXI.

De Similibus.

HAtenus comparatio in quantitate fuit. Sequitur comparatio in qualitate, quæ res comparatæ quales dicuntur.

Qualitas enim Logica non solum est habitus, aut dispositio, aut potentia, vel impotentia naturalis, aut deniq; figura aut forma exterior, quæ *Aristot.* species qualitatis sunt, & in aliis artibus tractandæ, sed est affectio qualibet sive ra-

tio, quâ res inter se comparatæ quales, nempe similes aut dissimiles dicuntur. Nulla autem res est, quæ si alteri qualitate conferatur, non sit ei similis vel dissimilis.

Similia sunt quorum eadem est qualitas.

Sic etiam definit *Aristoteles*, Phil. 8. 15. & *Boëthius*, l. 2. in *Cic. Top. similitudo*, inquit, est unitas qualitatis. Argumentum igitur similitudinis est, quando simile explicatur à simili. Magna quidem est affinitas parium cum similibus; verum ut ex definitionibus eorum perspicere licet, in hoc maximè differunt, quòd paria non admittunt elationem aut summisionem, similia admittunt: possunt enim etiam simillima majora esse vel minora; quod paria non possunt.

Similitudo proportio dicitur, Græcè ferè *analogia*; & similia proportionalia, Græcè *analogia*. Proportio autem nihil aliud est quàm duarum rationum similitudo: ratio autem est duorum inter se terminorum sive rerum collatio. * Monendum autem est similia sive contractæ formæ sive explicatæ urgenda non esse ultra eam qualitatem quam in utrisq; eandem esse propositum assimilanti erat ostendere: sic magistratus assimilatur cani, sola nimirum fidelitate custodiæ: unde illa in scholis, *nullum simile est idem, simile non currit quatuor pedibus, omne simile claudicat*.

Similia nunc notis brevius indicantur, nunc partibus plenius distinguuntur; hoc enim comparatis omnibus commune est. Notæ similitudinis contractæ quæ uno verbo concluditur, sunt vel similibus propriæ vel dissimilibus negationes.

Pro-

Propriæ similitum sunt vel nomina, ut *similis*, *effigies*, *imago*, *more*, *ritu*, *instar*, *in modum*; vel adverbia, *tanquam*, *veluti*, *quasi*, *sicuti*; vel verba, *imitari*, *referre*, &c. I *Aneid.* Os *humerosq;* Deo *similis*. Philip. 9. *Quanquam* nullum monumentum *clarius* *Servius Sulpitius* relinquerere potuit, *quàm* *effigiem* *morum suorum*, *virtutis*, *constantie*, *pietatis*, *ingenii*, *filium*. I *Trist.*

Namq; ea vel nemo, vel qui mihi vulnera fecit,
Solus Achilleo tollere more potest.

In Pis. *Unus ille dies mihi quidem instar immortalitatis fuit, quo in patriam redii.* Verr. I. *Sed repente è vestigio ex homine, tanquam aliquo poculo Circæo, factus est Verres.* Pro lege Manil. *Itaq;* omnes quidem nunc in his locis *En. Pompeium*, sicut aliquem, non ex hac urbe missum, sed de cælo delapsum intuentur. Negationes dissimilium sunt, haud secus, non aliter, non absimilis, &c. *Aneid.* 3. *Haud secus ac iussi faciunt.* Terent. in Phor. *Ego isti nihilo sum aliter, ac fui.*

Ad contractam similitudinis formam pertinet etiam metaphora: metaphora enim, ut docent Rhetores, est ad unum verbum contracta similitudo sine notis quidem, quæ tamen intelliguntur. Pro Sest. *Cujus ego patrem Deum atq;* parentem statuo fortune nominisq; mei. i. e. tanquam Deum.

Similitudinis partes deinceps explicantur, & quidem disjunctè vel continuè.

Similitudo disjuncta est, quando termini sive res quatuor reipsa distinguuntur. i. e. quando

duo termini five res distinctæ in propositione comparantur duobus terminis five rebus distinctis in redditione. Occurrit autem hæc forma & cum notis & sine notis. Notæ sunt, *qualis, talis*; illa propositionis, hæc redditionis nota est. Item *quemadmodum, ut, sicut*, propositionis; quibus respondent, *Sic, eodem modo, similiter*, redditionis. *Ecl. 5.*

*Tale tuum carmen nobis, divine poëta,
Quale sopor fessis in gramine.*

Carmen ad auditorem, ut sopor ad fessum, termini quatuor distincti sunt. *Ad Frat. I. Quemadmodum gubernatores optimi vim tempestatis, sic sapientissimi viri fortunæ impetum persepe superare non possunt. Hic quatuor sunt item termini, ut gubernator ad tempestatem, sic sapiens ad fortunam. I Trist.*

*Scilicet ut fulvum spectatur in ignib. aurum,
Tempore sic duro est inspicienda fides.*

Cicero 2 Phil. Sed nimirum ut quidam morbo & sensus stupore suavitatem cibi non sentiunt; sic libidinosi, avari, facinorosi, vere laudis gustum non habent. In vita Virgil.

*Hos ego versiculos feci, tulit alter honores :
Sic vos non vobis nidificatis aves :
Sic vos non vobis mellificatis apes : &c.*

In hoc exemplo redditio fine nota præcedit. Particula autem *Sic* quæ nota solet esse redditionis hic propositioni attribuitur.

Ali.

*Aliquando nulla prorsus est nota. Virgilius
Ecloga 2.*

*O formose puer nimium ne crede colori,
Alba ligustra cadunt, vaccinia nigra leguntur.*

Continua similitudo est, quando est ut primus terminus ad secundum, ita secundus ad tertium. Leg. 3. ut magistratibus leges, ita populo præsunt magistratus. Hic termini sunt tres; lex, magistratus, populus. Sed medius bis adhibetur, & in omni proportionem continua continuatur; estq; posterior terminus propositionis, prior redditionis. In omni enim proportionem termini esse debent ad minimum quatuor. Ordo hujus sic est: ut leges magistratibus, ita magistratus populo præsunt.

Quamquam autem similia magis ad illustrandum quam ad probandum accommodata sunt, & Plato in Phædone, Ego, inquit, sermones qui ex similibus demonstrationes sumunt, probè novi ad ostentationem comparatos esse; & nisi quis caveat ab iis, facile imponunt, quod ad regulas tamen consequentiarum attinet, ex definitione similium perspicitur, similia similem esse rationem; valere igitur similia in utramq; partem. Unde Aristot. Top. 24. Quod in aliquo simili valet, in aliis quoq; similibus valebit; & quod non in aliquo, nec in cæteris.

Quoniam autem similitudo non solum est propositionis & redditionis, sed terminorum etiam inter se, Idcirco si quædam similia sunt, inversè quoq; similia erunt, & alternè. Et inversè quidem duobus modis; inversione scilicet vel propositionis & redditionis, quæ aliorum compara-

torum communis est; vel terminorum, quæ videtur similium propria. Exempli gratia; ut gubernator ad tempestatem, sic sapiens ad fortunam: inversè ergo; ut sapiens ad fortunam, sic gubernator ad tempestatem. Hæc propositionis & redditionis inversio est. Rursus, ut tempestas ad gubernatorem, sic fortuna ad sapientem: hæc inversio est terminorum. Alternatio est quando antecedens propositionis antecedenti redditionis & consequens consequenti comparatur. Regula ergo hîc est; si quædam similia fuerint, alternè similia erunt. Ut gubernator ad tempestatem, sic sapiens ad fortunam: ergo, alternè; ut gubernator ad sapientem, sic tempestas ad fortunam. Inversionum hujusmodi & alternationum in Mathematicis proportionibus usus maximus est: sed proportio non Mathematica solum verum etiam Logica est, ut supradiximus, rerum omnium communis; ejus ergo regulæ non erant hîc omittendæ.

Ficta similitudo parem vim habet superioribus illis, sed præcipuè in hac explicata similitudine Æsopici apologi excellunt.

Horat. I. Epist.

*Quod si me populus Romanus fortè roget, cur
non ut porciùcibus, Sic judiciis fruar iisdem,
nec sequar aut fugiam quæ diligit ipse vel odit?
Olim quod vulpes ægroto cauta leoni
respondit, referam; quia me vestigia terrent
omnia te adversum spectantia, nulla retrorsum.*

Huc etiam refertur parabola Socratica vulgò dicta; quæ est inductio similium interrogationib.
ferè

ferè constans. Illa autem, inquit Fabius, hanc habuit vim; ut cum plura interrogasset Socrates, que fateri adversario necesse esset, novissime id, de quo querebatur inferret, cui simile adversarius concessisset. Vide pag. 76. ad *

C A P. XXII.

De Similibus.

HAtenus similia, quorum qualitas est eadem. Dissimilia sunt comparata, quorum qualitas est diversa.

Contrariorum enim eadem scientia est. Et Cic. in Top. ejusdem est, inquit, dissimile & simile invenire. In hoc differunt dissimilia à diversis, quod dissimilitudo fit differentia comparata, & non idem, eodem saltem tempore, sed diversis plerumq; subjectis attribuitur. Itaq; diversorum uno negato, alterum affirmatur; dissimilia sive diversa sive opposita, simul affirmari aut negari possunt. Diversa autem qualitas est non eadem; sive diversa sit sive opposita: quasi dicas dissimilium dissimilis est ratio. Argumentum igitur dissimilitudinis est, quando dissimile arguitur à dissimili.

Contractæ dissimilitudinis notæ sunt dissimile, dispar, differens, aliud, secus: Pro Plans. Dissimilis est debitio pecuniæ & gratiæ. Ennius: O domus antiqua, heu quàm dispari dominare domino. dispar autem est non impar, sed dissimilis. Caesar 1. bell. Gal. Hi omnes linguâ, institutis, legibus inter se differunt. 2 Agrar. Alio vultu, alio

vocis sono, alio incessu esse meditabatur. Cic. 2. Nat. Quoniam cepti secus agere, atq; initio dixeram.

Dissemblitudinis notæ etiam sunt per negationem similium, ut non similis, non talis, non idem, non tanquam, &c. 3 de Orat. Non est Philosophia similis artium reliquarum. 2 Æneid.

*At non ille, satum quo te mentiris, Achilles,
talis in hoste fuit Priamo.----*

Horat. 1. Epist. Non eadem est ætas, non mens.
1. ad Frat. Sit annulus tuus, non tanquam vas aliquod, sed tanquam ipse tu. Hoc argumento pastor ille errorem suum confitetur Eclog. 1.

*urbem, (quam dicunt Romam) Melibæe, putavi,
stultus ego huic nostræ similem. -----*

Et mox,

*Sic canibus catulos similes, sic matrib. hædos
noram, sic parvis componere magna solebam.*

Ut nec canibus catuli, nec matribus hædi, sic nec Mantua Romæ similis est. In hoc exemplo erroris confessio pro negatione similium est.

Explicata dissimilitudo itidem cum notis est vel sine notis. Notæ sunt hic, etiam negationes similium. 3. Philip. Certus dies non ut sacrificii sic consilii expectari solet.

Nota plerumq; nulla est, cum dissimilitudo plenius explicatur.

Quintil. 1. 5. c. 11. Brutus occidit liberos proditionem molientes. Manlius virtutem filii morte multa-

multavit. Catullus.

*Soles occidere & redire possunt :
Nobis cùm semel occidit brevis lux,
Nox est perpetua una dormienda.*

Diffimilitudo est diei & vitæ nostræ. Redditio est vitam semel amissam non restitui. Illustratur à dissimili, quæ propositio est, soles occidere & redire possunt.

C A P. XXIII.

De Conjugatis.

HAtenus prima argumenta sunt exposita : quorum tria genera fuere ; consentanea, dissentanea & comparata.

Sequuntur orta de primis ; quæ ad id quod arguunt perinde sunt ut prima unde oriuntur : ut conjugata & notatio, distributio & definitio.

In se itaq; habent vim arguendi ut argumenta artificialia, & eandem quidem cum iis unde oriuntur : non autem à se, quia non prima, ut in capite secundo jam dictum est. Definitionem autem vix aliam requirunt præter ipsum nomen quod naturam eorum satis per se explicat : unde illud consecrarium, *Orta argumenta perinde esse ad id quod arguunt, ut sunt prima unde oriuntur.*

Qua-

Quatuor hæ species ortonum, in duo genera, anonyma licet, distinguuntur, cum propter dichotomiæ studium, tum quia conjugata & notatio sub eodem genere continentur, propter illam quæ inter ea intercedit communionem. *Cicero* itaq; in *Top.* locum ex conjugatis notationi finitimum esse dixit. Et in multis exemplis conjugata à notatione & nomine nihil aut parum differunt. Communio autem illa duplex est : primò quòd sunt argumenta nominalia sive à nomine petita. Sed in hoc differunt, ut etiam tradit *Boet. l. 4. in Top. Cic.* quod notatio expositione nominis, conjugatio similitudine vocabuli ac derivatione perficitur. Neq; idcirco ad Grammaticam pertinent : ex vi enim nominum argumenta petere, Logici est, non Grammatici. Secunda communio est, quòd sunt orta simplicia : neq; enim ex pluribus primis simul conjunctis, & ex uno aliquo argumento primo singula eorum exempla oriuntur, nisi in nominibus compositis : compositorum enim nominum composita interdum ex pluribus argumentis notatio est. Distributio autem & definitio sunt argumenta realia, i. e. in rerum explicatione versari solent, & composita, i. e. ex pluribus argumentis primis simul conjunctis originem suam trahunt. Si ergo ortonum genera, quæ anonyma esse diximus, nominibus distinguere lubet, orta erunt vel nominalia & simplicia, ut conjugata & notatio, vel realia & composita, ut distributio & definitio : nisi hoc fortè excipiamus, quod definitio ex uno primo, i. e. ex sola forma nonnunquam constare potest. Ex his autem duobus generibus prius tractandum est illud cui conjugata & notatio subjiciuntur, quia ferè simplicius est.

Atq;

Atq; in hoc genere conjugata priorem sibi locum vendicant, quod ex solis consentaneis oriantur, cum notatio ex quovis argumento primo petatur. *Fabius l. 5. c. 10.* Conjugata nihili facit: *Aristoteles* autem & *Cicero* in *Topicis suis* aliter sentiunt: quorum ille, *l. 3. c. 4.* & *l. 7. c. 2.* locos ex dissentaneis, conjugatis & casibus plurimum ait valere; & ad plurima esse utiles.

Conjugata sunt nomina ab eodem principio variè deducta. ut iustitia, iustus, iuste. *Aristoteles* & *Cicero* conjugata, ille, nomina ejusdem conjugationis; hic, ejusdem generis esse definiunt: sed neq; ille quasi jugum ipsum conjugatorum, neq; hic genus, neq; noster principium ipsum sive originem & thema conjugatorum numero excludit. Conjugata autem sunt omnia non solum nomina tam substantiva quam adjectiva, sed etiam verba, & quæ *Aristoteles casus* vocat, adverbia, cum paronuma, i. e. derivata, tum ipsa themata, servatis tamen istis conditionibus. 1. Si ut idem sonant, sic idem etiam significant. 2. Si in eadem significationis ratione sumantur. Nam si unum significat potentiam sive facultatem aut habitum, alterum verò actum & ex potentia sive habitu arguatur actus aut contra, captio est: 3. Si in iis symbolum sit consentaneorum argumentorum, i. e. si à consentaneis orta sunt: quorum vim & affectionem in arguendo aliis nominibus iisque conjugatis referant: quorum etiam ad inventionem nominalis hujusce conjugationis indicio ducamur: unde elucet non contemnendus hujus loci usus, præsertim in definitionibus.

Sequuntur exempla ; ut justitia, justus, justè. Cujusmodi in exemplis observandum est, abstractum quod vocant, causam esse concreti, & concretum adverbii. Ut justitia est causa, cur aliquis fit justus : & quia justus est, idcirco justè agit. Quod tamen non est ubiq; verum : sanum enim, i. e. quod efficit aut conservat sanitatem, causa est sanitatis, concretum scilicet abstracti, ut notat *Aristot. top. 2. 3. Propert. lib 2.*

*Libertas quoniam nulli jam restat amanti,
Nullus liber erit, si quis amare velit.*

Hic libertas quæ causa est cur sis liber, quia non restat, ergo nullus, &c. *Cicero 3. de Nat. deor. cum de Dionysio tyranno loquitur : Jam mensas argenteas de omnibus delubris jussit auferri, in quibus quod more veteris Græciæ inscriptum esset bonorum deorum, uti eorum bonitate velle se dicebat : dii boni sunt : eorum igitur bonitate est utendum. Hic ex effectis ad causas est disputatum ; ut vult Ramus : ut mihi quidem videtur à causis ad affecta. Terent. Homo sum, humani à me nihil alienum puto. Ex subjecto est ad adjunctum. In Pison. Cum esset omnis illa causa consularis & senatoria, auxilio mihi opus fuerat & consulis & senatus. Ex adjunctis est ad subjectum. Phil. 2. Non tractabo ut consulem, ne ille quidem me ut consularem. Ex effecto est ad causam : nam esse consulem, causa est ut quis postea fit consularis : unde sic arguitur : non agnoscit is in me effectum, non agnoscam ergo in eo causam. Notandum est nonnulla sensu duntaxat, non sono esse conjugata : ut, somnus, dormiens ; morbus, eger.*

C A P. XXIV.

De Notatione.

Notatio est nominis interpretatio. i. e. reddita ratio cur quidvis ita nominatum sit. Definitio autem hæc est Boëthi, l. 1. in Cic. Top. Notatio inquit Cic. in Top. Grecis etymologia dicitur, i. e. verbum ex verbo veroliquium: nos autem novitatem verbi non satis apti fugientes, genus hoc notationem appellamus, quia sunt verba rerum notæ. Hæc ille. Ex iis igitur quæ supradicta sunt, intelligi potest, notationem esse argumentum ortum adeoq; symbolum alicujus primi; esse nominale, i. e. ut Cicero loquitur, argumentum ex vi nominis elicatum.

Quippe nomina sunt notæ rerum & cujuslibet nominis vel derivati vel compositi, siquidem notatione vera nomen inditum fuit, ratio reddi potest ex aliquo argumento primo.

ut homo ab humo. Hæc à materia est notatio. Sed linguæ, cum prima illa quam Adamus in Edene, tum illæ variæ atq; à prima fortassis ortæ, quas conditores turris Babelicæ subito acceperunt, divinitus procludubio datæ sunt; unde vocum primitivarum ratio si ignoretur, mirum non est: quæ autem voces derivatæ sunt aut compositæ, vel earum origines ex aliis linguis antiquis jamq; obsoletis petendæ sunt, vel ipsæ

ipsæ vetustate aut infimæ plebis inquinata fere pronuntiatione ita immutata, mendosè etiam scribendi consuetudine ita quasi obliterated, ut vera vocum notatio raro admodum teneatur. Unde argumentum à notatione, nisi ea fortè manifestissima sit, fallax admodum & sæpe ludicrum est.

Nunc reliqua exempla videamus. *Ovid. 6 Fast.*

Stat vi terra sua ; vi stando Vesta vocatur.

Terra dicitur *Vesta* ab effecto suo naturali, propterea quod vi sua stat.

At locus à flammis & quod fovet omnia dictus. Ex effectis est notatio. Item Verr. 4. O Verrea præclara ! Quò enim accessisti, quo non attuleris tecum istum diem ? Etenim quam tu domum, quam urbem adiisti, quod fanum denique, quod non eversum atq; extersum reliqueris ? Quare appellantur sanè ista Verrea, quæ non ex nomine, sed ex moribus naturaq; tua constituta esse videantur. Ex effectis item est notatio. Ovid. 1. Fast.

Prima dies tibi, Carna, datur, dea cardinis hæc est, numine clausa aperit, claudit aperta suo.

Notatio hæc è subiecto est, cardine scilicet, in quo versando dea illa exercebatur. Hinc illa cavillatio in *Antonium* generum : *Tuæ conjugis, bonæ fæminæ, locupletis quidem certè, Bambalio quidam pater, homo nullo numero, nihil illo contemptius ; qui propter hæsitantiam lingue stuporémq; cordis, cognomen ex contumelia traxerit. Ex adjunctis est notatio hæc Bambalionis, quia*
balbus

balbus & stupidus. E dissentaneis autem sunt illa apud *Quintil. l. i. c. 6. Lucus, quia umbra opacus, parum luceat: & ludus, quia sit longissimè à lusu: & Dis, quia minimè dives. Est etiam è comparatis notatio pyropi, quòd ignis quondam speciem præbeat.*

Atq; hætenus de notatione: nunc aliquid de nomine adjiciendum est. *Est enim ut notationi ad-suum nomen, sic nomini ad notationem sua affectio.* Hoc est, ut notatio arguit nomen, sic nomen vicissim arguit notationem. Ut animi plenus, ergo animosus, & contrà, animosus, ergo animi plenus. Nam & nomen quoq; ortum argumentum est; ex quo autem fonte oriatur, notatio declarat. Hæc autem appendicula de nomine idcirco est adjecta, quia cum alia argumenta inter se affecta, quot quidem eodem nomine ac definitione non sunt comprehensâ, sua seorsum capita sibi habuerint, & tantillum esset quod de nomine dicendum erat, non videbatur caput novum ob id esse instituendum. In hoc igitur capite duo loci inventionis continentur, notationis & nominis: inter quos si comparatio fiat, potior videtur nominis. Unde tota hæc categoria ab *Aristotele locus à nomine* dicitur. Sæpiusq; & firmitus à nomine quàm à notatione argumentum ducitur: ut homo est, ergo ex humo; focus est, ergo foveat. At non eadem vi argumentum à notatione deducitur; ex humo est, homo igitur; foveat omnia, ergo focus est.

C A P. XXV.

De Distributione.

Reliquum est ex ortis aliunde argumentis argumentum distributionis & definitionis.

In qua utraq; affectio reciprocationis est, illic partium omnium cum toto, hic definitionis cum definito.

Reciprocatio autem hoc loco est qua prorsus idem, eadēmq;, ut ita dicam essentia utrinq; significatur: nam partes omnes simul sumptæ, i. e. rite compositæ, idem sunt quod totum, & definitio idem quod definitum; quod de nullo præterea genere argumentorum dici potest. Unde nascitur hæc regula utriq; huic argumento communis, ut in distributione ac definitione *nequid desit, nequid redundet*: nam ubi reciprocatio, ibi quoq; æqualitas requiritur. Hinc eximia illa distributionis & definitionis laus effluit; ex iis nempe artium institutiones maxima ex parte constare. Cùm n. omnia artium præcepta constare debeant ex argumentis reciprocis, reciprocatio autem nusquam alibi reperitur nisi inter formam (quæ ipsa in definitionibus comprehenditur solet) & formatum, inter subjectum & proprium adjunctum; hinc factum est ut præcepta omnia vel definitiones sint vel distributiones vel regulæ quædam sive consecraria,

ria, quæ proprietatum explicationes dicuntur.

Distributio est, cum totum in partes distribuitur.

Totum est, quod continet partes.

Pars est, quæ continetur à toto.

Totum Logicè & generaliter dicitur, quicquid quocunq; modo distribuitur & partes continet : pars, quæ quocunq; modo continetur à toto.

Atque ut distinctio totius in partes, distributio ; sic collectio partium ad constituendum totum, inductio dicitur.

Inter hanc autem inductionem & distributionem nullum aliud discrimen est, nisi quod distributio à toto ad partes, hæc verò à partibus ad totum progreditur. Quamobrem, ut supra, nomen ad notationem, ita hic inductio ad distributionem referenda est ; non ad syllogismos, ut pleriq; volunt ; cum non alio modo ab inductione argumentemur atq; à distributione : siquidem eadem est via *Thebis Athenas* quæ *Athenis Thebas* Inductionis autem auctorem *Aristoteles* agnoscit *Socratem* : ejusq; necessitatem tantam esse testatur, ut cum scientia universalium sit, universalia cognoscere nequeamus nisi per inductionem. Inductionis ergo ope præcepta artium inventa sunt ; ut in præmio monuimus.

Distributio sumitur ex argumentis totidem consentaneis, inter se autem dissentaneis.

Sed

Sed dissensio illa non est distributionis dissensio (nunquam n. dissentaneum in dissentaneum distribuitur) sed partium distributarum.

Itaq; tanto accuratior erit distributio, quanto partium & cum toto consensio & inter se dissensio major fuerit.

Hinc efficitur, eam distributionem accuratissimam esse, quæ in duas partes fit; eaq; *dichotomia* dicitur: dissensio enim inter duo maxima est; & contrariorum unum uni tantum opponitur. *Platonis* itaq; regula est: oportet in quam proximum fieri potest numerum semper dividere. Quod si *dichotomiam* invenire non queamus, difficile n. est eam semper invenire, species bibinas ponere interdum præstat, quasi sub duobus generibus, licet anonymis, quàm quatuor sub uno. Hæc n. distributionis forma, licet non sit optima, est tamen optimæ proxima. Hac ratione suprâ cap. 3. *Ramus* divisit causas, in duogenera anonyma nempe *efficientem & materiam, aut formam & finem*. Eff. Ubi autem *dichotomia* nullo modo commodè adhiberi potest, multis prosinus differentiis res dividenda est, ut *Aristoteles* monet. Neq; enim propter *dichotomiam* studium distributio vel mutilanda vel implicanda aut confundenda est.

C A P. XXVI.

De Distributione ex causis.

Distributio prima est ex absolutè consentaneis, causis nempe & effectis. Distributio ex causis est, quando partes sunt causæ totius.

Hic distributio integri in sua membra præcipuè laudatur.

Integrum est totum, cui partes sunt essentielles. i. e. quod ex partibus totam suam essentiam complectentibus constituitur; ideòq; symbolum est effecti ex materia per formam existentis.

Membrum est pars integri.

Nimirum integro suo essentialis. Sive ut Aristot. Phil. 8. 15. *Membra sunt ex quibus integrum componitur.* Et membra quidem symbola sunt causarum essentialium, materiæ nimirum & formæ, in quibus tota integri essentia consistit: singula n. membra materiam continent; cuncta simul, ipsam quoque formam. Sic Grammatica in etymologiam & syntaxin: Rhetorica in elocutionem & actionem; Logica in inventionem & dispositionem argumentorum dividitur. Ab his n. partib. artes illæ constituuntur; non tanquam ex causis, sed tanquam ex causarum symbolis. Cum enim essentia Dialecticæ partim communis sit materia scilicet, i. e. præcepta, & forma etiam,
nempe,

nempe methodica illorum præceptorum dispositio; partim propria, quæ in bene differendo posita est, tota hæc Dialecticæ essentia in inventione & dispositione comprehenditur. Nec tamen partes istæ sunt ipsa materia, i. e. præcepta, nec ipsa forma communis, i. e. methodica præceptorum dispositio, nec propria, i. e. ipsa facultate differendi; sed ex præceptis methodicè dispositis conflatae sunt, & ipsa facultas differendi inventionis & dispositionis finibus continetur.

Quæ sequuntur apud authorem nostrum exempla duo, alterum ex *Virgilio*, *Georg. I.* Alterum ex *Cicerone* pro *Muræna*, objectis utraq; distinguuntur, non causis; idèoq; ad cap. 28. ad distributionem nempe è subjectis, ad quam etiam præmissa illa annotatio de usu pertinet.

Quinetiam aliter tractatur hoc argumenti genus, vel à partibus ad totum, vel à toto ad partes.

Hac de re *Aristoteles*, *Top. 6. 6.* Regulas quasdam tradit. Primo à partibus: *affirmatis partibus cunctis, affirmatur totum: & contrà; sublati partibus cunctis, tolli totum.* Item ab una parte: *una parte sublata, totum tolli.* Secundo à toto ad partes: *toto affirmato, affirmantur partes.* Verùm hæc omnia ex illa reciprocationis regula superioris capitis initio tradita satis intelliguntur. Nam quæ reciprocantur, eorum alterum ex altero vicissim & necessariò affirmatè & negatè concluditur. Hoc verò, ut *Aristoteles* etiam notavit, non sequitur; sublato integro, partes tolluntur.

Utriusq; generis (nempe affirmationis & negationis à partibus ad totum) exemplum habemus apud *Catullum*.

Quintia formosa est multis : mihi candida, longa, recta est : hæc ego sic singula confiteor :

Totum illud, formosa, nego. Nam nulla venustas, nulla in tam magno est corpore mica salis.

Lesbia formosa est : quæ cum pulcherrima tota est, tum omnibus una omnes surripuit veneres.

Est & alia distributio ex causis & meritò quidem imperfectior dicta, cum non tam ipsius rei quàm ejus causarum distributio sit : ut ab efficiente, testimonium est divinum vel humanum. Sic statuæ veteres aliæ factæ erant à *Phydia*, aliæ à *Polycleto*, &c. Distributio hæc quædam est totius in partes ; ubi tamen non tam partes ipsæ ponuntur quàm pro iis earum efficientis, quibus inter se distinguuntur. Sic statuæ aliæ erant aureæ, aliæ argenteæ, aliæ æneæ, aliæ eburneæ, &c. Distributio est ex materia. Aliæ ad hominum, aliæ ad brutorum effigiem factæ ; est distributio à forma externa. Aliæ factæ sunt ad usum religiosum, aliæ ad civilem ; est distributio à fine.

CAP. XXVII.

*De Distributione ex effectis, ubi de
genere & specie.*

D*istributio ex effectis est, quando partes
sunt effecta.*

Distributio generis in species hic excellit.

Nonnulli ex Cicerone distributionem integri in membra, *partitionem* vocant; generis in species *divisionem*. Nec de nihilo sanè: membra enim copulari, species disjungi solent.

Genus est totum partibus Essentiale.

In quo contrarium est integro: illic enim tota partes, hic totum partibus est *essentiale*: unde constat, illam ex causis, hanc ex effectis distributionem rectè dici. *Genus* autem est totum partibus *essentiale*, quia illam *essentiam* nempe materiam & formam, quæ speciebus omnibus æquè communis est, significatione sua complectitur: vel brevius, quia symbolum est communis *essentia*. Neq; enim genus propriè *essentiam* speciebus communicat (cùm in se extra species revera nihil sit) sed earum duntaxat *essentiam* significet, Quod enim *essentiale* est & speciebus omnibus commune, ejus notio *genus* dicitur, Et idæa sæpe à Græcis, non separata quidem à rebus illa, ut velunt *Platonica*, quæ nugæ sunt, teste *Aristot. Phil. I. 7. & v. 5.* Sed quod cogitatione
&

& ratione unum & idem est speciebus multis commune in quibus re & natura est singulatim, ut Plato in Menone. Stoici etiam Idæas, ut refert Plut. de Placit. 1. 10, nostras notiones esse dixerunt.

Species est pars generis.

Sic etiam Aristoteles, Phil. 8. 25. Et Cicero; Invent. 1. Pars quæ generi subest. Ex definitione autem generis intelligimus speciem ejusmodi partem esse cujus essentia communis in generis significatione contineatur. Propriam autem essentiam species, per quam est id quod est, à propria forma habet, quæ generis significatione minime continetur. Sic etiam Aristot. Phil. 2. 12. Genus non videtur particeps esse differentiarum: simul n. contrariorum idem particeps esset; differentie n. contrarie sunt. Unde illud; Plus est in specie quàm in genere: & illud Porphyrii; differentia est qua species superat genus. Tota igitur generis essentia singulis æqualiter inest speciebus; at tota essentia speciei non est in genere, nisi potentia, ut inquit Porphyrius. Hinc ut species est pars generis, ita genus pars esse speciei quodammodo videtur: quod & Plato in Politico notavit. Sic animal genus hominis & bestię dicimus. Animal enim est totum, cujus essentia, nempe corporea, animata, sentiens, ad hominem & bestiam communiter attinet. Sic dicimus hominem & bestiam species animalis; quia partes sunt animali subjectæ, quæ animalis essentiam communem habent.

Genus est generalissimum aut subalternum.

F

Species.

Species subalterna aut specialissima.

Genus generalissimum, cujus nullum est genus.

Ut in Logica inventione argumentum est genus generalissimum artificialium & inartificialium.

Subalternum genus, ut subalterna item species, quod species hujus, illius autem genus est.

Id est, quod nunc genus est, nunc species : genus, si ad species sibi subjectas referatur ; species, si ad suum genus.

Sic causa, genus est materiae & formae ; species, argumenti absolute consentanei. Sic homo est genus subalternum, five species subalterna : species quidem, si ad animal referas ; genus, si ad singulos homines.

Species specialissima est, quae individua est in species alias.

Ut materia & forma quaeque singularis. Sic homines singuli sunt species specialissimae hominis, & singuli leones leonis.

Logicorum quidem pars maxima hominem speciem specialissimam, singulos homines individua vocant, non species. Verum ut animal est totum cujus essentia communis, nempe corporea, animata, sentiens, ad hominem & bestiam communiter attinet ; sic homo est totum, cujus communis essentia rationalis communiter ad singulos attinet homines : atque ut homo & bestia species sunt animalis, quia partes sunt animali subjectae, quae animalis essentiam communem habent ; ita singuli

guli homines species sunt hominis, quia partes sunt homini subjectæ, quæ hominis essentiam communem habent: ergo homo non minus est singulorum hominum genus quàm animal hominis; homines singuli non minus sunt hominis species, quàm homo animalis. Singuli enim homines propria forma differunt: quæ autem forma differunt propria, differunt & specie; teste *Aristot. Phys. 1.7.* Deinde, quicquid differt, aut genere differt aut specie; teste eodem *Aristot. Phil. 10.3.* differre autem genere singulos homines nemo dixerit; differunt ergo specie. Nam quod aiunt hominem esse speciem singulorum hominum, id planè absurdum est: species enim pars est ejus cujus est species; ut ex ejus definitione constat: genus porro & species cùm relata sint, genus utiq; erit speciei genus; species, generis erit species. Si igitur homo, ut vulgò volunt, est species singulorum hominum; singuli homines erunt genus hominis; quod nimis absurdum est. At inquirunt singuli homines numero tantum differunt, non forma. Verùm quæ numero differunt, forma quoq; differre, jam supra capite de Forma satis ostendimus; etsi formæ cujusq; propriæ differentia nobis non nisi per externa quadam effecta, & accidentia, quæ vocant, dignosci potest. Deinde, singuli homines inter se disparantur, ergo opponuntur: quæ autem inter se opponuntur, eorum eadem forma esse non potest; forma ergo differunt non numero tantum. Itaq; apud *Laërtium*, in *Zenone*, *Stoici* docent, *Socratem* esse speciem specialissimam. Immo *Aristot. de Part. 1.4.* *Socratem* & *Coriscum* species infimas vocat. Sic jurisconsulti, hominem genus appellant; *Stichum* & *Pamphilum* species.

Genus verò & species notæ sunt causarum & effectorum.

In animali n. est essentia corporea, quæ materia est ad species communiter attinens: tum facultas vitæ & sensus, quæ forma item communiter ad species spectat. Quare *genus continet causas, quæ communiter ad ipsius species attinent: contra itaq; etiam species effecta generis sui continent.*

Hinc universale est insigne ac præstabile: quia causam declarat.

Idem ait *Aristot. Poster. I. 24.*

Distributio generis in species valdè quidem excellit, sed difficilis est & rara inventu.

Excellit quidem quia quicquid in artibus ex causis & effectis sumitur, id totum ferè generis & speciei notionibus comprehenditur: difficilis est, cùm quia formæ, unde species oriuntur, difficiles itidem inventu sunt; tum etiam propter vòcum penuriam, quibus genera & species apte nominentur.

Attamen illustrationis & exempli gratia afferemus quod poterimus. *Ovidius. I. Metam.* dividit animal in quinq; species, stellas, aves, bestias, pisces, homines: stellis animam tribuens, ut etiam quidam Philosophi tribuerunt.

*Neu regio foret ulla suis animalibus orbis,
Astra tenent caeleste solum formæq; deorum: &c.*

Sic Cic. Offic. I. Virtutem dividit in species quatuor, prudentiam, justitiam, fortitudinem, temperantiam; quæ tamen ipsæ non ponuntur in distributione, sed, quod idem est, earum formæ. *Sed omne quod honestum est, id quatuor partium*

partium oritur ex aliqua: aut enim in perspicentia veri solertiâq; versatur, aut in societate hominum tuenda, tribuendôq; suum unicuiq;, & rerum contractarum fide; aut in animi excelsi atq; invicti magnitudine ac robore; aut in omnibus que fiunt, queq; dicuntur, ordine & modo, in quo inest modestia & temperantia.

Hæc quidem, ut dixi, est distributio generis in specierum formis; quæ perinde est ac si in ipsa species esset; quia forma cum genere constituunt suas species.

Genus & species non solum tractantur hac simplici divisionis formula, sed etiam separatim alterum ex altero.

Hoc est, quod de toto genere, id de omnibus etiam speciebus rectè affirmatur. Sic Cicero, pro Archia, poëticam cum eloquentia comparans, quæ sunt species artis, cognatas esse ait inter se, quia idem de artibus in genere, humanioribus præsertim, affirmatur. Etenim omnes artes, quæ ad humanitatem pertinent, habent quoddam commune vinculum, & quasi cognatione quoddam inter se continentur.

Contra genus tractatur per species.

Hoc est, quod de omnibus speciebus, id de genere quoq; rectè affirmatur. Sic Ovidius probat, virtutem in rebus adversis clariorem esse, per inductionem specierum: quoniam scilicet virtus militis, nautæ, medici, rebus adversis spectatur. 4 Trist.

*Hectora quis nosset, felix si Troia fuisset ?
 Publica virtutis per malafacta via est :
 ars tua Tiphys jacet, si non sit in equore fluctus :
 si valeant homines, ars tua, Phæbe, jacet.
 Quæ latet, inq; bonis cessat non cognita rebus,
 apparet virtus arguiturque malis.*

Cum itaq; genus tractetur etiam per species, ut superiore regula docemur, & exempla specialia species eorum sint, quorum exempla sunt; hinc sequitur, exempla specialia suo generi accommodata, hujus esse loci; sive unum solum, sive per inductionem plura adhibeantur: specialia inquam, exempla enim vel similia sunt, quæ similia arguunt; vel specialia, quæ arguunt suum genus; qualia fuerunt in singulis argumentorum capitibus ex poetis & oratoribus desumpta. Exemplorum autem specialium, non solum in artibus cum inveniendis tum tradendis usus planè est necessarius (nam inductione exemplorum præcepta colliguntur, & eorum usu illustrantur) verum etiam in omni sermone, quoties res lucem desiderat. Cujusmodi est illud Cic. ad Atticum: *urbem tu relinquis? Ergo idem si Galli venirent. Non est, inquit, in parietibus respub. at in aris & focis: fecit idem Themistocles: fluctum enim totius barbarie ferre urbs una non poterat. At idem Pericles non fecit, annum fere post quinquagesimum, quum præter mœnia nihil teneret: nostri olim urbe reliqua capta, arcem tamen retinuerunt. Hic ab exemplo speciali in utramq; partem disseritur. Themistocles deseruit Athenas; ergo urbem deferere licet. Pericles non deseruit Athenas; nec Romani Gallis venientibus Romam; ergo urbs non est deferenda.*
 Quod

Quod si hoc modo argumentaretur, *Themistocles* urb. in reliquit, ergo mihi licet; argumentum esset à simili: nam exempla, cum ad alia specialia accomodantur, similia sunt vel dissimilia. Hujus autem loci ea demum sunt, quæ generi suo accomodantur.

Est & alia imperfectior distributio ex effectis, quando partes non sunt propriè effecta totius, sed ipsarum partium. *ut* *Cit. de Senect.* *Nautarum alii malos scandunt, alii per foros curstant, alii sentinam exhauriunt; gubernator autem clavum tenet in puppi.* In hoc exemplo totum est nauta, quod est singulorum nautarum genus; partes, malum scandere, cursitare, &c. Quæ tamen nautæ ut totius sive generis partes sive species non sunt, sed specierum, i. e. singulorum nautarum effecta sive officia, quibus ipsæ species, i. e. singuli nautæ inter se distinguuntur. Verum quanto hæc distributio imperfectior est, tanto est frequentior. Usus autem illius præcipuus est, ut perfectioris raritatem suppleat; cum distributio generis in species, ut supradictum est, tam difficilis inventu sit.

CAP. XXVIII.

De Distributione è subjectis.

Rliqua distributio est modo quodam concurrenteorum, ut subjectorum & adjunctorum.

Distributio è subjectis est, cum partes sunt subjecta. Id est quando veræ partes intellectæ subjectis distinguuntur vel adumbrantur.

Ut apud Catullum :

*Virginitas non tota tua est: ex parte parentum est.
tertia pars matri data, pars data tertia patri:
tertia sola tua est: noli pugnare duobus,
qui genero sua jura simul cum dote dederunt.*

Virginitas puellæ vel jus potius virginitatis in tres partes diuiditur subjectis distinctas, matre, patre & ipsa puella. Alterum exemplum ex cap. 26. huc transfertur, *Virgil.* 1. Georg. Ubi poëta exorditur opus suum à divisione in quatuor partes, subjectis suis occupantibus distinctas, segetes, arbores, pecora, apes.

Quid

*Quid faciat letas segetes, quo sidere terram
vertere, Mæcenæ, ulmîsq; adjungere vites
conveniat : quæ cura boum, quis cultus habendo
sit pecori, atq; apibus quanta experientia parcis,
hinc canere incipiam. ----*

Tertium exemplum ex eodem etiam capite
huc transfertur. *Cic. pro Muræna* : *Intelligo
Judices, tres totius accusationis partes fuisse :*
& earum unam in reprehensione vitæ, alteram
in contentione dignitatis, tertiam in criminibus
ambitûs esse versatam. Hic tota accusatio in
tria membra distribuitur, subjectis suis occu-
pantibus distincta : atq; in his tribus exemplis
totum est integrum. Quartum exemplum est
generis in species ex *Cic. 5. Tuscul.* Sint sanè
illa tria genera bonorum, dum corporis & ex-
terna jaceant humi, & tantummodo quia sumenda
sunt, appellentur bona. Alia autem, divina illa,
longè latèq; se pandant, celûmq; contingant.
Hic Cicero bona in tres species, quas ille genera
vocat, dividit, subjectis suis distinctas ; nempe
animi, corporis & fortunæ.

C A P. XXIX.

De Distributione ex Adjunctis.

Distributio ex adjunctis est, quando partes sunt adjuncta.

Ut hominum alii sani, alii ægri: alii divites alii pauperes.

Sic *Virgil. I. Georg.* mundum dividit in quinque partes; mediam torridam, duas extremas frigidas, & reliquas duas temperatas:

*Quinq; tenent cælum zonæ, quarum una corusco
semper sole rubens, & torrida semper ab igni: &c.*

Cæsar I. Belli Gall. Gallia est omnis divisa in tres partes: quarum unam incolunt Belgæ, aliam Aquitani, tertiam, qui, ipsorum lingua Celtæ, nostra, Galli appellantur.

In distributionibus hujusmodi imperfectis advertendum est id quod videtur distribui. Nam si id totius rationem habet, integri vel generis, distributio est; si non habet rationem totius, sed simplex aliquod argumentum est, ut causa, effectum, subjectum, adjunctum, non est distributio sed enumeratio potius, vel causarum plurium ejusdem effecti, vel effectorum plurium ejusdem causæ, vel subjectorum plurium ejusdem adjuncti, vel deniq; adjunctorum plurium ejusdem subjecti. Hoc genere distributionis imperfectæ.

perfectio argumenta sæpe quorum veræ species nullæ apparent, modis quibusdam distinguuntur, modos autem supra in adjunctis posuimus. Sic in causis, *procreans & conservans*, modi efficientis, non *species*, dicuntur: quia non differunt inter se ut species per differentias oppositas, sed ita ut uni & eidem efficienti convenire queant; quandoquidem quæ causa procreat, eadem ferè conservat; potestq; efficere idem vel solus, vel cum aliis; nonnulla vel per se, vel per accidens:

C A P. XXX.

De Definitione.

Definitio in tradendis artibus est usu quidam prior distributione (prius enim definitur unaquæq; res quàm distribuitur) natura tamen & inveniendi ordine est posterior: genus enim, quo non adhibito, si quod sit, nulla definitio constitui potest, à distributione, qui proprius generis est locus, mutuum accipit,

Definitio est, cum explicatur quid res sit.

Definitio vocatur, eo quòd rei cuiusq; essentiam definit, eamq; suis quasi finibus circumseribet.

Atque ut definitio arguit sive explicat definitum, sic vicissim à definito argui potest. Quæ quamquam

quam argumentorum omnium affectio communis est arguere inter se vicissim & argui, hic tamen eandem ob causam facta mentio est definiti, ob quam in capite notationis facta est nominis; ne argumentorum numero excludi videatur, cum neq; ejusdem sit nominis cum definitione quam arguit, neq; caput sibi peculiare obtineat; sicut alia argumentorum paria, quæ nominis ejusdem non sunt. Ad reciprocationem autem quod attinet, quæ definitioni cum distributione communis est, ea definitionis & definiti manifestissima est: Logica enim est ars bene ratiocinandi; & vicissim, ars bene ratiocinandi est Logica. Atq; ad hunc modum omnis definitio, ut nonnulli rectè monuerunt, conversione examinanda est: unde *Boëthius*, *Top. 5.* omnis definitio, rei, quam definit, adequatur.

Definitio est perfecta aut imperfecta: illa propriè definitio; hæc descriptio dicitur.

Definitio perfecta est, quæ constat è solis causis essentiam constituentibus. Redundat ergo in definitione perfecta quicquid præterea ponitur.

Causa autem illæ genere & forma comprehenduntur.

Genus enim & forma (quæ sunt quasi corpus & anima definitionis) totam rei essentiam constituunt. Non ita tamen necessariò requiritur in definitione perfecta genus, ut perfecta non sit nisi genus habeat: primum enim, summorum generum, ut argumenti in Logica inventionem, genus nullum est; sed tota eorum essentia sub ipsa forma continetur; quæ etiam materiam iis

con-

convenientem complectitur; deinde fieri potest ut ipsæ causæ facilius occurrant quam earum symbolum genus. Itaq; si ex ipsis causis definitio constat, perfecta erit; si ex genere, succinctior tantum. Genus autem proximum, non remotum, in definitione semper est ponendum: qui enim proximum ponit, remotiora etiam posuit: nisi proximum fortè anonymum sit; tum enim & quotiescunq; generis, sive anonymum sit sive non, paulo ante facta mentio est, abesse genus in definitione, & rectè subintelligi potest: ut in hac ipsa definitionis definitione, genus remotum, nempe ortum argumentum; tum etiam proximum, nempe reale & compositum, subintelligitur. Quam autem hîc formam in definitione appellamus, pleriq; differentiam vocant. Sed differentia formæ fructus est: & nisi in rerum collatione, quæ in definitione nulla est, non apparet; & forma ipsa est unde præcipua rerum explicatio sumitur; præcipuum ergo in definitione locum habet.

Atq; hoc modo definitur homo, animal rationale: nempe genere, *animal*, intelligimus, ut dictum est, essentiam corpoream plenam vitæ & sensus, quæ materies hominis est, & pars formæ: cui si addas *rationale*, totam formam hominis comprehendes, vitæ, sensus, rationis facultate.

Itaque perfecta definitio nihil aliud est, quàm universale symbolum causarum essentiam rei & naturam constituentium.

Tales definitiones sunt artium. Grammatica est ars bene loquendi. Rhetorica bene dicendi. Logica bene ratiocinandi. Arithmetica bene numerandi. Geometria bene metiendi. Nam genere *ars* intelligimus præceptorum ordine dispositorum comprehensionem, quæ materies est cujusque artis & pars formæ, sive forma communis, cui si addas formam cujusq; artis propriam (quæ finem quoque sub se comprehendit, ut dictum est cap. 8.) habes totam artis essentiam explicatam, quæ perfecta definitio est.

Ad regulas consequentiæ quod attinet, nempe à definitione ad definitum; & contrà, affirmatè vel negatè; hæc omnia reciprocatio, quæ distributionis quoq; fuit, satis clarè suo loco exposuit.

CAP. XXXI.

De Descriptione.

Definitiones perfectæ propter causarum & præsertim formarum obscuritatem, difficiles inventu sunt: ad supplendam igitur earum raritatem, *descriptio* inventa est.

Descriptio est definitio imperfecta, ex aliis etiam argumentis rem definiens. Id est, ex quibusvis aliis rem quoquo modo explicans.

Ubi itaque forma haberi non potest (nam genera ferè notiora sunt) proprietas loco formæ seu differentiæ accipienda est: ut, *angelus est substantia incorporea: equus est animal hinnibile, &c.* Adjuncta five accidentia, quæ vocantur (quia substantiæ solæ, ut inquit *Aristot. l. 6. Metaph. c. 5.* Primariò definiuntur, accidentia secundariò tantùm) propria quidem genere, subjecto, causâque proxima vel efficiente, vel finali, vel utrâq; definiuntur, Genere & subjecto solo; ut, *limitas est curvitas nasi: subjecto & efficiente; ut, tonitru est sonus fractæ nubis, ob ignem oppressum; quantitas continua est adjunctum corporis, ab extensione materiæ: finalis; ut, sensus est facultas naturalis in animali, ad judicandum de singularibus: vel utrâque; ut, respiratio est attractio & expulsio aëris reciproca à pulmonibus facta, ad cordis refrigerationem.* Omittitur enim sæpe subjectum in definitione priorum, quippe quòd ex genere vel ex causa intelligitur: ut, *memoria est sensus internus conservans imagines rerum cognitarum.* Non dicitur *sensus internus animalis*, addito nempe subjecto, quia id mentione *sensus* intelligitur. Potentiæ naturales actione sua & causâ efficiente definiuntur: ut, *risibilitas est facultas ridendi, orta ab anima rationali.* Habitus vel fine vel objecto quæ sæpe coincidunt definiuntur: fine; ut, *Logica est ars bene ratiocinandi: objecto; ut, Physica est scientia rerum naturalium.* Qualitates patibiles definiuntur subjecto & efficiente: ut *color est qualitas corporis mixti, orta ex contemperatione lucidi & opaci.* Actiones ferè subjecto efficiente & fine definiuntur. Relationes relatis inter se & fundamento sive causa; ut, *paternitas est*

est relatio patris ad filium, ex procreatione orta.

Adjuncta communia objecto, efficiente, finali, vel ex his quot sunt ex usu, definiuntur: ut, *albedo est color, ortus ex lucido opacum superante.*

Illud modo generatim in descriptionib. cavendum, ne causa pro genere habeatur: ut cum dubitatio describitur, æqualitas rationum; sanitas, symmetria humorum; dolor, solutio continui; ecclipsis lunæ, interpositio terræ: aut subjectum; ut, ventus est aer motus; justitia est voluntas constans; vulnus est pars carnis dilacerata; peccatum originis est natura corrupta, & similia.

Cæterum in his certæ regulæ dari non possunt. Aliquando enim ex remoto solum contrario fit descriptio: ut,

Virtus est vitium fugere, & sapientia prima Stultitia caruisse.--- Aliquando planè arbitraria est.

Hinc etsi unica rei definitio, plures tamen descriptiones esse possunt.

Ut autem definitio definito, quod suprà monuimus, ita etiam descriptio descripto vicissim argui potest. Verùm non affectio solum hæc mutua inter descriptionem & rem descriptam intercedit, sed etiam reciprocatio; juxta communem illam distributionis ac definitionis regulam,

regulam, suprà, cap. 25. traditam; quâ descriptio quoq; propria rei descriptæ & reciproca esse debet. Quamvis enim in descriptionibus, multa sæpe congeruntur, quorum aliqua fortè latius patent, quàm id quod describitur, juncta tamen æquantur descripto, descriptionemq; propriam reddunt; sin minus, vitiosa atq; inutilis descriptio censenda est. *ut, homo est animal mortale, capax discipline.* Hic cum aliqua causa (materia scilicet & communi forma, quæ sub genere *animal* continetur) miscentur duæ circumstantiæ sive adjuncta, alterum commune, scilicet *mortale*, alterum proprium, *capax discipline.* At quorsum, inquis illud *mortale*, cum nullum animal non sit mortale? Quia nempe *Aristot.* cujus hæc descriptio est, *Top. 5. 1. animalia quædam ait esse immortalia, Top. 4. 2. & in eodem capite, Deum ipsum ζῷον ἀθάνατον, i. e. immortale animal vocat.*

Sed hæc succincta brevitatis non est in hac specie perpetua; quæ sæpe illustriorem & copiosorem explicationem desiderat.

Succinctæ descriptiones quæ perfectas æmulantur definitiones, usum habent præcipuè in artibus tradendis ac disputationibus. Prolixiores illæ, utpote ad aures vulgi magis accommodatæ, apud oratores ac poëtas frequentius occurrunt.

Sic gloria describitur in *Miloniana*: sed tamen ex omnibus præmiis virtutis, si esset habenda ratio præmiorum, amplissimum esse premium gloriam: hanc unam, quæ brevitatem vitæ posteritatis memoria consolaretur; quæ efficeret, ut absentes, adessemus; mortui, viveremus: hanc deniq; esse, cujus gradibus etiam homines in cælum videantur ascen-

ascendere. Descriptio hæc gloriæ constat ex genere, premio nempe *virtutis*; adjuncta amplitudine, eâq; aucta à minore, quod sit omnium amplissima; quatuor deinde effecta ejus adjiciuntur.

Sic 4. *Aneid.* fama describitur:

*Ex templo Libiæ magnas it fama per urbes,
fama malum; quo non aliud velocius ullum
mobilitate viget, virēsque acquirit eundo. &c.*

Describitur fama, 1. à genere, *malum*. 2. ab adjuncta velocitate, quæ illustratur à majore negato, *quo non aliud velocius*; tum duplici effecto aliarum rerum dissimili, quod.

mobilitate viget, virēsque acquirit eundo.

3. Ab adjuncta varietate, quæ ostenditur ex aliis adjunctis, quod sit primò *parva*, idque arguitur causa, scilicet *meru*, & circumstantia temporis, primò nempe; tum subito grandior facta incremento exigui temporis incredibili, idq; ostenditur trib. effectis, quæ singula subiectis suis illustrantur,

--- *mox sese attollit in auras:*

ingrediturque solo, & caput inter nubila condit.

4. A causa procreante, *illam terra parens*, --- mater scilicet gigantum, & efficiendi modo, consilio nempe sive impetu naturali, *ira irritata deorum*, qui gigantes occiderant; causa autem procreans communis illustrata tempore adjuncto, & communi testimonio,

*extremam, ut perhibent, Cæo Enceladôq sororem
progenit; rursus illustratam ab adjunctis,
--- pedibus celerem, & perniciousis alis,
monstrum horrendum, ingens.---*

Deinde à partibus corporis & membris, iisq;
paribus,

*--- cui quot sunt corpore plumæ,
tot vigiles oculi subter, mirabile dictu,
tot linguæ, totidem ora sonant, tot subrigit aures:*

Tum ab effectis nocturnis, iisq; partim affir-
matis quæ subjectis locis illustrantur,

*nocte volat cæli medio, terræq; per umbram
stridens, partim negatis, nec dulci declinat lu-
(mina somno:*

Tum diurnis, eaq; illustrantur & subjectis lo-
cis, & adjuncto situ sedendi,

*luce sedet custos, aut summi culmine telli,
turribus aut altis & magnas territat urbes.*

Ab adjunctis denique paribus;

tam ficti praviq; tenax quam nuntia veri.

Tales sunt descriptiones plantarum, animalium in Physicis; item fluminum, montium, urbium apud Geographos & Historicos; personarum deniq; apud Poetas & Oratores.

C A P. XXXII.

De Testimonio divino.

Exposito artificiali argumento, sequitur inartificiale.

Argumentum inartificiale est quod non sua natura, sed assumpta artificialis alicujus argumenti vi arguit.

Id uno nomine Testimonium dicitur. Nempe, ut inquit Cic. in Top. quod ab aliqua externa re sumitur ad faciendam fidem.

Inartificiale autem dicitur, non quod artis ope & auxilio non inveniatur (siquidem de eo inveniando, ut inquit Cicero, Partit. in arte præcipitur) sed quod ex se suaque natura artis hujus & facultatis arguendi expers sit. Potest etiam assumptum dici, quod assumpta vi arguit, non sua. Argumentum enim inartificiale naturam rei non attingit, nedum arguit, ut artificiale solet, neque rei affectio, sicut artificiale, est; sed est nuda cujuspiam aliqua de re attestatio, sive attestantis affirmatio aut negatio. Res autem neque propter affirmationem sunt, neque propter negationem non sunt: testimonium igitur ex se suaque natura non arguit; sed assumpta artificialis alicujus argumenti vi. Vis autem hæc est testantis auctoritas, à qua omnis testimonii fides pendet. Auctoritas autem variis in argumentis consistit, sed in effectis testantis & in adjunctis præcipue cernitur.

Itaque;

Itaq; cum exquisita rerum veritas sive natura subtilius exquiritur, perexiguam probationis vim testimonium habet.

Hinc Cic. 1 de Nat. Non tam auctores, inquit, in disputando, quam rationum momenta querenda sunt.

In civilibus autem & humanis rebus, ubi de facto queritur, plerumq. hoc argumentum præcipuam fidem è moribus arguentis efficit, si prudentia, probitas & benevolentia affuerint.

Horum unum aliquod si deest, vel per imprudentiam testis, vel propter improbitatem, vel inimicitiarum deniq; aut nimiae gratiae causa, falsum sæpe pro testimonio dicitur.

Testimonium est divinum vel humanum.

Et rectè quidem in species efficientibus suis causis distinctas dividitur. Ab efficientibus enim maximè testimonium suas vires assumit. Effectum itaq; est, si ad testem spectas; testimonium, si ad rem testatam. Perexiguam autem vim probationis in exquisita veritate & natura rerum pervestiganda communiter tribui testimonio quod tam ad divinum quam ad humanum pertinere videatur, id cur quempiam offendat, non video: testimonium enim sive divinum sit sive humanum, peraq; vim omnem ab authore, nullam in se habet. Et divinum quidem testimonium affirmat vel negat rem ita esse,

esse, facitq; ut credam; non probat, non docet, non facit ut sciam aut intelligam cur ita sit, nisi rationes quoq; adhibeat.

Testimonium divinum est quod Deum habet authorem.

In divinis testimoniis numerantur non solum deorum oracula, sed etiam responsa vatum & fatidicorum.

Vera hæc sint an ficta, veri numinis an falsi, Logicus non laborat, sed quam modò vim arguendi unumquodq; habeat. Itaq; in civilib. etiam & humanis rebus testimonium divinum perinde vim probationis habet, ut ejus author verus est aut falsus Deus.

Hujusmodi sunt ista *Catilin.* 3. Nam ut illa omittam, visas nocturno tempore ab occidente faces, ardoremq; cæli; ut fulminum jactus, ut terre motus, ceteraq; , quæ ita multa, nobis consuetibus, facta sunt, ut hæc, quæ nunc sunt, canere dii immortales viderentur.

C A P. XXXIII.

De Testimonio humano.

Testimonium humanum est, quod authorem habet hominem.

Estq; commune aut proprium.

Distributio hæc proponitur, non ut acurata aliqua divisio (neq; enim testimonio propria est) sed ut distinctio qualiscunq; subalternarum specierum, ad quas inferiores species testimonii & exempla possint revocari. Atq; , ut superior illa distinctio in divinum & humanum, ab efficiente quoq; sumitur, qui sit persona publica sive communis, aut propria sive privata.

Testimonium commune est, ut lex & illustris sententia.

Hæc enim duo exempla sunt potius quàm species: quibus adjungi potest *Fama*; quam *Cic.* in *Top.* quoddam multitudinis testimonium appellat; alii, consensum civitatis & publicum testimonium vocant.

Legis autem & non scriptæ & scriptæ testimonium est pro Milone: Est enim, judices, non scripta, sed nata lex; quam non didicimus, accepimus, legimus; verum ex natura ipsa arripimus, hausimus, expressimus: ad quam non docti, sed facti; non instituti, sed imbuti sumus: ut, si vita nostra in aliquas insidias, si in vim, in tela, aut latronum

tronum aut inimicorum incidisset, omnis honesta ratio esset expediendæ salutis. Et ibidem, Quod si duodecim tabule nocturnum furem quoquo modo, diurnum autem, si se telo defenderit, interfici impunè voluerunt, quis est, qui &c.

Restat illustris sententia; cujus generis sunt proverbia. Ut pares cum paribus facillime congregantur. Spartam nactus es, hanc exorna. Tum dicta sapientum. ut, Nosce teipsum. Ne quid nimis. Sponde, præsto est detrimentum. Quanquam enim hæc dicta singula à singulis fortasse auctoribus orta sunt, tamen quia omnium in ore versantur, quasi omnium fiunt, & ad commune testimonium rectè referuntur.

Proprium testimonium est: ut Platonis illud, I ad Q. fratrem; Atq; ille quidem princeps ingenii & doctrine, Plato, tum deniq; fore beatas respub. putavit, si aut docti & sapientes homines eas regere cepissent, aut qui regerent, omne suum studium in doctrina ac sapientia collocassent.

Talia sunt in poetis. *Æneid.* 6.

Discite justitiam, moniti; & non temnere divos.

Sic Homericis illis versibus.

Αἶας δ' ἐκ Σαλαμῖν' ἄλγυ δροκίδεσσι νῆας.
Στῆσε δ' ἄγων ἰν' Ἀθηνάων ἱερῷ φάλαγγες,
Ajax autem ex Salamine duxit duodecim naves.
Constituit verò ducens, ubi Atheniensium stabant
phalanges,

Victi sunt in judicio Megareses, quo contenderunt cum Atheniensibus de Salamine insula

insula, utriq; fortè civitati æquè vicina.

Atq; hæc veterum fuere & absentium testimonia, & ferè mortuorum; quæ de jure potissimum afferuntur.

Viventium & præsentium, quæ de facto plerunq; testantur, non tantum sunt cùm quæritur de fundo aut cæde & ejusmodi negotio aliquo, sed etiam obligationis, confessionis, jurisjurandi testimonia sunt.

Obligationis exemplum est Philipp. 5. Promitto, recipio, spondeo. P. C. Casarem talem semper fore civem, qualis hodie sit, qualémq; eum maximè velle & optare debemus.

Pignus etiam obligatio quedam est:

Ut apud Virgil. Ecl. 3.

Vis ergo inter nos quid possit uterq; vicissim experiamur? Ego hanc vitilam (ne forte recuses, bis venit ad mulctram, binos alit ubere fetus) depono: tu dic, mecum quo pignore certes.

Confessio est vel libera, in qua cujusvis testimonium pro se levissimum contra se gravissimum censeatur. Vel est expressa tormentis, quæ propriè questio dicitur.

Tale fuit argumentum contra Milonem, quod à Cicerone deridetur: quia cruciatus non sapius veritatem quàm mendacium exprimit atq; extorquet. Age verò, quæ erat aut qualis questio? Hæc, ubi Ruscio? ubi Casca? Clodius insidias fecit Miloni? Fecit. certa crux. Nullas fecit. sperata libertas.

Huc etiam referri potest argumentum, quo utimur cùm affirmationis nostræ approbationem & experientiam adversario proponimus.

Verr. 4. *Ecquis Volcatio, si sua sponte venisset, unam libellam dedisset? veniat nunc, experiatur: testis recipiet nemo.*

Terent. Eunuch.

----- *Fac periculum in literis,
jac in palestra, in musicis; quæ liberum
scire æquum est adolescentem, solertem dabo.*

3. Trist.

*Quod magis ut liqueat, neve hoc ego fingere credar
ipse velim pœnas experiare meas.*

Jusjurandum etiam testimonium est.

Quale est *Aneid.* 6.

*Per superos, & si qua fides tellure sub ima est,
invitus, regina, tuo de littore cessi.*

Quamvis autem in juramentis divinum quodammodo testimonium invocetur, juramenti tamen fides autoritate & moribus jurantis nititur.

Reciprocatio hinc obscurior est ad rem testatam, quod est hinc alterum argumentum affectum; ut quia testatum verum sit, testis sit etiam verax.

Ut autem non sua vi testimonium, sed auctoritas testis arguit rem testatam; ita vicissim res testata non arguit ipsum testimonium, sed auctoritatem testis.



J. Miltoni Angli.

ARTIS LOGICÆ

ad Petri Rami methodum concinnata.

Liber Secundus.

De Argumentorum dispositione.

C A P. I.

Quid sit argumentorum dispositio?



argumentis inveniendis
ponendis, i. e. quæ

Dhuc prima artis Logicæ
pars fuit in argumentorum
inventionem: pars
altera sequitur in eorum
dispositionem.

Quemadmodum Grammaticæ
pars prima est de
singulis vocibus, secunda
de syntaxi earum; sic
Logicæ pars prima de
fuit, secunda est de dis-
doceat argumenta rectè
dispo-

disponere: ita dispositio quasi syntaxis quædam argumentorum est; non tamen ad bene judicandum duntaxat, ut vult *Ramus*, quod nimis angustum est, sed ad bene ratiocinandum, qui finis est Logicæ generalis, ad quem unum finem omnia artis præcepta referenda sunt. Jis itaq; non assentior, qui judicium secundam esse partem Logicæ volunt: cum ipsorum sententia judicium sit secundæ hujus partis nempe dispositionis finis & fructus: non potest autem res eadem esse finis & id cujus est finis fructus quod effectum est & ejus fructus causa, quæ dispositio est. At inquirunt, judicium ut doctrina est pars Logicæ; finis est ut habitus bene judicandi. Immo verò inquam, dispositionis doctrina suam operam confert non solum ad bene judicandum, sed ad bene ratiocinandum; judicium autem & dispositionem pro eodem non dixerim cum *Ramo*: si enim certa, ut ipse *Ramus* ait, dispositionis regula unumquodq; judicatur, dispositio utiq; ac judicium si idem erunt, idem erit & regula, & id cujus regula est: doctrina deinde judicii docet nihil aliud quam bene judicare; doctrina dispositionis pro sua disponendi parte, etiam bene ratiocinari: sive id sit intelligere, sive judicare, sive disputare, sive meminisse. Certa enim dispositionis regula unumquodq; munus ratiocinandi excolitur.

Cum itaq; simplicem argumentorum inter se affectionem aliquid per se conferre ad judicium rectumq; ratiocinium initio proposuerim, nunc eorum dispositionem aliquanto plus, adeoq; clarius ad idem conducere propono.

Prius autem quam ad partes dispositionis accedimus, generalis quædam dispositionis affectio, quæ

quæ *Crypsis* dicitur, attingenda est; ut quæ ad omnes species dispositionis communiter pertineat. *Crypsis* autem sive occultatio ista, est triplex; dispositarum scilicet partium vel defectus, vel redundantia, vel inversio. Quod itaq; semel hîc monendum est, siqua propter has crypses dubitatio contingit, explenda quæ defunt, amputanda quæ supersunt, & pars quæq; in suum restituenda est locum.

CAP. II.

De Axiomatis affirmatione & negatione.

Dispositio est axiomatica vel dianoetica.

Axioma est dispositio argumenti cum argumento, qua esse aliquid aut non esse indicatur.

Axioma sæpe Aristoteli significat propositionem sive sententiam ita claram, ut quasi digna sit cui propter se fides habeatur. Aliàs axiomata & propositionem sive sententiam quamlibet pro eodem is habet: & rectè quidem: ut enim sententia à sentio, i. e. existimo vel arbitror, ita axiomata à verbo *Græco* quod idem significat, derivatur. Atq; hujus vocis generalem hanc significationem apud veteres Dialecticos receptam fuisse, ex Cicerone, Plutarcho, Laertio, Gellio, Galeno lib. 16. c. 8. & constat.

Latine enuntiatur, enuntiatio; pronuntiatur, pronuntiatio; effatur Varroni profatur, & proloquium, apud Gellium Lib. 16. id est sententia in qua nihil desideratur. Ex *Græco* etiam oratio & propositio dicitur.

Cur ergo, inquis, Græcanica, & hæc præ aliis, vox placita est? Quia, inquam, commodissima. Nam *oratio* & *sententia* voces latiores sunt; idèoque Græci qui λόγον five *rationem* vocant, addunt ferè *primam*, *brevissimam* aut *enuntiativam*. Deinde *propositio* ambigua vox est; significat enim nunc priorem partem plenæ comparationis, nunc primam partem syllogismi. Latina autem illa, *enuntiatum*, *enuntiatio*, &c. Orationis exterioris videntur magis quàm rationis interioris esse: cùm dispositio hæc Logica rationis omnino sit tam mente concepta quàm ore prolata; utq; voces symbola sunt & notæ simplicium notionum, ita *enuntiatum* videtur esse symbolum axiomatis mente concepti. Sic tamen retineri possunt voces Latinæ *enuntiatum*, *enuntiatio*, &c. Si distinguimus cum *Aristotele* sermonem in exteriorem, qui ore profertur; & interiorem, qui mente solum concipitur.

Genus autem axiomatis rectè statuitur dispositio, non iudicium, quod ut supra retuli, dispositionis effectum est, & hic quidem specialiter quod aliquid esse aut non esse iudicatur.

Argumentum autem cùm argumento est id quod arguit cum eo quod arguitur.

Finis dispositionis est, ut per eam esse aliquid aut non esse indicetur, sive ut aliquid de aliquo dicatur aut non dicatur. Hinc illud *Aristot.* Phil. 3. 10. esse est componi, & unum esse; non esse autem est non componi, sed plura esse. Et simplicia quidem argumenta per se considerata significant aliquid; non autem esse, aut non esse aliquid, nisi disposita. Solo autem modo indicativo esse aliquid aut non esse indicatur; non reliquis, nisi ad indicativum reductis: ut, *abi.*
i. e.

i. e. jubeo te abire. *Fiat voluntas tua*, i. e. precamur ut fiat. *utinam dissolverer*, i. e. cupio dissolvi. *Quid est Dialectica*, i. e. quæro quid sit.

Cùm autem in axiomate argumentum cum argumento disponatur, horúmque; unum necesse sit antecedere, alterum sequi; hinc partes axiomatis (*Aristot. terminos* vocat) duæ sunt, antecedens & consequens: illa vulgò minor terminus, sive subjectum, hæc terminus major seu prædicatum nominatur; quia id continet, quod de subjecto prædicatur sive dicitur. Verùm hæc nomina angustiora sunt, quàm illa, ut infra patebit.

Axiomatis affectio communis est crypsis illa triplex, de qua deque ejus triplici medela capite superiore diximus: defectus, cùm pars aliqua deest; ut, *excessit*, *erupit*, *evasit*; *Catilina* scilicet vel quis alius; *pluit*, *tonat*; Deus nempe vel cœlum. Redundantia, quæ & amplificatio dicitur, est, cùm argumentum ejusque; synonymum ponitur; aut ad id illustrandum quidvis aliud: prioris exemplum est, *Logica* sive *Dialectica est ars bene ratiocinandi*: posterioris est hoc,

Livor iners vitium mores non exit in altos.

Inversio est, cùm antecedentis loco ponitur consequens: ut, *quæstus magnus est pietas cum animo sua sorte contento*, i. e. pietas cum animo sua sorte contento est magnus quæstus.

Duæ sunt reliquæ axiomatis affectiones; quarum altera ex dispositione oritur, altera ad judicium pertinet. Nam intellectus cùm disponit

argumenta, vel componit ea inter se, vel dividit: compositio autem illa & divisio nihil aliud sunt quàm affirmatio & negatio. Cùm verò de dispositione illa judicium fert, judicat eam vel veram esse vel falsam. Quemadmodum autem dispositio est prior judicio, sic esse & non esse prius quiddam est & simplicius quàm affirmare & negare, & utrumq; hoc quàm verum aut falsum judicare.

Axioma igitur est affirmatum aut negatum.

Duplex est hic modus enuntiandi, non duæ sunt species enuntiati sive axiomatis: contradictione enim idem axioma affirmatur & negatur: sed affirmatio & negatio enuntiationis, i. e. enuntiandi species sunt, non enuntiati; nam & affirmatio & negatio dici potest enuntiatio, enuntiatum verò nequaquam; axiomatis igitur utraq; est affectio, non axioma.

Axioma affirmatum est quando vinculum ejus affirmatur: negatum, quando negatur. Vinculum. n. axiomatis forma est; vinculi vi axiomatis materia disponitur & quasi animatur; vinculo affirmato aut negato, axioma ipsum affirmatur aut negatur: affirmatio itaq; & negatio sunt vinculi affectiones, adeóq; axiomatis ejúsq; specierum. Vinculum autem est vel verbum vel Grammatica conjunctio, ut postmodum patebit, cùm axioma in species dividetur.

Affirmatio autem hæc & negatio nihil aliud est, ut suprà diximus, quàm compositio & divisio: affirmatur enim axioma, cùm ejus consequens per affirmationem vinculi cum antecedente componitur; negatur, cùm negato vinculo, consequens ab antecedente dividitur. Negatio
igitur

igitur axiomatica non est, quemadmodum erat topica non; ens, sed entis tantummodo ab ente divisio.

Hinc nascitur axiomatum contradictio, quando idem axioma affirmatur & negatur.

C A P. III.

De Vero & falso.

Axioma deinde est verum aut falsum. Hoc scilicet ex affirmatione & negatione fit iudicium: cum enim affirmantur quæ affirmanda sunt, & negantur quæ neganda, axiomata judicantur vera; & contrà. Unde *Arist.* de Interpret. 1. in compositione & divisione est verum aut falsum. Falsum autem non docetur hoc modo in arte, sed iudicatur: nam enuntiatio falsa non minus axioma est, quàm vera, eadem enim utrobiq; dispositio est non idem de syllogismo ac methodo dici poterit.

Axioma verum est, quando pronuntiat nti res est: falsum, contrà.

Sic enim *Plato*, in *Cratylo*. Ad iudicium itaq; faciendum, non modò artis documenta, sed etiam rerum ipsarum cognitio requiritur; quia res ipsa veritatis norma & mensura est.

Axioma verum est contingens aut necessarium. Contingens, quando sic verum est, ut aliquando falsum esse possit. ut, audentes fortuna iuvat.

Itaq; veritatis hujus contingentis iudicium, opinio dicitur. Quæ præteritorum & præsentium
G5 homini

homini certa esse potest, futurorum per naturam non admodum potest. Deo autem etsi tempora omnia præsentia non sunt, ut vulgò receptum est, præsentia enim mutare potest, præterita non item, opinio tamen in Deum non cadit, quia per causas æque omnia cognoscit.

De contingentibus autem, præteritis etiam, & præsentibus humanum judicium certa quidem opinio dicitur, non tamen scientia: ea enim ex argumentis, quorum est immutabilis affectio, oritur; cujusmodi in contingenti axiomate non disponuntur. Neq; idcirco non est opinio præteritorum & præsentium, quòd manifesta sunt, immo tum maximè opinari contingentia dicimur; nam dubia si sunt, siue contingentia siue necessaria, ne opinamur quidem, sed dubitamus: & necessaria tametsi sunt atq; certissima, si causam nescimus, etiam ea duntaxat opinamur.

At, inquires, præterita & præsentia non sunt contingentia, sed necessaria, quia sunt immutabilia; nam neq; factum infectum fieri potest; & quicquid est, quandiu ex, necesse est esse. Respondendum, necesse quidem esse, ut quod fuit, fuerit, & quod jam est, sit; nec tamen sequi, ut quod fuit vel est, sit propriè necessarium. In axiomate enim contingenti, præterito, vel præsenti quæ videtur esse necessitas, absoluta non est, neq; ex rerum dispositarum natura, sed ex conditione duntaxat & lege contradictionis pendet: dum enim aliquid est, non esse non potest; neq; dum verum est, esse falsum: & tamen quòd nunc verum est, fieri potest ut aliquando falsum fuerit, aut futurum sit. Idem de futuris dicendum; siquid futurum certò est, id necesse est fore quidem verum. (omne n. axioma

ma verum est aut falsum) non tamen necessarium. Id nisi teneatur, omne contingens futurum erit necessarium, quod implicat contradictionem. Hoc etiam monendum, futura quidem ipsa neq; vera esse neq; falsa, neq; contingentia, neq; necessaria, nondum n. sunt, sed affirmatio solum de iis aut negatio in futurum; deque præteritis eodem modo sentiendum.

Axioma est necessarium, quando semper verum est, nec falsum potest esse.

Nec supervacua posterior hæc clausula est: semper n. esse verum etiam contingens potest; necessarium autem non modò semper est verum, sed falsum esse non potest. Sic etiam *Aristot. Post. 1. 26.*

Contrà, quod semper falsum est, nec verum potest esse, axioma impossibile dicitur. Sic etiam Aristot. Phil. 8. 12.

Hæc autem immutabilitas veritatis in necessario, & falsitatis in impossibili, ab argumentorum quæ in iis disponuntur vel summa consensione, vel infesta semper dissensione pendet. Pari ratione mutabilitas veri aut falsi in contingenti & possibili ex levi argumentorum in iis dispositorum consensione aut dissidio perspicitur.

Ex quo doctrina illa quatuor formularum modalium, *necesse est, impossibile est, possibile est, contingens est*, quàm inutiliter ab *Aristot.* introducta sit, facile apparet: ut, *necesse est hominem esse animal; impossibile est hominem esse equum; possibile est Socratem esse divitem; contingens est Socratem esse doctum.* Hæ quatuor modales dispositionem purarum enuntiationum quodammodo afficiunt: pura est, *omnis homo est animal*; modalis, *necesse est omnem hominem esse animal*; hic *omnem hominem esse animal*, licet inverso ordine,

dine, subjectum est enuntiationis modalis; modus *neceſſe* est prædicatum. Verum quid attinet quomodo partes axiomatis inter se affectæ sint, signis aut modis exprimere, cum id ex argumentis ipsis in eo dispositis potuit rectius judicari, & ad hos modos alii complures, *facile, difficile, honestum, turpe, &c.* Non inutilius possint adungi?

Equidem secundarias, quas vocant, modales primariis hisce potiores existimem: quibus vulgò dividuntur enuntiationes in *exclusivas*, quarum notæ sunt *solus, tantum, duntaxat. &c.* ut, *sola fides iustificat: exceptivas*, quarum notæ sunt *preter, præterquam, nisi, &c.* Ut, *nemo præter te sapit: & restrictivas*, quarum notæ sunt *qua, quatenus, quoad, secundum quid, &c.* Ut, *homo qua animal, sentit.* Et exclusiva quidem est vel subjecti vel prædicati: subjecti, quæ notâ exclusivâ præpositâ, excludit omnia subiecta alia à prædicato. Sed frustra hanc regulam ratio dictarit, si Logicis quibusdam modernis, & nominatim *Keckermanno* licebit, eam statim, conflato ad id ipsum canone, funditus evertere. *Exclusiva, inquit, subjecti non excludit concomitantia: ut, solus pater est verus Deus.* Hic inquit, *non excluditur concomitans, filius, & spiritus sanctus.* At quis non videt subornatum hunc canonem, ad locum illum luculentissimum *Joan. 17. 3.* ludificandum. Haud paulò utilior est canon ille restrictivæ enuntiationis, quem tradit l. 2. c. 4. (restrictiva autem est quæ ostendit quatenus subjectum prædicato convenit) *prædicatum, inquit, contradictorium nulla limitatione subiecto conciliatur; ex Aristot. 2. top. c. ult. Sect. 4.* Quid evidentius dici potuit? & tamen

tamen reperti sunt qui interpositis quibusdam distinctiunculis, *accidens posse existere sine sub-
jecto* (quod repugnat) in *cena Domini* con-
tendant : deinde, qui similib. confictis distincti-
unculis, *humanam naturam Christi adeoq; corpus
infinitum esse* disputantes, parem contradictio-
nem committant. Sed omīssis Theologorum pa-
radoxis; ad praecepta Logica redeamus.

*Axioma necessarium affirmatum appellatur κατὰ
παντός de omni.*

Id est, cum consequens five prädicatum, ut
vocant, axiomatis, de omni & toto antecedente
five subiecto semper verum est. Sic etiam *Ari-
stot.* 1. prior. 1. & post. 1. 4. & hoc etiam non-
nunquam κατὰ τὸ σύνολον, i. e. de toto, vocat, *Post.*
2. 13.

Axiomata artium sic κατὰ παντός esse debent,

Nempe de omni & de toto vera, non falsa;
necessaria, non fortuita, alioqui non scientiam
pariunt, sed opinionem; affirmata denique,
non negata: affirmatum enim est firmum, cer-
tum, brevissimum; negatum verò est vagum,
incertum, infinitum, nihilq; docet: ut si quis
definiret Logicam, non esse artem bene loquendi,
non doceret quid Logica sit, sed quid non sit;
eaque definitio omnib. artibus præter Gram-
maticam æque ac Logicæ conveniret. Nonnulli
addunt ex hac lege, axiomata artium debere
etiam esse generalia. Verùm hæc regula non
tantum de omni est, sed de toto: & multa in
artibus præcepta specialibus de rebus occurrunt,
ut in *Theologia*, de *Christo*; in *Astronomia* de
sole & luna reliquisq; planetis: in aliis artibus
hu-

hujusmodi alia, in quibus, cū sint specialia, etsi κατὰ πάντας dici non possunt, καὶ δὲ τα-
men possunt, quod satis est. Quod si quis ob-
jicit, ne in generalibus quidem præcepta artium
κατὰ πάντας esse posse, propter exceptionum
multitudinem, ut in Grammatica videre est;
respondendum est, anomalium analogiæ con-
junctam, κατὰ πάντας instar esse.

*Sed præcepta artium homogenea etiam & reci-
proca esse debent.*

*Axioma homogeneum est, quando partes sunt
essentiales inter se.*

i. e. Vel absolute, ut forma formato, genus
speciei, membra integro, definitio definito;
vel modo quodam, ut subjectum proprio ad-
iuncto.

Id appellatur καὶ δὲ αὐτὸ per se.

Idcirco etiam partes axiomatis essentielles in-
ter se esse debent, ut præceptum artis esse sci-
entificum possit: accidentis enim, ut testatur
Aristoteles, nulla est scientia; nulla nisi per es-
sentiam & causam: idem, τὰ καθ' αὐτὸ, & τὰ
συμβεβηκότα, i. e. *accidentia*, opponit, *Post.*
1.4. Itaque non satis est, partes esse inter se
consentaneas, sed essentielles: quod cū ex ar-
gumentorum inter se summa consensione oriatur,
ex qua necessarium quoq; axioma esse ortum
supradiximus, non video quid per hanc regulam
καὶ δὲ αὐτὸ ad superiorem illam κατὰ πάντας
quod magni sit momenti, accedat; cū nullum
axioma necessarium esse queat, quin ejus partes
inter se sint etiam essentielles. Neq; verò putem
hic præcipi, ne quid heterogeneous sive alienum

in arte doceatur; neq; enim huc pertinet dispositio præcepti cum præcepto, sed argumenti solum cum argumento, quæ axiomatis doctrina est, & ex homogenei definitione ipsa ejusq; exemplis perspicitur.

Axioma reciprocum est, quando consequens semper verum est de antecedente, non solum omni & per se, sed etiam reciproce.

Ut homo est animal rationale: numerus est par vel impar. Lupus est natus ad ululandum. Id appellatur καθόλου πρῶτον, de toto primum. Nempe quia de nullo prius dicitur; ideoq; proximum est & immediatum, proprium & æquale; unôq; verbo, reciprocum; ut risibile de homine: omnis enim homo est risibilis; & reciproce, omne risibile est homo. Hæc regula nisi observetur, vitari tantologia in artibus non potest. Tum enim non reciprocatur axioma, cum antecedens consequenti non est æquale, aut contra; sed vel speciale alicui generi, vel generale alicui speciei attribuitur: generale autem de specie non dicitur primò; prius enim dicitur de genere. Cum autem id quod generis est, speciei attribuitur, idem in reliquis speciebus necessario est repetendum, quod in genere semel dictum oportuit. Ad hanc itaq; regulam pertinet præceptum artis illud nobile γενικά γενικάς, generalia generaliter & semel docenda sunt. Hæc lex brevitati, brevitatis autem intelligentiæ & memoriæ consulit.

Atque hæ tres sunt leges documentorum artium propriorum. Prima κατά παντός, lex veritatis; propterea quod necessarium affirmati axiomatis veritatem ex consentanea partium affectione postulat. Secunda καὶ αὐτὸ, lex justitiæ;

justitiæ; quia justitiam requirit in essentiali partium cognatione. Peccant ergo in hanc legem, qui Rhetoricam in inventionem, dispositionem, memoriam, &c. distribuunt, cum Rhetoricæ partes attribuant, quæ Dialecticæ propriæ sunt. Tertia καθόλου νόμον, lex sapientiæ, meritò dici possit; cum quia ejus judicium verissima scientia est, ut postea dicetur, tum quia vitia sapientiæ contraria prohibet, inæqualitatem sive inconvenientiam antecedentis cum consequente & tautologiam.

Dices, duas illas priores leges comprehendere sub hac tertia: & hoc fatendum quidem est: veruntamen ut trigonum tetragonus, & tetragonum pentagonus comprehendit, neq; idcirco tamen distinctæ figuræ non sunt; ita hæ leges, etiamsi posterior quæq; priorem comprehendit, erant tamen perspicuitatis causa distinguendæ.

Atq; hujusmodi axiomaticum ita reciprocorum judicium verissima & prima scientia est. Prima, quia principiorum est, quæ per se indemonstrabilia, suâq; luce manifestissima sunt, neq; syllogismi aut ullius argumenti clarioris lucem ad scientiam faciendam desiderant: quæ inde verissima quoq; sit necesse est.

CAP. IV.

De Axiomate simplici.

A Tq; hæc de communib. axiomatis affectionibus ;
species sequuntur.

Axioma est simplex aut compositum.

Sic etiam *Aristot.* de interpret. 1. 5. Vulgò
propositio dividitur in categoricam & hypo-
theticam, eodem sensu. Sed categorica affir-
matam duntaxat propositionem simplicem com-
prehendit, quæ scilicet de subiecto κατηγορεῖται
i. e. prædicatur.

*Axioma simplex est, quod verbi vinculo conti-
netur.*

Cùm enim vinculum, ut supradiximus, axio-
matis forma & quasi anima sit, hinc efficitur,
quemadmodum duæ sunt species vinculorum,
verbum & conjunctio, illud simplicis axiomatis,
hoc compositi, ut axioma quoque ex ista distri-
butione vinculi, in oppositas formas sive species
dividatur. Vinculum autem simplicis axio-
matis, non solum est verbum substantivum, quod
dicitur, sed quodvis verbum actionem aut pas-
sionem significans, vinculi in se vim inclusam
habet ; & vel totum consequens vel pars con-
sequentis est ; ut, *Socrates* scribit. Nam quod
nonnulli putant, verbum omne in substantivum
& participium resolvi oportere, ut ea ratione
verbum substantivum esse vinculum appareat,
scilicet, *Socrates* est scribens ; id sæpe ineptissi-
mum esse reperietur. Ut siquis hoc, *Socrates*
docetur,

docetur, sic solvat, *Socrates est doctus*: hoc enim aliud longe est. Quidquod etiam verbum substantivum nonnunquam & vinculum & totum consequens includit; ut, *Socrates est*; Mortui non sunt, i. e. non existunt. Quodsi in uno simplici axioma plura verba occurrunt, ut, *Imparia sunt comparata*, quorum quantitas non est una, sciendum est illud verbum axiomatis vinculum esse, quod Grammatici vocant principale.

Id si affirmatur, axioma simplex est affirmatum; si negatur negatum.

Negatur autem, si negationis nota verbum illud præcedit: nam si sequitur, negatum non est, sed affirmatum: ut, *Socrates est leo* non necessario, affirmatum est, quia negationis nota sequitur verbum; nec totum consequens negatur, sed modus.

Negationis autem notæ non solum sunt adverbia negandi, sed etiam particulae exclusivæ (cujusmodi sunt *unicus* & *solus*) & verba dissensionem vel differentiam significantia; ut, *differre, opponi, &c.*

Exempla nunc videamus. *Ignis urit*; ignis est calidus; ignis non est aqua. Hic ignis est antecedens, urit consequens.

Atq; hic est prima inventarum rerum dispositio, causæ cum effectu, ut in primo exemplo; subiecti cum adjuncto, ut in secundo; dissentanei cum dissentaneo, ut in tertio.

Quo modo argumenta quælibet inter se affecta enuntiari possunt, consentanea quidem affirmando, dissentanea negando. Exceptis plenis compræhensionibus, in quibus duo planè distincta axiomata sunt, propositio, & redditio. Nam distribu-

tiones,

tiones, quas etiam excipit *Ramus*, ut, Argumentum est artificiale aut inartificiale, axiomate simplici enuntiari possunt, ut infra docebitur: possunt & diversa, quæ excipiunt alii, si sic enuntias, Aliquis facundus non est formosus: & contraria; ut, virtus non est vitium, &c.

Axioma simplex est generale aut speciale.

Hæc distributio est simplicis axiomatis ex adjuncta quantitate, quæ modos, non species constituit. In axiomate autem composito, quantitatis nulla ratio habetur, sed tantum vinculi, ut infra dicemus.

Axioma generale est, quando commune consequens attribuitur generaliter communi antecedenti.

Vulgò etiam vocatur *universale*. Generaliter autem consequens antecedenti attribuitur, quando omni totiq; sive universo antecedenti attribuitur, omnibûsq; iis, quæ sub ejus significatione continentur. Ad axioma igitur generale, tria hæc requiruntur; consequens, & antecedens generale, & generalis attributio. Neq; enim ex nota sive signo univ ersali definiendum fuit axioma generale; cùm & sæpissime non adsit nota, & cùm adest, non causa sed signum tantummodo sit axioma esse generale. Indefinita igitur, quæ vulgò vocant, etsi notam non habent generalem, generalia tamen sunt; ut definitiones & reliqua artium præcepta, quæ nemo generalia esse inficiabitur; nec notam tamen generalem præfixam habent. Notæ axiomatis generalis tam affirmati quàm negati hæc sunt: *omnis*, *nullus*; *semper*, *nūquam*; *ubiq;*, *nusquam*, &c.

Atq;

Atq; hic contradictio non semper dividit verum & falsum; sed contingentium utraq; pars falsa potest esse: ut,

*Omnis in urbe locus bajis prælucet amœnis. Nul-
lus in urbe locus bajis prælucet amœnis.*

Itẽm non contingentium.

Ut, omne animal est rationale; nullum animal est rationale. Hæc enim non contingentia sunt, sed potius absurda; quia consequens speciale antecedenti generali generaliter attribuitur. Falsa igitur pars utraq; generalis contradictionis esse potest, vera esse non potest; falsitas quippe mutiplex, veritas una est.

Axioma speciale est, quando consequens non omni antecedenti attribuitur.

Speciale dicitur, quia de specie aliqua enuntiatur. Atq; ut in generali axioma consequens generaliter, sive omni & universo antecedenti; ita in speciali specialiter, sive non omni attribuitur.

In hoc axioma contradictio semper dividit verum à falso.

Id est specialis contradictionis pars una semper vera, pars altera semper est falsa.

Axioma speciale est particulare aut proprium.

Particulare, quando consequens commune antecedenti particulariter attribuitur.

Est

Est axioma speciale quia de specie aliqua, licet ea quidem incerta & indefinita, enuntiatur: particulariter autem consequens attribuitur, quando non universo antecedenti, sed ejus alicui parti attribuitur. Attributionis autem particularis notæ five signa sunt, *quidam, aliquis, aliquando, alicubi*; & negationes generalium, *nonnulli, nonnunquam, non semper, non omnis, &c.* quæ particulari æquipollent. Commune autem consequens debet esse; ex illa regula, Consequens nunquam minus est antecedente, sed semper vel majus eo vel saltem æquale. Unde *Aristoteles*, prior. I. 28, negat *singulare de alio prædicari*.

Sequitur nunc contradictio particularium.

Huc autem axiomatici generaliter contradicuntur.

Aliquid ignoscendum est; nihil ignoscendum est: aliqua clementia non est laudanda; omnis clementia est laudanda. Hic particulari affirmato, generale negatum; & particulari negato, generale affirmatum opponitur. Quodsi utraque pars particularis est, non modo nulla est axiomaticum contradictio, sed ne oppositio quidem. *ut, Quidam homo est doctus, quidam homo non est doctus.* Non enim eidem subjecto attribuntur, quæ lex est oppositorum. Pars igitur utraq; vera esse potest; sicuti etiam cum utraq; affirmata est vel negata: ut, *Omnis homo est rationalis, quidam homo est rationalis; nullus homo est irrationalis, quidam homo non est irrationalis.* In his non modo contradictio nulla, sed consensus summa est, generis nempe & speciei.

Axi-

Axioma proprium (quod alii singulare vocant) est, quando consequens antecedenti proprio attribuitur. Antecedens autem Logicè proprium dicitur quando rem vel personam singularem designat; sive proprio nomine exprimat, sive non: qualia sunt etiam demonstrativa; ut, *hic homo*. Secundò, quæ per synecdochen generis dicuntur; ut poëta pro *Homero* aut *Virgilio*, Philosophus pro *Aristotele* aut *Platone* & similia. Ad consequens autem hujus axiomatis quod attingit, id vel commune esse potest vel proprium.

Proprii contradictio est quando utraq; pars est propria: in quo discrepat à particulari, cujus pars altera duntaxat particularis esse debet; consentit cum generali, cujus pars utraq; generalis; ut, *Fabulla est bella*: cujus negatio & contradictio est, *Fabulla non est bella*. Atq; hæc de aximate simplici.

APPEN-

APPENDIX.

AD has axiomatis simplicis affectiones addunt Aristotelici æquipollentiam & conversionem.

Æquipollentia definitur, enuntiationum verbis discrepantium convenientia re atq; sensu: sic, aliquis homo est doctus, &, non omnis homo est doctus, idem valent, & similia, ut suprà in notis est dictum. Æquipollentia itaq; cum in verbis duntaxat, non in rebus, posita sit, ad Grammaticam vel ad Rhetoricam & verborum copiam remittenda est.

Conversio est prædicati unius enuntiationis in locum subjecti transpositio ad probandam alteram enuntiationem, quæ ex ea transpositione sive conversione efficitur. Ea triplex afferitur; simplex, per accidens, & per contrapositionem. Simplex, quæ fit manente eadem enuntiationis & quantitate & qualitate: fitq; etiam tripliciter; in universali negante; ut, nullus homo est lapis, ergo nullus lapis est homo: in particulari affirmante; ut, aliquis homo est albus, ergo aliquod album est homo: in affirmante deniq; universali & necessaria; ut, omnis homo est risibilis, ergo omne risibile est homo. Et hæc est una omnium conversionum verissima, quæ & reciprocatio dicitur, proprii scilicet cum suo subjecto, definiti cum sua definitione.

Conversio per accidens mutat enuntiationis quantitatem; universalem scilicet affirmantem
in

in particularem : ut, *omnis homo est animal, ergo quoddam animal est homo.* Per accidens hanc dici volunt, quia aliud prius sequitur, nempe, *quidam homo est animal*, ex quo hoc deinde, simplici conversione, ergo *quoddam animal est homo.*

Conversio per contrapositionem mutat enuntiationis qualitatem ; universalem scilicet affirmantem in negantem : vel, in qua loco subjecti & prædicati, ponitur utriusq; conversi contradictio : ut, *omnis homo est rationalis ; ergo quodcumq; non est rationale, non est homo : omne mortale est genitum ; ergo quod non est genitum, non est mortale ; vel, quod est non genitum, est non mortale : admittendi ad sacramenta, habent penitentiam & fidem ; ergo qui hæc non habent, non sunt admittendi.* Tres hosce modos conversionum ex *Aristot.* petunt : duos priores ex 1. Prior. c. 2. Tertium ex 2. Top. c. 1. syllogisticæ reductionis gratia, cujus inutilitas infra ostendetur, ab ipso inventos.

Conversione autem hac ne decipiamur fortè, neq; enim fidissima est, cautiones quædam adhiberi solent : prima, ne termini sint figurati ; ut, *panis est corpus Christi.* Secunda, ne quid mutiletur ; ut, *quidam cernit cæcum, ergo cæcus cernit quendam : totum enim prædicatum non est cæcum, sed cernit cæcum ; ut etiam in hac ; omnis senex fuit puer ; ergo quidem puer fuit senex ; non enim puer, sed fuit puer totum prædicatum est ; convertendum ergo, quidam qui fuit puer, est senex.* Tertia, ut casus obliqui à conversione facti, reddantur recti ; ut, *aliqua arbor est in agro ; ergo aliquod quod est in agro, est arbor, non sic, ergo aliquis ager est in arbore.*

Sed,

Sed, omissis istis cautionibus, expeditior
via est, conversionem omnem si dubia sit, tan-
quam sophisma petitionis principii rejicere;
ut quæ sine medio termino probare rem
dubiam conetur: de quo sophismate infra mo-
nebimus.

H

CAP.

CAP. V.

De Axiomate copulato.

Axioma compositum est quod vinculo conjunctionis continetur.

Hoc genus axiomatis *Aristoteles* totum prætermisit. Vulgò *propositio hypothetica* vocatur; i. e. conditionalis; angustè nimis; cùm ea vox compositis non omnib. conveniat, ut suo loco patebit. *Compositum* autem dicitur, quia sententia est multiplex, quæ in plures resolvi simplices potest: nec tamen dicendum est, ex simplicib. axiomatis componi, sed ex argumentis, quæ conjunctionis vinculo composita, multiplicem sententiam efficiunt: idcirco autem axioma componitur, quia argumenta in eo conjuncta consentiunt & compositionem appetunt. Nulla autem hic ratio habetur quantitatis, generale sit an speciale, sed tantum compositionis. Ut autem verbum fuit vinculum simplicis, ita conjunctio est axiomatis compositi, ejusq; proinde forma & quasi anima est.

Itaq; è conjunctione affirmata vel negata, affirmatur vel negatur. Conjunctione non negata, negatum axioma non erit, etiamsi partes omnes erunt negatæ.

*Contradictioni*q; pars vera est, pars falsa. De qua vulgus *Logicorum* fileat.

Enuntiatum compositum est pro sua conjunctione congregativum aut segregativum.

Congregativum est cuius partes tanquam simul vere, conjunctione sua congregantur. Conjunctione videlicet non solum illa Grammatica verum etiam sententiarum quavis relatione. Cum autem relatio ista, sive Grammatica sive Logica, multiplex sit, essentiae, consequentiae sive causae, quantitatis, qualitatis, temporis, loci, relatio quidem essentiae (cuius notae sunt is qui, id quod) & loci (cuius notae sunt ubi, ibi) ad simplicia axiomata referenda est; de reliquis suo loco.

Congregativum enuntiat omnia consentanea affirmando, omnia dissentanea negando. Hoc est, si unum consentaneorum subiecto attribuitur, alterum quoque attribuitur; & contra, uno negato, alterum negatur: si unum dissentaneorum de subiecto affirmatur, alterum negatur; & contra. Ita semper consentanea simul hic affirmanda vel neganda sunt, dissentanea non simul.

Congregativum verò est copulatum aut connexum. Copulatum, cuius conjunctio est copulativa. ut Aeneid. I.

*una Eurysq; Notusq; ruunt, creberq; procellis.
Africus.*

Hic igitur negatio erit & contradictio, negata conjunctione; non una Eurysq; Notusq; ruunt &c. Socrates & doctus erat & formosus: Socrates non & doctus erat & formosus. Quod si hoc modo negaretur, Socrates nec doctus erat nec formosus (qui modus contradictionis est adhibendus cum omnes partes sunt falsae) contradictio non esset axiomatica; non enim vinculum negaretur, sed partes: copulatio enim significat

utrumq; simul verum esse, ejus negatio non utrumque; at hæc negatio neutrum: acsi dictum esset, *Socrates & non doctus & non formosus erat*: deinde, in axiomate composito contradictionis pars una vera, altera est falsa; hîc autem utraq;: hoc ergo axioma, *Socrates nec doctus erat nec formosus*, est potius axioma copulatum affirmatum, cujus partes negantur. Copulati autem negatio per axioma etiam discretum fieri potest, cûm partes non omnes falsæ sunt; ut infra intelligitur. Conjunctio deniq; hîc sæpe non adest, sed intelligitur.

Verum autem enuntiati copulati judicium pendet ex omnium partium veritate; falsum, ex una saltem parte falsa. Hoc est axioma copulatum judicatur esse verum, si omnes partes simul veræ sunt; falsum, si vel una pars erit falsa. Idem tradit *Gellius*, l. 16. c. 8. In copulato enim axiomate, veritas omnium partium spectatur, quia partes omnes absolute enuntiantur tanquam simul veræ.

Huic generi affine est enuntiatum relatæ qualitatis, cujus conjunctio Logica potius est quàm Grammatica, nempe ipsa relatio.

Relata autem qualitas est plena similitudo: ut notæ ipsæ testantur; *qualis, talis, quemadmodum, sic.* Eclog. 3.

*Tale tuum carmen nobis, divine poëta,
quale sopor fessis in gramine.----*

Hîc copulatum judicium est tanquam diceretur, *Sopor est fessis gratus, & sic tuum carmen nobis gratum est*: cujus negatio, *Non tale tuum carmen, quale sopor, &c.*

Ad

Ad hunc etiam locum pertinet relatio quantitatis in plenīs comparationibus: quarum notæ sunt, cū à pari, *idem quod, tam quàm, tanto quāto, tot quot, eò quò*; tum à majori, *non solum, sed etiam*; tum à minori, *non modo non, sed ne* (quæ nota est copulati axiomatis affirmati, cuius partes negantur) *cū tum*. Relatio autem hæc & qualitatis & quantitatis si hypotheticè non absolute enuntiatur ad connexum potius referenda est.

Relationes autem loci ad axioma simplex rectius referuntur, ut supra est dictum. Neq; enim in huiusmodi exemplo, *ubi amici ibi opes*, est copulatum iudicium, sed simplex & quidem generale; scilicet, omnem divitem *amicos habere*.

CAP. VI.

De Axiomate connexo.

Axioma connexum est congregativum, cuius conjunctio est connexiva.

ut, si, nisi affirmativè. Idem enim valet *nisi*, quod *si non*: quo non totum axioma, sed antecedens tantum negatur: ut *Aneid. 2.*

----- *si miserum fortuna Sinonem
finxit, vanum etiam mendacemq; improba fingit.*

Cujus negatio est, negata conjunctione, Non si miserum fortuna Sinonem finxit, vanum etiam mendacemq; improba finget.

Conjunctio etiam hæc interdum negatur apertius, negando consequentiam. Ut, non continuò, non illicò, non idcirco, non ideo: his enim formulis non consequens axiomatis id. n. contradictionem non efficeret, sed ipsa partium consequentia quæ Logica conjunctio est apertius negatur: ut pro. Amer. Non continuò, si me in sicariorum gregem contuli, sicarius sum. De Fato: Nec si omne enuntiaturum verum est aut falsum, sequitur illicò causas esse immutabiles.

Affirmatio enim significat, si sit antecedens, etiam consequens esse. Negatio itaq; & contradictio statuit, si sit antecedens, non ideo consequens esse.

Potest & connexo per axioma discretum contradici: ut, quamvis omne enuntiaturum sit verum aut falsum, non tamen cause sunt mutabiles; quod sequente capite liquebit.

Sed cum judicabis connexum absolute, i. e. per se suâq; natura verum esse, necessarium quoque judicabis: & intelliges hanc necessitatem ex necessaria partium connexione oriri, quæ ipsa potest esse vel in falsis partibus.

ut, si homo est leo, est etiam quadrupes, necessarium connexum est; quia argumentorum, quæ hic connectuntur, leonis scilicet & quadrupedis, connexio est necessaria, speciei scilicet cum genere. Unde efficitur axioma generaliter verum ac proinde necessarium; omnis leo est quadrupes: quod in connexo indicium est absolutæ veritatis. Sic, si Socrates est homo, est etiam animal, absolute verum est & necessarium, quia omnis homo est

est animal: hujusq; connexi consequens falsum esse non potest, nisi antecedens quoq; falsum sit, quod aliud signum est absolutæ veritatis.

Quod si consequens falsum fuerit, falsum item est antecedens. *Si illud, hoc: si non hoc, ne illud quidem*, Atque ita, ut jam demonstravimus, si connexio absolute vera est, erit quoque necessaria: sin ex conditione & pacto, sine quo connexum per se suæque natura verum non esset, erit tantummodo contingens.

Quod si connexio sit contingens & pro sua tantum probabilitate ponatur, judicium ejus tantum opinio fuerit.

Ut, Terent. Andr.

Pamphile, si id facis, hodie postremum me vides.

Hoc est, si *Phitamenam* uxorem ducis, ego hodie moriar: quod nemo sequi existimaverit, nisi hoc posito, *Charinum*, qui hoc dicit, *Phitamenam* perditissimè amare. Per se enim nulla est connexionis necessitas inter nuptias *Pamphilæ* & interitum *Charini*. Qui autem ex amoris vehementia sic existimabit, ejus judicium non erit scientia, sed opinio.

Ut autem judicare possimus, quæ connexio sit absolutè vera, quæ non, spectanda argumenta sunt, quæ in axiomate connectuntur, consentiant inter se nec ne, & quo modo. Ut *si dies est, lux est*, connexum est necessarium, quia dies sive sol ortus est causa lucis. *Si dies est, Dio ambulat*, connexum est falsum aut contingens; quia nulla est affectio absolutè consentanea inter diem & *Dionem*.

Connexo axiomati affinis est ista consequentie relatio: quæ à nonnullis, relatio cause dicitur; & axioma efficit, quod Stoici causale nominant; Laërt. in Zenone: quia nempe antecedens est causa consequentis, adeóq; vinculum ejus conjunctio causalis cùm, quia, quoniam; quibus respondet ideo vel etiam: ut, cùm Tullius sit orator, est etiam peritus benè dicendi. Quanquam autem relata ista connexis affinia sunt, non nihil tamen discrepant: in antecedente enim connexi quædam conditio est, in hoc relato nulla: connexum potest ex falsis partibus verum esse, relatum hoc five causale non potest esse verum, nisi antecedens verum fuerit: ut, quia dies est, sol est supra horizontem.

Affinis est & relatio temporis axiomati connexo, ut ait ipse Ramus infra c. 13.

Relatio autem temporis has habet notas, tum cùm, donec dum, quandiu tandiu: ut apud Ovid. in epist.

*cùm Paris Oenone poterit spirare relicta.
ad fontem Xanthi versa recurret aqua.*

Sic, Donec eris felix, multos numerabis amicos.

Potest etiam connexum enuntiari sine ulla non modò relationis verum etiam connexionis nota: ut, posita causa, ponitur effectum. Fac hoc, & vires. Ovid in epist: sume fidem & pharetram, fies manifestus Apollo. Nonnunquam etiam duob. negativis: Cic. pro Milone: non hoc fragile corpus humanum mente regitur, & non regitur mente universum mundi corpus.

CAP. VII.

De Axiomate discreto.

Axioma segregativum est, cujus conjunctio est segregativa.

Ideoq; argumenta dissentanea enuntiat.

Enuntiatum segregativum est discretum aut disjunctum.

Discretum, cujus conjunctio est discretiva. Discretum dicitur, quòd conjunctione illa segregativa discernuntur & segregantur ea potissimum quæ leviter & ratione tantum dissentiunt.

Itaq; è dissentaneis præcipuè diversa enuntiat.

Præcipuè, quia diversorum notæ, non hoc, sed illud, ut superiore libro dictum est, in diversis nonnunquam solent oppositis inservire. Ut autem diversorum ita etiam discreti axiomatis doctrina distinctionib. duntaxat, non conclusionibus, idonea est; & à reliquis propterea Dialecticis, qui omnia ad syllogismum referunt, ommissa. Sed rationis usus quicumq; in Logica prætermittendus non erat. Exempli gratia: Tuscul. 5. Quanquam sensu corporis judicentur, ad animum referri tamen. Cujus negatio & contradictio est, non quamquam corporis sensu judicentur, tamen ad animum referri: vel, quamquam sensu corporis judicentur, non tamen ad animum referri. Nam tamen est hîc conjunctio præcipua. Quemadmodum autem copulati & connexi axiomatis negatio & contradictio discretum esse potest, ita vicissim copulatum vel connexum dis-

secreti : ut, *quanquam culpa vacat, non tamen suspicione caret* : cuius per copulatum contradictio est, & *culpa vacat, & suspicione caret* ; vel per connexum, *si culpa vacat, etiam suspicione caret.*

Discretum enuntiatum judicatur esse verum & legitimum, si partes non solum veræ, sed etiam discretæ sint ; falsum vel ridiculum contra.

Ut, *quanquam Ulysses formosus erat, tamen non erat infacundus*, falsum est, quia antecedens est falsum. Sed si consequens modò verum est, axioma verum erit, etiamsi antecedens verum esse tantummodo concedatur. Hoc autem. *Quanquam Menelaus formosus erat, tamen erat facundus*, non est discretum, sed ne segregativum quidem : omnis enim segregativi axiomatis partes tanquam non simul veræ segregantur, hic verò tanquam simul veræ congregantur. *Quanquam Ulysses facundus erat, non tamen erat indisertus*, est ridiculum, quia partes non sunt discretæ sed oppositæ.

C A P. VIII.

De Axiomate disjuncto.

Axioma disjunctum est axioma segregativum, cujus conjunctio est disjunctiva.

Ut, aut dies est, aut nox est. Aut vera est haec enuntiatio aut falsa. Nam ut ex Cicerone citatur hoc exemplum, omnis enuntiatio vera est aut falsa, videtur esse distributio potius quam disjunctio. Distributio autem quatenus de toto diviso partes enuntiantur, axioma simplex & generale est, adeoq; non compositum nedum disjunctum. Neq; enim distributionis partes, quamvis inter se oppositæ, oppositionem vel disjunctionem ullam faciunt, sed eidem toti subjiciuntur, & in ejusdem simplicis axiomatis consequente verbi vinculo cum toto, quod antecedens est, consentiunt; at extra distributionem, ubi non de toto, sed de aliqua ejus parte vel specie enuntiantur, tum demum axioma disjunctum efficiunt; ut, quod supra posuimus, haec enuntiatio aut vera est aut falsa.

Hic significatur è disjunctis unicum verum esse.

Nempe quia opposita hic sola disponi debent. Atq; id semper à differente significatur, tametsi

etsi aliquando accidit, ut disjunctorum vel plura uno, vel nullum omnino verum sit. Negatio igitur & contradictio erit, *non aut dies aut nox est.*

Et contradictione significatur, non necessario alterutrum verum esse.

Nam si disjunctio absolute vera est, est etiam necessaria; partesq; disjuncta sunt opposita sine ullo medio. De quibus vide superioris libri caput de contradicentibus.

Veruntamen quamvis absolute vera disjunctio, necessaria quoq; sit; tamen nihil necesse est partes separatim necessarias esse.

Ut, cras aut pluet aut non pluet, disjunctio est necessaria, quia ex contradicentibus constat, quæ sunt contraria sine medio: & tamen, cras pluet & cras non pluet, utrumq; contingens axioma est. Sic, homo aut bonus est aut non bonus, &c.

Nam disjunctionis necessitas pendet è necessaria partium oppositione & disjunctione non ex earum necessaria veritate.

Hinc argumentum illud dissolvitur Chrysippi Stoici aliorumq; veterum, apud Ciceronem de Fato; quo probare sunt conati, futura omnia esse necessaria & quasi fatalia, eò quòd necesse sit ea aut vera esse aut falsa. Disjunctio quidem, ut diximus, necessaria est; pars tamen disjunctionis alterutra talis erit, qualis causa ejus est; five necessaria, five contingens, i. e. vel libera, vel fortuita.

Atq;

Atq; hæc de necessaria disjunctione, cujus judicium scientia est.

Disjunctio autem saepe est ex conditione.

ut si queratur utrum Cleon venerit an Socrates, quia ita pactum sit alterutrum tantum venturum esse.

Itaque si disjunctio sit contingens (contingens autem est, si partes medium habent) non est absolute vera, sed tantum opinabilis.

Qualis est frequenter in hominum usu. ut Cæsar ad matrem: hodie me aut pontificem videbis, aut exulem. Ovid. in epistola Leandri.

*Aut mihi continget felix audacia salvo,
aut mors solliciti finis amoris erit.*

C A P. IX.

De Syllogismo & ejus partibus.

ATq; ejusmodi dispositio est axiomatica five noëtica axiomatis per se manifesti: sequitur dianoëtica.

Dianoëtica est cum aliud axioma ex alio deducitur.

Vox Græca *Νάνοια*, mentis & rationis discursum significat; qui tum fit maximè cum sen-

sententia alia ex alia ratiocinando deducitur.

Dispositio dianoetica est syllogismus aut methodus.

Syllogismus est dispositio dianoetica qua questio cum argumento ita disponitur, ut posito antecedente, necessario concludatur.

Est dianoia: est ergo discursus mentis ac rationis quo aliud ex alio ratiocinando colligitur: eam ratiocinantis quasi collectionem vox ipsa syllogismi significat: quæ quidem collectio five deductio ab Intellectus humani imbecillitate profecta est: quæ cum rerum veritatem & falsitatem primo intuitu perspicere in axioma non potest, ad syllogismum se confert, in quo de consequentia & inconsequentia earum judicare possit.

Cum itaque axioma dubium est, questio efficitur, & ad ejus fidem tertio argumento est opus cum questione collocato.

Questionis partes vulgò termini appellantur; & antecedens quidem minor terminus, consequens major terminus dicitur; quia antecedente latius ferè est consequens. Tertium autem argumentum ab Aristot. medium & medius terminus dicitur. Non quo semper medius inter duos questionis terminos in syllogismo collocetur, sed eò quòd quasi arbiter de consensu eorum inter se aut dissensu, disceptat & judicat. Atq; hæc sunt tria illa argumenta, ex quibus solis omnis syllogismus conficitur; duo scilicet questionis, & tertium argumentum; quæ vulgò tres termini dicuntur. Termini autem isti non semper simplices sunt voces, sed orationes nonnunquam longiusculæ; nec semper casibus rectis,

rectis, sed obliquis interdum efferuntur.

Partes syllogismi due sunt; antecedens & consequens. Antecedens syllogismi pars est, in qua questio cum argumento disponitur.

Syllogismi antecedens partes duas habet, propositionem & assumptionem: quæ vulgò præmissæ nominatur.

Propositio est prior pars antecedentis, qua questionis saltem consequens cum argumento disponitur.

Saltem; quia nonnunquam tota questio cum argumento in propositione disponitur, ut infra patebit.

Propositio vulgò major dicitur; vel quia maiorem vim habet (est enim argumentationis quasi basis & fundamentum) vel quia major terminus, i. e. consequens questionis in propositione collocatur.

Assumptio est secunda pars antecedentis, quæ assumitur è propositione.

Assumitur enim inde vel tertium argumentum vel tota assumptio, ut infra perspicietur. Hinc itaq; argumentum tertium, sive medius terminus, dignoscitur, quòd bis ponitur ante conclusionem. Assumptio vulgò minor propositio dicitur, vel quia minorem vim obtinet, ex propositione videlicet deductam; vel quia minor terminus, i. e. antecedens questionis, in ea sæpe disponi soleat, non semper, ut infra intelligemus.

Syllogismi autem pars consequens est, quæ completitur partes questionis, eamq; concludit. unde complexio & conclusio dicitur.

Hinc sequitur, conclusionem & verbis & terminorum ordine, eandem planè esse cum propositione

sita quæstione oportere; alioqui syllogismi fidem claudicare, & quasi depositum non reddere. Secundo hinc intelligitur illa regula, *tertium argumentum sive medius terminus nunquam ingreditur conclusionem*. Ratio est, quia medium non est id quod concluditur, neq; de quo quicquam; sed id, quo adhibito, quæstio concluditur, vel duo ejus termini inter se consentire aut dissentire judicantur. Medius itaq; terminus aut ulla pars ejus in conclusione si sit, syllogismus vitiosum facit; id facillime deprehenditur, si non solum quæstio proposita, sed præterea aliquid quod bis erat in præmissis repetitum, conclusionem intrat.

Cum autem in omni syllogismo, ut ex ejus definitione constat, quæstio cum argumento ita disponatur, ut posito antecedente, i. e. concessis præmissis, necessario concludatur: quæ necessitas non consequentis, sed consequentiæ, non materiæ, sed formæ est. hinc intelligitur, nullam in syllogismi forma differentiam esse contingentis & necessarij, sed syllogismum omnem necessario concludere, teste etiam *Aristot. Prior. 1. 33*; eamq; necessitatem ex legitima dispositione quæstionis cum tertio argumento, non ex necessaria partium in antecedente dispositarum veritate pendere. Unde & illi redarguuntur, qui vulgò dividunt syllogismum in dialecticum & apodicticum, probabilem scilicet & demonstrativum, sive necessarium cum & illa distinctio axiomatum sit, & syllogismi consequentia tam in contingenti, immo in falso necessaria sit, quàm in vero & necessario; immo ex falsis præmissis conclusio nunc vera nunc falsa necessario sequatur: ut, *omnis leo est quadrupes: Socrates*

Socrates est leo ; ergo Socrates est quadrupes. In quo simile quiddam habet syllogismus axiomati connexo, & fortasse originem ab eo ducit : nam ut connexum necessarium esse potest ex falsis partibus, modò ipsa connexio sit vera ; ut, *si leo est quadrupes, & Socrates leo, Socrates necessario est quadrupes* ; sic syllogismus necessario concludit ex veris quidem partibus nil nisi verum, ex falsis & falsum & verum, modò ipsa dispositio sit legitima.

Quòd autem *Aristotelici* syllogismum dividunt in verum & falsum sive apparentem ; verum, cujus materia vera est, in dialecticum sive probabilem, cujus materia contingens est, & apodicticum sive demonstrativum ac necessarium, eumq; vel perfectum, quæ vocatur *διόν* sive à priori, quo accidens de subiecto per causam vel efficientem vel finalem positam quidem affirmatur, remotam verò negatur ; & in imperfectum quæ vocatur *τῷ ὄν* sive à posteriori, quo accidens de subiecto per effectum probatur, hæc quidem divisio, qualiscunq; est, eum axiomatis propria sit, & vel ad formam syllogismi ut in dialectico & apodictico, vel omninò ad artem, ut in falso sive sophistico nihil pertineat, melius rejicitur.

Appendix de paralogismis qui hac generali doctrina syllogismi redarguuntur.

ATq; hæc syllogismi doctrina generalis fuit. Et rectum quidem index est sui & obliqui, & veritatis doctrina rectè tradita, errorem omnem ipsa per se indicat atq; etiam redarguit. Verùm cum non sit ea cujusq; hominis perspicacia aut ingenii felicitas, ut vel omnes technas adversarii animadvertere ex ipsis regulis, vel omnes artis regulas memoria tenere semper queat, alienum non erit de præcipuis capitonibus quæ committere in hanc generalem syllogismi doctrinam solent, seorsim hic aliquid monere.

Cum itaq; syllogismi doctrina generali doceamur, tria duntaxat argumenta sive tres terminos in syllogismo disponi oportere, hinc facile perspicuum est, peccare omnem syllogismum in hanc doctrinam generalem, in quo termini vel plures ternis disponantur, vel pauciores: termini autem non tam sunt verba, quàm verborum sensus & significationes.

Peccatur autem terminis pluribus, vel apertius vel rectius. Apertius, (ut puerilia de accentu, figurâ dictionis, plurium, quæ dicitur interrogationum, & similia omittam) cum tres termini distinctè numerantur in propositione: ut, *quia est bonus & dialecticus, is est bonus dialecticus*; *Cleanthes est bonus & dialecticus*; ergo, *est*

est bonus dialecticus. Hæc fallacia compositionis dicitur; quia divisa male componit. Contra; qui est bonus dialecticus, is est bonus & dialecticus; Cleanthes &c. Hæc fallacia est divisionis; quia composita male dividit; vel quia composita proponit, divisa concludit. Idem committitur etiam sine conjunctione: ut, bonus citharædus est bonus; Nero est bonus citharædus; ergo, bonus. bonus duplici significatione cum citharædo disponitur, in propositione; quatuor ergo termini. Sic etiam cum non iisdem verbis aliud planè proponitur, aliud assumitur: ut, dextera Dei est ubiq; ; humanitas Christi sedet ad dextram Dei; ergo, humanitas Christi est ubiq; .

Tectius verò peccatur, vel homonymia, vel amphibolia.

Homonymia sive equivocatio est, primò, cum simplicis vocis seu termini unius, significatio duplex ponitur: ut, leo est bestia; leo est Papa; ergo, Papa est bestia. Secundò, cum argumentum in una parte propriè, in altera tropicè ponitur; vel in una parte pro re ipsa, in altera pro artificiali aliqua notione rei. Huiusmodi sunt artium vocabula: ut, potens est participium; rex est potens; ergo, rex est participium. Animal est genus; homo est animal; ergo, homo est genus.

Amphibolia sive ambiguitas vel in syntaxi est, vel in ipsa re. In syntaxi; ut, pecunia que est Cesaris, possidetur à Cesare; hæc pecunia est Cesaris; ergo, possidetur à Cesare. Ambiguitas in ipsa re, quæ & prava expositio vocatur, fit, cum affectio rei non eadem assumitur quæ proponitur; mutata autem affectione, mutatur argumentum; ut, quas carnes emisti, comedisti; crudas emisti; ergo, crudas comedisti. Hic propositio & de carnibus.

carnibus & de substantia carnum loquitur; assumptio, de qualitate earum: dicendum ergo erat, *quales carnes emisti, &c.* Eadem est fallacia cum id quod in abstracto, quod aiunt, proponitur, in concreto assumitur: ut, *candidum est disgregativum visus*; *paries est candidus*; ergo, *paries est disgregativum visus*. Etiam cum in ipsa copula quartus terminus latet: ut, *fortitudo non est clementia*; *principis est fortitudo*; ergo, *principis non est clementia*. Hic verbum est in maiore esse, in minore habere significat; casumq; mutationem rectorum in obliquos inducit; qui quatuor esse terminos declarant. *Nullus puer diu vixit*; *Nestor fuit puer*; ergo, *Nestor non diu vixit*. Hic major de eo qui est, minor de eo qui fuit puer loquitur; qui duo termini sunt. Quatuor deniq; sunt termini cum pius est in conclusione quam in præmissis.

Pauciores autem termini sunt ternis, cum tertium argumentum deest. Hoc fit quoties vel idem sensu vel æque obscurum pro argumento sumitur; (idem enim non est tertium; æque obscurum non est argumentum) quæ *petitio principii*, vel, ejus quod erat in principio nominatur; quia postulatur ipsa quæstio ut gratis, i. e. sine argumento concedatur: ut, *ensis est acutus*; *gladius est ensis*; ergo, *gladius est acutus*. Vel, quod omnis homo est, id singuli homines sunt; *omnis homo est justus*; ergo, *singuli homines sunt justi*. Huc refer jactatum illud, *Quæ non amisisti habes*, *cornua non amisisti*, ergo *cornua habes*. Habere & amittere privantia sunt & quidem sine medio quatenus talia, ergo non amittere & habere sunt idem, nullus itaq; hic est medius terminus, sed perinde ac si dice-

diceres ; Quæ habes, habes, cornua habes, ergo habes. Hujus generis est, cum tertium argumentum non integrum è propositione assumitur : ut, *omnes apostoli sunt duodecim; Petrus & Joannes sunt apostoli; ergo, Petrus ut Joannes sunt duodecim.* Hic omnes collectivè sumptum, pars est tertii argumenti, quod totum erat in assumptione assumendum. Ad hoc sophisma referendæ sunt deniq; omnes conversiones enuntiationum ; quoties rem dubiam non argumento five medio termino, sed conversione sola probare contendunt : de qua suprà monuimus. Atq; his ferè modis in formam syllogismi generalem peccatur.

Materia syllogismi vitiosa est, quoties antecedentis pars vel altera vel utraq; est falsa : id fit tot modis, quot sunt argumentorum genera. Quorum cum veritas tum falsitas quanquam in axiomaticè judicatur, propterea tamen quòd argumenta ipsa in syllogismo disponuntur, qui modi præcipuè nominantur à Dialecticis vel materia sola, vel partim materia, partim forma vitiosi, eos hîc breviter attingemus.

Primus est materiæ solius : diciturq; *non cause ut cause.* Causæ autem nomen hîc usurpatur pro quovis argumento, etiam non effecti ut effecti, non subjecti ut subjecti, & sic deinceps. Hanc captionem singulorum argumentorum definitiones facile refellunt.

Secundus est quæ vocatur fallacia *accidentis*, five, quod idem est, à dicto secundum quid ad dictum simpliciter : vel contrà, à dicto simpliciter ad dictum secundum quid ; quoties id quod adjuncti est, subjecto attribuitur ; aut contrà quod subjecti, adjuncto : ut, *quæ non restituenda sunt domino furioso, non restituenda sunt domino ;*
arma

arma non restituenda sunt domino furioso; ergo, non domino: vel contra: quæ restituenda sunt domino, etiam domino furioso; arma domino; ergo, domino furioso. In his propositio semper falsa est.

Tertius est *ignoratio elenchi*; (*elenchus* autem est redargutio quælibet five vera five falsa) cùm leges oppositionis non observantur eidem numero, secundum idem, ad idem, & eodem tempore: ut, *cæci vident; qui carent visu, sunt cæci; ergo, qui carent visu, vident.* Propositio distinguenda est; nempe, qui fuerunt cæci, nunc vident. Sic; *is qui non videt, cæcus est; dormiens non videt; est ergo cæcus.* Ad idem non est: propositio enim de potentia, assumptio de actu videndi loquitur; vel quatuor sunt termini, & prava expositio dici potest. Aliis *ignoratio elenchi* est, cùm vel planè mutatur & torquetur status controversiæ, vel conclusio adversarii non directè opponitur nostræ thesi secundum canones legitimæ oppositionis.

Quartus est fallacia *consequentis*, five comparatorum, quæ è contrariis quidem sunt orta, sed parium collatione tractata, cùm disputatur, contraria esse contrariorum consequentia: quam regulam esse fallacem, l. 1. c. 18. copiotè ostenditur: ut, *quæ eidem æqualia, inter se æqualia; ergo, quæ eidem sunt inæqualia, inter se sunt inæqualia.* Ut, 2. et 2. sunt inæquales ad 5; ergo sunt inter se inæquales. Duo latera quadrati symmetra non sunt diagonio; ergo non sunt inter se.

C A P. X.

De Syllogismo simplici contracto.

Syllogismus est simplex aut compositus.

Simplex, ubi pars consequens questionis disponitur in propositione, pars antecedens in assumptione.

Ut syllogismi forma generalis erat dispositio questionis cum argumento, ita specialis quæq; dispositio questionis cum argumento cuiusq; speciei forma est. Ex. gr. homo est animal: Socrates est homo; ergo Socrates est animal. Hinc facile perspicitur, si questionis terminus major non disponatur in propositione maiore, minor in minore, syllogismus non esse legitimum. Quod si aliquando usu venit, ut antecedens questionis in propositione & consequens in assumptione disponi videatur, intelligere debemus syllogismi partes inverti: ut, Socrates est homo: homo est animal; ergo Socrates est animal.

Sequitur jam syllogismi simplicis distinctio in adjunctos modos, qui ex partium, i. e. axiomatum affectione oriuntur.

Syllogismus simplex est affirmatus & partib. omnib. affirmatis. Negatus ex negata antecedentis parte altera cum complexione. Non ex omnib. negatis, ut affirmatus ex omnibus affirmatis; nisi enim argumentum tertium cum altera parte questionis consentiat, nihil probat.

Ut

Ut autem syllogismorum tota ratio intelligatur (quod hoc loco fieri commodissimè posse arbitror) sciendum est eam duab. præcipuè legibus fundari; altera parium, altera generis ex loco petita. Ex parium loco; quæ conveniunt in uno aliquo tertio, conveniunt inter se; & contrà, quæ non in uno tertio, non inter se. Ex loco generis; quod generi generaliter attribuitur, id omnib. etiam attribuitur speciebus quæ sub eo genere continentur. Hæc regula vocatur in scholis, dictum de omni & nullo. Illa à Geometris primum sensu præeunte facilius inventa est; & præcipitur Aristot. I. Prior. c. I. Ut enim illic norma, si duab. lineis æque conveniat, eas lineas demonstrat convenire inter se, sive esse æquales; eodem planè modo medius terminus si duob. conclusionis terminis conveniat, velut norma demonstrat, convenire duos illos inter se; & contrà. Itaq; si quæstio affirmanda est, quærendum est per omnes inventiones locos argumentum quod utriq; parti quæstionis conveniat: si neganda est, quærendum quod uni parti conveniat, ab altera dissentiat; nam si ab utraq; parte dissentit, tertium argumentum esse non poterit, nihil. n. probabit. Ex. gr. quæritur *an Socrates sit animal*? Si affirmanda est hæc quæstio, ad illa duo argumenta quæ in quæstione sunt, *Socrates* & *animal*, quærendum aliquod tertium argumentum est, quod cum utraq; parte quæstionis consentiat. Ejusmodi autem est *homo*: nam *homo* convenit cum *animali*, ut species cum suo genere; cum *Socrate*, ut gænus cum sua specie; ergo *Socrates* & *animal* conveniunt inter se; adeoq; *Socrates est animal*. Sin neganda est quæstio, ut, *Socrates non est bestia*, quærendum est

est argumentum tertium, quod ab altera tantum parte dissentiat. Hujusmodi autem est homo : homo n. non est bestia, at Socrates est homo ; ergo Socrates non est bestia. Sin medius cum neutro quæstionis termino conveniat, neutrius norma esse potest ; neq; ostendit, inter se conveniant, necne ; neq; de omni dicit neq; de nullo ; adeoque ; nec probat quicquam nec refellit. Unde illa regula ; ex utraq; præmissa negata nihil concluditur ; Aristot. 1. prior. c. 24. ut, nullus lapis est animal : nullus homo est lapis ; nullus igitur homo est animal. Excipitur tamen ab hac regula, si medius terminus sit negatus, vel duplex negatio sit in majore : ut, quod non sentit, non est animal : planta non sentit ; ergo planta non est animal. Hic enim major, quæ videtur esse negata, æquipollet affirmatæ ; eadēq; est acsi diceret, omne quod sentit, est animal : negationesq; istæ topicæ potius & infinitæ, quàm axiomatice sunt, partiūq; negationes non totius axiomatis, hoc potius modo enuntiandi, quod est non sentiens, est non animal : & hoc affirmatum planè axioma est. Sed hac de re plura dicemus infra cap. 12. ad secundam speciem explicati. Cur autem complexio, negata antecedentis parte altera, negata quoq; esse debet, ratio est, trita illa regula, conclusio sequitur partem debiliorem ; negatūq; debilius est affirmato, particulare generali, contingens necessario. Regulæ autem ratio est, quia conclusio est præmissarum quasi effectum : nullum autem effectum est toto genere dignius aut fortius sua causa. Fallit ergo hic paralogismus : qui non differt à bruto, differt à Sophronisci filio : Socrates non differt à Sophronisci filio ; ergo non à bruto. Hæc conclusio non se-

I

quitur,

quitur, uti debuit, assumptionem negatum, sed propositionem affirmatam : & enim non differt à bruto non propositionis totius, sed antecedentis duntaxat ejus est negatio : idemq; valet, ac si affirmatum sic esset ; qui idem est cum bruto. Sequitur autem conclusio five consequens partem antecedentis negatam non affirmatam, quia si partes conclusionis non consentiunt in argumento tertio, non consentiunt inter se : sequitur partem specialem, non generalem, quia genus concludit speciem, non species genus ; juxta illud superius dictum de omni & nullo.

Syllogismus simplex (nimirum qui ex simplicibus axiomatis constat) est vel generalis, vel specialis, vel proprius.

Generalis è propositione & assumptione generalibus.

Non ex generali etiam conclusionē, ut patebit infra.

Specialis est ex altera tantum generali.

Hæc enim regula firmissima quoque est, ex utraque præmissa particulari nihil concluditur. Exigit enim dictum de omni & nullo partem antecedentis unam saltem generalem : nec non in duabus particularibus quatuor sunt termini : cum enim individua, quæ vocant, vaga, particulares propositiones faciunt, fit ut de alio subjecto major, de alio minor ferè loquatur : ut, quoddam animal est homo : quoddam animal est brutum ; ergo quoddam brutum est homo. Quidam sunt divites : quidam sunt docti ; ergo quidam divites.

Proprius est ex utraque propria.

Cur autem ex utraque propria cum non ex utraque particulari, quia nempe hæc certa sunt & de eodem dicta, illa vaga, ut supra.

Hinc liquet, cur ut axioma, ita syllogismus specialis in particularem & proprium dividi non potuerit, cum syllogismus proprius non sit species syllogismi specialis. Quare autem partes omnes non sint propriae, i. e. axiomata propria, infra etiam apparebit. Et syllogismus quidem proprius, etsi ab Aristotele neglectus, ab aliis rejectus sit, usum tamen frequentissimum habet.

Simplex syllogismus est contractus partibus, vel explicatus.

Aristoteles in tres figuras dividit syllogismum; primam, secundam, & tertiam. Verum hanc Rami dichotomiam esse commodiorem & naturæ ordini aptius respondere, res ipsa demonstrabit.

Contractus syllogismus est, cum exemplum pro argumento ita subjicitur particulari questioni, ut utramque ejus partem antecedere & assumptione affirmatum esse intelligatur.

Exempli gratia: quædam confidentia est virtus, ut constantia. Quædam confidentia non est virtus, ut audacia.

In his, ut cernimus, primò, questio particularis duntaxat proponitur; generale enim, ut inquit Aristot. pr. 1. 6. & 2. 7. in hac specie, quæ tertia nimirum Arist. figura est, concludere non licet: addo etiam, neque proprium; quæ ratio est, cur syllogismus generalis non ex omnibus

generalibus & proprium non ex omnibus propriis definitur, cum in hac specie consequens sive conclusio debeat semper esse particularis, etiam si utraq; pars antecedentis generalis aut propria fuerit: unde sequitur, particulares duntaxat quaestionis in hac specie concludi. Deinde exemplum speciale pro argumento subjicitur sive subjungitur, ut *constantia*.

Hujus autem syllogismi dispositio specialis hac esse intelligitur, si contractum explicamus (tamen nunquam ferè nisi contractus in usu occurrit) ut exemplum sive argumentum tertium, primo utramq; partem quaestionis in praemissis, quod aiunt, antecedar, sive praemissae utriusq; subjectum sit.

Hic autem argumentum sive exemplum utramq; partem quaestionis antecedere intelligitur, quia quaestionis pars utraq; argumento sive exemplo attribuitur, i. e. de eo vel affirmatur vel negatur; perinde quasi explicatè diceretur, *constantiam esse virtutem; & esse confidentiam; ergo quandam confidentiam esse virtutem*. Item, *audaciam non esse virtutem; & tamen esse confidentiam; ideoq; quandam confidentiam non esse virtutem*. Exemplum ergo sive argumentum tertium in contracto, etsi quaestioni subjicitur, tamen si contractum explicas, & propositionis & assumptionis antecedens sive subjectum esse repetitur. Est autem contractus enthymematis quaedam species, quae cum explicatur, in peculiarem quandam syllogismi formam resolvitur, ideoq; erat specialiter docenda. Secundò, postulat hujus syllogismi dispositio, ut assumptio semper affirmetur. Cum enim tertium argumentum speciale exemplum sit, adeoq; species antecedentis sive minoris termini

termini quæstionis qui in assumptione semper disponitur, atq; ita antecedens sit tertii argumenti genus; necesse est, genus de specie semper affirmari.

Atque ista expositio quæstionis per exemplum quod subijcitur, principium syllogismi partibus explicati ab Aristot. 1. pr. 6, &c. efficitur, tanquam per se pleno syllogismi iudicio clarior & illustrior.

Prior ergo est ordinē syllogismus contractus explicato, cum quia clarior, tum quia simplicior: est autem ita clarus, ut mens eum, sicuti est contractus, antè percipiat, quàm partibus explicari possit; idèoq; usus differendi contracta hac forma contentus, formam explicatum rarissime solet adhibere. Claritas autem ejus eximia vel hinc perspicitur; quòd cum duo duntaxat hujus speciei sint sophismata, eorum inanitatem contracta hujus syllogismi forma facilius detegit quàm explicata, ut infra ostendatur.

Ad tollendum itaq; dubitationem, non hic supplendæ syllogismi partes, ut in enthymemate, sed contrahendæ; contractum quippe explicatò hic est explicatius, & ab iudicio syllogismi ad axiomatis clarius iudicium hic est quasi provocandum & regrediendum.

Quod ad modos attinet hujus speciei, si contractam tantummodo formam spectamus, pluribus non est opus quàm duobus; uno affirmato, altero negato: quia non refert, utrum exemplum subalterna sit species an specialissima. Sin explicatam hanc speciem spectamus, plures habet modos quàm species reliquæ: quatuor autem sunt affirmati, totidem negati; quorum duo sunt generales, quatuor speciales, duo proprii; qua-

quatuor autem sunt in hac specie speciales modi, cum in reliquis bini tantum sint; quia in hac specie propositio potest esse vel generalis vel particularis, in reliquis verò nunquam particularis est. Exempla hæc sunt.

Primus modus est affirmatus generalis: ut, *constantia est virtus: constantia est confidentia; ergo quedam confidentia est virtus.*

Secundus est negatus generalis: ut, *audacia non est virtus: audacia est confidentia; ergo quedam confidentia non est virtus.*

Affirmatus specialis duplex est; tertius & quartus. Tertius, cuius propositio est particularis: ut, *quidam sapiens est dives: omnis sapiens est laudabilis; ergo quidam laudabilis est dives.*

Quartus, cuius propositio est generalis: ut, *omnis sapiens est laudabilis, quidam sapiens est pauper; ergo quidam pauper est laudabilis.*

Negatus item specialis est duplex; quintus & sextus. Quintus, cuius propositio est particularis: ut, *quidam stultus non est fortunatus: omnis stultus est contemptus; ergo quidam contemptus non est fortunatus.*

Sextus, cuius propositio est generalis: ut, *stultus non est beatus: quidam stultus est fortunatus; ergo quidam fortunatus non est beatus.*

Reliqui duo proprii sunt, cum exemplum est species specialissima sive individuum. Affirmatus est, *Socrates est Philosophus: Socrates est homo; ergo quidam homo est Philosophus.* Negatus est, *Thersites non est Philosophus: Thersites est homo; ergo quidam homo non est Philosophus.*

Contracti syllogismi duo vitia sive sophismata sunt, quæ definitione precaventur. Unum, &

questio

quæstio five conclusio particularis non sit: ut, *omnis homo est rationalis: omnis homo est animal; ergo omne animal est rationale*, ratio est, quia id quod non generaliter attribuitur in assumptione (non enim omne animal est homo) non potest esse generale subjectum conclusionis. Alterum est, cum assumptio est negata: ut, *homo est animal: homo non est bestia; ergo bestia non est animal*. Quæ duo sophismata in contracta hujus syllogismi forma, facilius, ut suprâdixi, deteguntur, & primo statim intuitu ridentur: ut, *omne animal est rationale, ut homo: quedam bestia non est animal, ut homo*.

CAP. XI.

De Prima specie syllogismi simplicis explicati,

SYllogismus explicatus præter ipsum nomen aliam definitionem non desiderat. Dicitur *explicatus*, non quod semper omnibus occurrat partibus explicatus, sic enim vix millesimus quisque syllogismus occurrit, sed quod partes non modo in forma integra, verum etiam in enthymemate semper distinctas habet.

In syllogismo explicato propositio est generalis aut propria; & conclusio similis antecedenti aut parti debiliori.

Similis, nempe & qualitate & quantitate: antecedenti, utriusque scilicet ejus parti, propositioni

& assumptioni, si ipsi inter se similes sunt, five affirmatæ five generales five propriæ ; sin dissimiles, parti debiliori, ut suprà.

Syllogismi explicati species duæ sunt. Prima, ubi argumentum semper sequitur, negatum in altera parte.

Hæc prima species explicati, figura secunda ab Aristotele dicitur. Prior autem hæc species efficitur, quia dispositio ejus est simplicior, ut ex altera specie collatâ comperiemus. Sequitur autem semper argumentum partem utramq; quæstionis, consequentem in propositione, antecedentem in assumptione: unde ab Aristot. pr. 1. 5. prædicatum de ambabus dicitur. Negatum autem dicitur argumentum in altera parte, quia pars altera, vel propositio nempe vel assumptio semper est negata. Unde cùm negata etiam conclusio semper necessariò sit, sequitur, hujus speciei modos omnes negatos esse, & negatas duntaxat quæstiones hac specie concludi, quæ omnis in refutationibus est posita.

Modi hujus syllogismi sex sunt ; & omnes quidem, ut diximus, negati ; duo generales, duo speciales, duo proprii.

Generalis primus, cujus propositio negatur: *Turbatus non bene utitur ratione : sapiens bene utitur ratione ; sapiens igitur non est turbatus.* Hoc exemplum in sua crypsi sic apud Ciceronem est 3 Tuscul. *Quemadmodum oculus conturbatus non est probè affectus ad suum munus fungendum, & relique partes totumq; corpus à statu cùm est motum, deest officio suo ac muneri ; sic conturbatus animus non est probè affectus ad exequendum munus suum.*

suum. Munus autem animi est ratione uti: & sapientis animus ita semper affectus est, ut ratione optime utatur; nunquam igitur est perturbatus. Crypsis hic unica redundantia est: nam ordo partium rectus est, nec ulla pars deest: prosyllogismus unus est propositionis; illustratur enim propositio similitudine plena, cujus redditio est ipsius propositionis sententia.

Generalis secundus, cujus assumptio negatur res mortalis est composita: animus non est compositus; animus igitur non est mortalis. Hic syllogismus crypsi involutus est apud Cic. I. Tuscul. quo is iudicat animum immortalem esse. In animi autem cognitione, inquit, dubitare non possumus, nisi forte in physicis plumbei sumus, quin nihil sit animus admixtum, nihil concretum, nihil coagmentatum, nihil duplex. Quod cum ita sit, certe nec secerni, nec dividi, nec discerpi, nec distrahi potest; nec interire igitur: est enim interitus quasi distectus. & secretio ac diremptus earum partium quae ante interitum iunctione aliqua tenebantur. In hoc exemplo partium ordo invertitur: nam postremo in loco propositionis sententia ponitur, interitum esse scilicet rerum compositarum: assumptio occurrit prima, in animi autem cognitione &c. Et ornatur synonymis: conclusio media est atque a causa illustratur; ergo nec secerni &c., nec interire igitur.

Specialis primus est, cujus propositio negatur: lividus non est magnanimus: Maximus igitur non est lividus. Hoc iudicio Ovidius 3. de pont. eleg. 3. concludit.

Quis non videt non magnanimum esse lividum? I 5. non est Livor,

Livor, iners vitium; mores non exit in altos;
 atq; latens ima vipera serpit humo.
 Mens tua sublimis supra genus eminet ipsum.
 Grandius ingenio nec tibi nomen inest.
 Ergo, alii nocent, miseris, optentq; timeri,
 tuncq; mordaci spicula felle gerant.
 At tua supplicibus domus est assueta juvandis;
 in quorum numero me precor esse velis.

Hujus etiam exempli crypsis redundantia sola est: propositio suos habet prosyllogismos, & livor pro livido ponitur, adjunctum pro subiecto; & illustratur à contrario abjecto; isq; à simili, *vipera*: assumptio, i. e. *Maximi* magnanimitas, illustratur partim à minori totius generis magnanimitate, partim à notatione nominis ejus, i. e. *Maximi*; cujus parem esse animi magnitudinem demonstrat: conclusio negat *Maximum* esse lividum, partim quia dissimilis sit lividorum, quos describit ab effectis, ergo alii noceant &c; partim, quia ipse faciat quæ magnanimus consuevit, qui disparatus à livido est; at tua supplicibus &c.

Specialis secundus est, cujus assumptio negatur: Saltator est luxuriosus: *Murena* non est luxuriosus; *Murena* igitur non est saltator. *Cic. pro Muren.* Nemo enim ferè saltat sobrius, nisi fortè insanet: neq; in solitudine neq; in convivio moderato atq; honesto. Intempestivi convivii, ameni loci, multarum deliciarum comes est extrema saltatio. Tu mihi arripis id quod necesse est omnium vitiorum esse postremum: relinquis illa quibus remotis, hoc vitium omnino esse non potest: nullum turpe convivium, non amor, non comessatio, non libido, non sumptus ostenditur: & cum

*ea non reperiannur quæ voluptatis nomen habent
queq; vitiosa sunt, in quo ipsam luxuriam repe-
rire non potes, in eo te umbram luxuriæ repe-
turum putas?* Hujus etiam syllogismi partes pro-
syllogismis exornantur. Propositionis sententia
his verbis continetur, *intempestivi convivii &c :*
quam prosyllogismus præcedens illustrat à con-
trariis, *nemo ferè saltat sobrius &c.* assumptio
per partes explicatur, *nullum turpe convivium,
&c; & à minoribus quibusdam illustratur: cujus
etiam prosyllogismus præcedit, reprehensio
nempe Catonis, quod postulare consequens, non
probato antecedente. postremo loco ponitur
conclusio, quæ negat Murenam esse saltatorem,
repetendo quædam quæ in assumptione præ-
cesserant; & interrogatione fortius negando.*

Hoc judicii modo Ovidius I. Trist. eleg. I.
tripliciter concludit, dum carminum suorum
excusationem exponit:

*Carmina proveniunt animo deducta sereno;
nubila sunt subitis tempora nostra malis.
Carmina secessum scribentis & otia quarunt.
Me mare, me venti, me fera jactat hyems.
Carminib' metus omnis abest; ego perditus ense
hæsrum jugulo jam puto jamque meo.
Hæc quoq; quæ facio, judex mirabitur æquus;
scriptaq; cum venia qualiacunq; leget.*

Tres hic syllogismi sunt qui in unum sic reduci
possunt: *ut quis possit carmina bona scribere,
oportet is latus sit, otiosus, securus: ego nec latus
sum, nec otiosus, nec securus; ergo bona carmina
non scribo.* Pro assumptionibus prosyllogismi à
dissentaneis & impredientibus causis ponuntur.

De.

Deinde conclusio sequitur, non ipsa quidem sed ejus consecrarium; mirum esse si bona sunt; sed potius cum venia esse legenda, quia non sunt bona.

Proprius primus est, cujus propositio negatur: ut, *Agésilauus non est pictus ab Apelle: Alexander est pictus ab Apelle; Alexander igitur non est Agésilauus.*

Proprius secundus est, cujus assumptio negatur: ut, *Cæsar oppressit patriam: Tullius non oppressit patriam; ergo Tullius non est Cæsar.*

Sophismata hæc duo sunt; quorum unum utriq; explicati speciei commune est, alterum primæ speciei proprium. Commune est, cum propositio est particularis; quæ ex communi explicationum regula generalis aut propria esse debuit.

Sophisma prima speciei proprium est, cum argumentum tertium in altera parte antecedentis non negatur, ut definitio primæ speciei præcipit: unde illud vulgò dictum, Ex duabus affirmatis in secunda figura, nihil concluditur. Excipiendum tamen est, si propositio fortè axioma reciprocum sit: ut, *homo est animal rationale: Socrates est animal rationale; ergo Socrates est homo.* Verùm hæc potius inversio partium propositionis intelligenda est; *animal rationale est homo: atq; ita ad sequentem speciem syllogismi referetur.*

CAP. XII.

De Secunda specie Syllogismi simplicis explicati.

Secunda species explicati syllogismi est, quando argumentum antecedit in propositione, sequitur affirmatum in assumptione.

Hæc species ab *Aristotele*, prima figura dicitur; sed naturæ ordine est postrema. Cum enim in reliquis speciebus dispositio quæstionis cum argumento tertio simplex & uniusmodi sit, in hac specie duplex est; in propositione enim argumentum antecedit quæstionis consequentem, utpote specialius; in assumptione sequitur quæstionis antecedentem, utpote generalius; unde fortè medius terminus in hac solum figura propriè dicitur. Quòd autem propositio nunquam particularis, conclusio semper antecedenti similis aut parti debiliori est, id habet commune cum explicata specie priore; hoc etiam cum contracta, affirmatum esse in assumptione; nisi in contracta, quæstionis antecedens ut generalius de argumento; in hac, argumentum de antecedente quæstionis affirmatur.

Hæc maxime figura fundatur dicto illo, *de omni & nullo*: antecedens enim sive subjectum propositionis continet genus, adeoq; est semper generalis, subjectum assumptionis continet speciem

ciem quæ de illo genere affirmatur. Assumptio itaq; semper esse debet affirmata. Ex quo sequitur, quicquid de genere in propositione dicitur, id de eo quod in assumptione species esse illius generis affirmatur, in conclusione rectissime concludi. Quod si genus illud subiectum scil. propositionis termino infinito negante, seu topicè contradictorio exprimitur, non negata continuò censenda erit assumptio, quamvis esse videatur; assumit n. tantummodo genus ex propositione termino illo topicè duntaxat contradictorio expressum, ipsa nihil axiomaticè negat: ut, *quisquis non credit, damnatur: aliquis Judæus non credit; ergo aliquis Judæus damnatur.* Hic propositionis subiectum est genus *quisquis non credit, i. e. omnis non credens sive infidelis: Judæus est ex numero sive specie non credentium, id quod assumptio non negat, sed affirmat æquè ac si sic diceret, aliquis Judæus est non credens.*

Ex hac autem affirmatione sequitur, nullum argumentum ab antecedente quæstionis dissensitaneum, in hac secunda specie locum habere. De cætero, hæc species neq; ad particulares quæstiones, ut contracta, neq; ad negatas, ut prior species explicati, restringitur; sed ad omnia quæstionum genera concludenda rectè adhibetur.

Restant hujus speciei modis; qui quanquam partim affirmati sunt partim negati, plures tamen non sunt quàm in altera specie, ubi omnes erant solum negati. Aequalitatis ratio est quod assumptionis affirmatio, & solius inde propositionis negatio negatorum numerum minuit. Modi igitur hujus speciei sex iidem sunt; tres affir-

affirmati, tres item negati; utriq; rursum sunt generales; speciales & proprii.

Primus est affirmatus generalis: ut, *omne iustum est utile: omne honestum est iustum; omne igitur honestum est utile.* Quod Cic. 2. Off. ita concludit: *quicquid iustum sit, id etiam utile esse censent: item quod honestum, idem iustum: ex quo efficitur, ut quicquid honestum sit, idem sit utile.* Propositionis prosyllogismus a testimonio Stoicorum primo in loco ponitur, deinde omnes partes syllogismi ordine sequuntur. Partes huius syllogismi sunt axiomata relatæ essentia quæ simplicium axiomatum vim habent.

Secundus modus est negatus generalis: *Timidus non est liber: avarus est timidus; avarus itaq; non est liber.* Hoc ita concluditur & iudicatur ab Horatio, epist. 1. 1. 16.

Quo melior servo quò liberior sit avarus, in trivis fixum, cum se demittit ob assem, non video. Nam qui cupiet, metuet quoq;: porro qui metuens vivit, liber mihi non erit unquam.

In hoc exemplo duplex est crypsis, inversio partium & prosyllogismus. Primo in loco ponitur conclusio, eaq; duabus prosyllogismis illustratur; primò à pari, quod *avarus non sit liberior servo*: secundò ab effectis, quod *se demittit ob assem*. Tum ponitur assumptio, *qui cupiet, metuet quoq;*. Propositio postremo in loco ponitur,

qui metuens vivit, liber mihi non erit unquam.

Sic Terent. in *Eunuch.* concludit & iudicat:
*consilii expers, consilio regi non potest: amor est
 consilii expers; consilio itaq; regi non potest.* Syl-
 logismus his verbis sequitur:

Here, quæ res in se neq; consilium neq; modum
 habet ullum, eam consilio regere non potes.
 In amore hæc omnia insunt vitia; injuriæ,
 suspiciones; inimicitia, induciæ,
 bellum, pax rursum incerta hæc si tu postules
 ratione certâ facere, nihilo plus agas,
 quam si des operam, ut cum ratione insanias.

In hoc exemplo propositio suo loco est, quæ
 res in se &c. Pro assumptione ponitur ejus pro-
 syllogismus variorum amoris adjunctorum, quæ
 consilium impediunt; amor consilii expers est,
 quia in amore hæc insunt vitia, &c. Conclusio
 sequitur, incerta hæc, &c. Cujus sententia com-
 paratione parium comprehenditur, ergo si amo-
 rem consilio regere vis, nihilo plus, &c.

Tertius modus est affirmatus specialis: Con-
 sules propter virtutem facti, studiosè rep. tueri
 debent: Cicero est propter virtutem factus consul;
 Cicero igitur studiosè rep. tueri debet. Sic orator
 diligentiam suam, Agr. 2. concludit & iudicat;
 Nam cum omnium consulum, ait, gravis in repub.
 custodienda, cura ac diligentia debet esse, tum
 eorum maximè, qui non in incunabulis, sed in
 campo sunt consules facti. Nulli populo Rom. pro
 me majores nostri spondederunt mihi creditum est:
 à me petere quod debeo, me ipsum appellare debetis.
 Quemadmodum cum petebam, nulli me auctores
 generis mei vobis commendarunt: sic siquid deli-
 quero, nulle sunt imagines, quæ me à vobis depre-
 centur.

centur. Quare modò ut vita suppetat (quanquam ego sum is qui eam possim ab istorum scelere insidiisq; defendere) polliceor vobis, Quirites, bona fide, remp. vigilantì hominì, non timido, diligentì, non ignavo, commisistis. Partes huius syllogismi prosyllogismis ornantur. Propositio à minori illustratur: cuius sententia est comparationis redditio, diversis illustrata; nam cùm omnium consulum gravis, &c. tum eorum maximè: diversa sunt, non in incunabulis, sed in campo. Assumptio sequitur, nulli populo Rom. &c. quæ iisdem rursus diversis illustratur, & à simili; meis, non majorum meritis; in campo, non in incunabulis: similitudo his verbis continetur; *quam-* *admodum cùm petebam, &c.* Tandem conclusi-
onis sententia sequitur illustrata, primùm testi-
monio promissi, obligationis vim habentis, pol-
liceor, &c. Deinde diverso & disparato; *quare*
modò, &c. Ergo Cicero erit vigilans, non timidus;
diligens, non ignavus.

Aliud exemplum: quod optatum redierit, gra-
tum est: Lesbia Catullo optata rediit; grata igitur est.

*Si quicquam cupidòq; optantiq; obtingit unquam
insperanti, hoc gratum est animo propriè.*

*Quare hoc est gratum, nobis quoq; charius auro,
quod te restituis, Lesbia, mi cupido.*

*Restituis cupido atq; insperanti ipsa refert te,
nobis; ô lucem candidiore nota!*

*Quis me uno vivit felicior, aut magis hac quid
optandum vita dicere quis poterit?*

In hoc exemplo propositio videtur esse com-
posita, simplex tamen est, & syllogismus simplex;
quia

quia simplex est dispositio argumenti cum partibus quæstionis. Duplex hic crypsis est, inversio & redundantia. Primo loco est propositio *si quicquam cupido*, &c. i. e. quicquid cupido; *si enim non semper connexi* nota est. Assumptio est in quarto & quinto versu, *Lesbia Catullo optata rediit*. Conclusio est versu tertio illustrata à minori, *quare hoc est gratum & auro charius*. Tribus postremis versibus iteratur sententia conclusionis, primum ab adjuncto tempore, *ò lucem*: deinde à pari, *nemo me felicior*, aut magis hac quid, &c.

Quartus modus est negatus specialis: *deceptor amantis puellæ non est laudandus*: Demophoon est deceptor amantis puellæ; Demophoon igitur non est laudandus. Phyllis apud Ovidium ita judicat Demophoontem laudandum non esse.

Fallere credentem non est operosa puellam gloria: simplicitas digna favore fuit.

Sum decepta tuis & amans & fœmina verbis;
dii faciant laudis summa sit ista tue.

Propositio suum obtinet locum cum prosyllogismo adjunctæ simplicitatis, ut causæ cur deceptor non sit laudandus. Assumptio sequitur, *sum decepta tuis*, &c. Conclusionis sententia imprecatione continetur, *dii faciant*, &c.

Quintus modus est affirmatus proprius: ut, *Octavius est heres Caesaris*: ego sum Octavius; *sum igitur heres Caesaris*.

Sextus modus est negatus proprius: ut, *Antonius non est filius Caesaris*: tu es Antonius; *non es igitur filius Caesaris*.

Hujus itaq; speciei laus est præ cæteris, quòd omnia quaestionum genera concludat; nempe generales, speciales vel proprias, easq; vel affirmatas vel negatas; & præsertim generales affirmatas: ob quam potissimum causam *Aristoteles* speciem hanc & reliquis anteposuit, quod primus ejus modus nempe *affirmatus generalis* sit maximè scientificus, post. l. 11. cum præcepta artium solus demonstret, & reductionem reliquarum ad hanc figuram sive speciem laboriosè & subtiliter excogitavit verum non sic præstat hæc species cæteris duabus, ut earum idcirco ad hanc reductio cum tanta ut sit, alphabeti vexatione elaboranda fuerit, quandoquidem & reliquæ species non imperfectæ sunt, nec minus necessariò concludunt, id enim syllogismi speciebus commune cunctis est, quaestiones denique illas, quæ ad ipsarum judicium rectè referuntur, interdum aptius concludunt, quàm in hac specie, concludi queunt. Merito itaq; *Galenus*, l. 2. de placit. *Hippoc.* & *Plat.* reductionem hanc omnemq; ejus supellectilem abecedariam tanquam vanissimæ subtilitatis doctrinam inanem ac futilem post *Antipatrum* & *Chrysippum* explodit. Et *Keckermannus* ipse, in *P. Ramum* ferè iniquior, reductionem tamen illam quam vocant *per impossibile*, ad eos duntaxat refutandos inventam, homines sanè absurdos & raro admodum repertos, qui utraq; præmissa concessa, conclusionem negent, fatetur se potius propter consuetudinem Scholarum, quàm propter magnum ejus usum retinuisse. At consuetudo certè graviter nugandi ejicienda è scholis potius, quàm retinenda erat.

Tres hic paralogismi refellendi sunt ; quorum duo sunt utriq; speciei explicatae communes, propositio nimirum particularis, & conclusio partis non dibilioris : utriusque exemplum hoc esse potest: *quoddam animal est rationale : bestia est animal : ergo bestia est rationalis.* Et præterea totum medium, nempe *quoddam animal*, non assumitur.

Proprius in hac specie paralogismus est argumenti negatio in assumptione : ut, *omnis homo est animal : equus non est homo ; ergo equus non est animal.*

Hic etiam *solus*, & *unicus* pro negandi particulis habendi sunt ; paritéq; reddunt assumptionem captiosam : ut, *quicquid est in mea domo, est in oppido : unicus fons est in mea domo ; ergo unicus fons est in oppido.* Sic, *quicquid est risibile, est animal : solus homo est risibilis ; ergo solus homo est animal.* Tam enim hæ particulæ quàm negatio in minore, ostendunt non reciprocam esse maiorem ; adeoq; conclusionem ex maiore per minorem, vel generale ex proprio non sequi.

Expendenda porrò hic definitionis verba sunt ; quæ non tam assumptionem ipsam quàm argumentum in assumptione affirmatum significant. Cum enim propositionis antecedens (quod tertium argumentum est) negatione infinita topica duntaxat exprimat, assumptionis consequens (quod etiam tertium argumentum est) eandem negationem retinere debet ; alioqui non sequeretur argumentum affirmatum in assumptione, sed contradictione sublatum. Negatio autem hæc non dicenda est vel assumptionis vel argumenti negatio, sed argumenti in-

infiniti affirmatio: tum enim demum negatur in assumptione argumentum, cum illius negatio propositionis affirmationi opponitur. Exempli gratia: *quia non est dives, contemnitur: Posthumus non est dives; ergo Posthumus contemnitur.* Assumptionem hic non negari probat affirmatio conclusionis: sed perinde est acsi hoc modo argumentaretur: *omnis homo qui non est dives, contemnitur: Posthumus est homo qui non est dives; ergo Posthumus contemnitur.* Vel hoc modo: *omnis non dives contemnitur: Posthumus est non dives; ergo contemnitur.* Sed hæc ex iis etiam quæ supra ad definitionem ipsam hujus speciei diximus, puto non esse obscura.

Præterea in quibusdam exemplis, quorum propositio est reciproca, videtur interdum syllogismus iste habere assumptionem negatam; cum dicendum sit potius, partes propositionis inverti: quæ si in ordinem revocentur, syllogismus erit in prima specie explicari: ut *Joan. 8. 47. Qui ex Deo est, verba Dei audit: vos ex Deo non estis; ergo verba Dei non auditis.* Propositio invertenda est: *qui verba Dei audit, is ex Deo est: vos non estis ex Deo; ergo verba Dei non auditis.*

C A P. XIII.

*De Syllogismo connexo primo.**Adhuc simplex syllogismus fuit.*

Syllogismus compositus est syllogismus ubi tota quaestio est pars altera propositionis affirmata & composita; argumentum est pars reliqua.

Negar Aristoteles ullam esse syllogismi speciem præter tres figuras: & tamen ipse sæpe utitur composito, qui ad nullam ex tribus figuris referri potest. Verùm usus, optimus magister, docet, sæpius in communi hominum sermone ac disputationibus, compositos adhiberi syllogismos, quàm simplices: ut qui multas quaestiones, multa argumenta commodè satis disponant, quæ syllogismi simplices respuunt. Theophrastus etiam & Eudemus, Aristotelis discipuli, quin etiam Stoici, & post eos Cicero & Boëthius, usum præceptorem secuti, compositos non omiserunt. Syllogismus autem compositus dicitur non tam quod ex compositis axiomatis, nam & simplex potest ex compositis, nimirum relatis constare, sed à composita dispositione quaestionis totius cum tertio argumento in propositione; unde assumptio tota etiam assumitur; & conclusio non partim ex propositione partim ex assumptione,

ptione, sed tota ex propositione deducitur: propositio enim cum sit composita, duas reliquas syllogismi partes (quæ axiomata simplicia sunt) conjunctionis vinculo conjunctas complectitur: pars illa efficit assumptionem quæ argumentum continet, altera conclusionem. Propositio autem debet esse affirmata, quia negata si esset, composita esse desineret, ipsa enim compositio negatione dissolveretur. Propositionem autem negatam efficit, ut de axioma composito supra dictum est, non partium sed conjunctionis negatio: ut, *si non est animal, non est homo*; hæc propositio ex omnibus etiam partibus negatis affirmata est: rectè igitur inde assumitur atq; concluditur, *at non est animal, ergo neque homo*. Sin hoc modo dicerem, *non si est animal, idcirco est homo*, ex hac negata propositione nihil omnino deduci aut concludi posset. In syllogismis itaq; compositis ex ipsa conjunctionis vi deducuntur assumptio & conclusio. Ex duobus enim quæ in propositione junguntur, aut unum assumitur ut alterum concludatur, aut unum tollitur ut alterum tollatur.

Tollere autem in syllogismo composito, non est negare, sed specialem contradictionem ponere.

Specialis autem contradictio, ut in axioma simplici jam diximus, particularis est aut propria. Tollere igitur propositionis partem aliquam in assumptione aut conclusione, est ejus contradictionem particularem aut propriam ponere. Particulari autem generaliter contradici, generali particulariter, ibidem etiam docemur. Exemplis rem planam suo quamq; loco faciemus.

Sequitur

Sequitur nunc compositi syllogismi distributio: cuius genera ex propositionum compositione oriuntur: propositiones axiomata composita semper sunt: ex quatuor autem axiomatum compositorum generibus copulatum si affirmatum sit, non habet locum in composito syllogismo; si negatum, æquipollet interdum disjuncto: discretum syllogismi expers est quia diversa ex quibus constat, nec plane consentiunt, & tamen ita leviter dissentiunt, ut uno posito vel remoto, non tamen sequatur alterum poni vel removeri; aut vim habet connexi.

Syllogismus itaq; compositus est connexus aut disjunctus.

Syllogismus connexus est syllogismus compositus propositionis connexa. Vel, cuius propositio est axioma connexum.

Cum autem axiomati connexo affine sit relatum temporis, ut ibidem ostendimus, etiam syllogismi connexi propositio poterit relata esse temporis: nam quantitatis, qualitatis, loci propositiones relatæ in simplicibus syllogismis locum habent; quia in iis propositionibus quæstionis duntaxat consequens cum argumento disponitur. Relatum deniq; consequentiæ, de quo supra cap. 6. syllogismis idoneus non est.

Syllogismus connexus est duorum modorum.

Primus modus syllogismi connexi est, qui assumit antecedens & consequens conclusit.

Quo

Quo modo Cicero judicat & concludit l. 2. de divinatione: si dji sunt, divinatio est: sunt autem dji; divinatio est igitur.

Aliud ex 3. Offic. Atq; si etiam hoc natura praescribit, ut homo homini, quicumq; sit, ob eam ipsam causam, quod is homo sit, consultum velit, necesse est secundum eandem naturam; omnium utilitatem esse communem. Quod si ita est, una continemur omnes & eadem lege natura. Idq; ipsum si ita est, certè violare alterum lege natura prohibemur. Verum autem primum; verum igitur & extremum.

Propositio hujus syllogismi est sorites (de quo infra) trium gradium, si hoc natura praescribit, ut, &c.

Frequenter hic non assumitur idem sed majus.

Ut 1 Catil. Si te parentes odissent, discederes: nunc patria te odit (quæ communis est omnium nostrum parens) multo magis ergo discedes. Sed majus illud facile contineri in propositione poterit hoc modo; si propter odium parentum discederes, multo magis propter odium patriæ. At illud; ergo hoc multo magis.

Simili ratione concluditur etiam majus vel minus: ut Cic. pro Quint. Et si vadimonium deseruisset, non debuisses tamen ad extrema jura descendere: at non deferuit; multo minus ergo debuisti, vel multo magis non debuisti.

Concludendi modus, ut supradiximus, hic idem est quando propositio est relata temporis.

Ut, *cum* paris Oenonem deseret, Xanthus recurret: Paris Oenonem deseret; Xanthus ergo recurret.

Sed tamen relata temporis ut & reliqua axiomata composita, id quod supra monuimus, ad syllogismum simplicem pertinebunt quoties non tota quaestio in propositione disponitur: quod quidem semper fit, cum de certo & definito tempore quaestio est: ut si quaeratur an hoc tempore sit aetas, huiusmodi erit syllogismus: *cum sol est in cancro, aetas est: at hoc tempore sol est in cancro; ergo hoc tempore aetas est.*

CAP.

CAP. XIV.

De Syllogismo Connexo secundo.

Secundus modus connexi tollit consequens, ut iollat antecedens.

Hæc enim vis connexi axiomatis est, si consequens non sit, nec esse antecedens. Sic Cicero 4 de fin. docent nos, inquit, *Dialectici*, &c. Si illud, hoc : non autem hoc ; igitur ne illud quidem.

Sequuntur exempla : si ulli rei sapiens assentietur unquam, aliquando etiam opinabitur : nunquam autem opinabitur ; nulli igitur rei assentietur. Hic consequens contradictione speciali in assumptione tollitur, aliquando, nunquam ; conclusio etiam antecedenti specialiter contradicit ; ulli rei, nulli rei.

Eodem syllogismo Ovid. 2. de Trist. stultitiam suam judicat :

*Si saperem doctas odissem jure sorores,
numina cultori pernicioſa ſuo.*

*At nunc (tanta meo comes eſt inſania morbo)
ſaxa memor reſero rurfus ad iſta pedem.*

Propoſitio eſt, ſi ſaperem, *Muſas odissem* : cujus proſyllogiſmus eſt ab adjuncta pernecie. Aſſumptio, at non odi ; quæ à ſimili exprimitur, at nunc ſaxa memor, &c. Ergo non ſapio : cujus conſuſionis ſententia in parentheſi eſt ; tanta

meo, &c. Atq; in hoc exemplo est contradictio propria.

Hæ duæ syllogismi species sunt omnium usitatissimæ.

Non enim ea solum argumenta quæ in simplicibus & disjunctis syllogismis disponi non possunt, in connexis facile disponuntur, sed etiam ex iis quæ possunt aliis formis concludi, multa in his speciebus facilius & promptius concluduntur: immo nullum omnino argumentum, quod in syllogismo usum habet, has connexi species reipuit.

Præter hos duos connexi syllogismi modos nonnulli duos alios adjiciunt; quorum prior tollit antecedens ut tollat consequens, posterior assumit consequens ut concludat antecedens. In quos modos etsi communis fortè sermo, boni etiam authores nonnunquam incidunt, tamen cum in syllogismo non veritas partium sed necessitas consequentiæ spectetur, tenendum est, vitiosos esse eos modos qui ex veris verum juxta & falsum possunt concludere. Prior ergo hic modus qui tollit antecedens est prioris legitimi modi paralogismus, affinis negatæ assumptioni in secunda specie explicati: ut, *si homo est leo, sentit: non est leo; ergo non sentit.* Et hoc: *si Dio est equus, est animal: at non est equus; ergo non est animal. Si orator est, homo est: non est orator; ergo nec homo.* Hoc si sic resolves in secundam speciem explicati, *omnis orator est homo*, fallacia patebit. Immo sine ista reductione per se etiam patet: tollit enim antecedens, quod minus est, ut tollat consequens, quod majus est: à minore autem ad majus nulla est hujusmodi consequentia.

Modus

Modus posterior, qui assumit consequens ut concludat antecedens, est captio posterioris legitimi modi, affinis paralogismo ex omnibus affirmatis in prima specie explicati: ut, *si homo est leo, sentit: at sentit; ergo est leo*. Utrumque hunc paralogismum *Aristoteles* appellat fallaciam consequentis; quæ toties fit quoties proposicio non est reciproca.

Sed est etiam aliud sophisma secundi modi, cum assumptio non tollit contradictione speciali; id est, quando consequenti vel generali generaliter, vel particulari particulariter contradicit. Generalis contradictionis exemplum est, *si omne animal est irrationale, omnis etiam homo est irrationalis: at nullus homo est irrationalis: nullum ergo animal est irrationale*. Particularis hoc: *si homo est rationalis, aliquod animal est rationale: sed aliquod animal non est rationale; ergo nec homo*.

CAP. XV.

De Syllogismo disjuncto primo.

Syllogismus disjunctus est syllogismus compositus propositionis disjunctæ.

Modi duo sunt. Sic etiam Cic. in Top. & Stoici apud Laërtium.

Primus tollit unum, & reliquam concludit.

Ut, aut dies est, aut nox : at dies non est ; ergo nox est. Vel, nox non est ; dies ergo est.

Ciceronis pro Cluentio judicium tale est : sed cum esset hæc illi proposita conditio, ut aut justè pièq; accusaret, aut acerbè indignèq; moreretur ; accusare quoquo modo posset, quàm illo modo mori maluit. Disjunctio clarior sic erit : aut accusandum aut moriendum : non moriendum ; accusandum igitur. In hoc exemplo, ut est apud Cic. est partium inversio, totusque Syllogismus in axiomatico relato consequentiæ involvitur. Propositio non est absolutè vera, sed ex conditione. Assumptio & conclusio per comparisonem minoris ponuntur ; ita, ut conclusio præcedat.

Sic idem 2 Philip ratiocinatur : nunquamne intelliges tibi statuendum esse, utrum illi qui istam rem gesserunt, homicidæ sint an vindices libertatis ? Attende, &c. Nego quicquam esse medium. Confiteor illos nisi liberatores populi Rom. conservatoresq;

toresq; reip. sint, plus quàm sicarios, plus quàm homicidas, plus quàm parricidas esse: siquidem est atrocius patriæ parentem, &c. Si parricide, cur honoris causa à te sunt & in hoc ordine & apud populum Rom. semper appellati? Cur &c? Atq; hæc acta per te. Non igitur homicide. Sequitur ut liberatores tuo iudicio sint; quandoquidem tertium nihil potest esse. Quæstio hîc proponitur initio de Cæsaris interfectores, utrum, &c. Propositio proponitur axiomate connexo, confiteor illos nisi, &c. quod æquipollet disjuncto, aut vindices sunt libertatis aut plusquam homicide: illustratur enim ea pars disjunctiōis à majori: & præcedit prosyllogismus, quo ostenditur disjunctiōem hanc esse sine medio, & proinde necessariam. Assumptio sequitur, non sunt homicide; idq; confirmatur prosyllogismo à testimonio & factis ipsius Antonii. Prosyllogismus concluditur in secundo connexo, si parricide, cur, &c? at hæc acta per te; non igitur homicide. Conclusio deniq; sequitur, ut liberatores fuerint; idq; repetito propositionis prosyllogismo confirmatur, quandoquidem tertium sive medium nihil potest esse.

Si partes disjunctæ propositionis sint duabus plures, judicandi concludendiq; ars erit eadem.

Quamvis autem disjunctiōis partes esse possint sæpenuerò plures quàm duæ, id quod in disparatis accidit, ipsius tamen propositionis duæ tantummodo partes sunt; quarum una est quæstio, altera est argumentum. In hoc modo ubi quæstio semper concluditur, tertium argu-

mentum plura opposita comprehendit, quæ omnia in assumptione tollenda sunt, ut quæstio concludatur: nam oppositorum plura simul affirmari nequeunt, negari plura simul queunt.

Sic *Cic.* judicat *Rabirium cum consulibus esse oportuisse. Aut enim cum consulibus, aut cum seditiosis, aut latuisse: at nec cum seditiosis fuisse, nec latuisse; fuisse ergo cum consulibus. Pro Rabir. Atqui videmus ait hec in rerum natura tria fuisse, at aut cum Saturnino esset, aut cum bonis, aut lateret. Latere autem, mortis erat instar turpissime: cum Saturnino esse, furoris & sceleris; virtus & honestas & pudor cum coss. esse cogebat. Propositio per se clara est. Assumptionis partes prosyllogismis illustrantur, primo à simili, deinde ab adjunctis. Conclusio prosyllogismo ab efficiente illustratur.*

Notandum est in hoc modo non ita exigi specialem contradictionem, ut in reliquis; neque enim ad consequentiæ necessitatem pertinet in hoc modo, ut in reliquis, sed ad assumptionis solius veritatem. Si ergo assumptio generalem contradictionem ferre potest, per consequentiam licebit uti: ad consequentiæ enim rationem sufficit, alterum quovis modo tolli, ut reliquum concludatur, eademque conclusio erit, sive specialis sive generalis in assumptione contradictio fuerit, in altero verò modo secus erit, ubi contradictio in ipsam conclusionem cadit.

CAP. XVI.

De Syllogismo disjuncto secundo.

Disjunctus secundus è propositione partibus omnibus affirmata assumit unum & reliquum tollit.

Secundus efficitur, quia minus generalis est primo, utpote proprietatibus quibusdam restrictus, quibus prior immunis erat. Proprietates autem hæ sunt, 1. partium omnium propositionis affirmatio, non totius modò propositionis, id enim syllogismis omnibus compositis commune est; & affirmari quidem propositio vel omnibus negatis partibus potest. 2. assumptio affirmatur, quoniam in propositione affirmata fuerat. 3. in conclusione semper est negatio, eaq; specialis contradictio: in primo quidem conclusio nonnunquam negatur; sed hoc tum fit cùm pars propositionis quæ concluditur negata fuit. Exempli gratia: aut dies est, aut nox: dies est; ergo nox non est.

Ejusmodi syllogismus efficitur è propositione copulata negata, quæ negata complexio, vel, quod Græcis idem est, negata copulatio dicitur, & disjunctionis affirmata vim obtinet.

Non & dies, & nox est : at dies est ; non igitur nox est. De hac negata copulatione sic Cic. in top. non & hoc, & illud : hoc autem ; non igitur illud.

Pertinet autem ad hunc secundum duntaxat modum negata copulatio ; quod cum in huiusmodi propositione quævis opposita disponi possint, ex uno eorum negato, nisi in iis qui medio carent, non necessario alterum affirmatur & concluditur, quod fit in primo modo, sed ex altero affirmato alterum negatur, quæ communis est regula omnium oppositorum, & fit duntaxat in hoc secundo.

Ad sophismata quod attinet horum modorum, primi quidem nullum occurrit. Secundi quæ sunt, ex definitione redarguuntur. Primum est, si aliqua pars propositionis negata erit : ut, *leo aut animal est, aut non est homo ; at non est homo ; ergo nec animal.* Secundum est, si assumptio sit negata ; ut in exemplo superiore. Tertium est, si specialis contradictio non erit in conclusione : ut hoc ; *aut homo est animal, aut omne animal est irrationale ; sed homo est animal ; ergo nullum animal est irrationale.*

*Appendix de enthymemate, dilem-
mate, & sorite.*

EXpositis omnibus cum simplicis tum compositi syllogismi speciebus, sequitur axiomatis & syllogismi communis affectio, vel potius anomalia, de qua antediximus, crypsis. Quæ in omni cum, loquendi usu tum scribendi genere tam frequens est, idq; brevitatis plerumq; causa, ut nemo ferè syllogismos integros sine crypsi aliqua vel loquatur vel scribat.

Sed quoniam crypsis ejusq; triplex modus syllogismorum omnes species afficiunt, ea re dicendi locus de syllogismi crypsibus antè non erat, quàm de syllogismi speciebus cunctis dictum esset.

Si qua pars syllogismi defuerit, enthymema dicitur.

Ut ab exemplo: *Themistocli licuit urbem relinquere; ergo mihi. addatur propositio; quod Themistocli licuit, licet & mihi. Ab inductione: inventio & dispositio in argumentis versantur; ergo Logica tota. addatur assumptio; Logica tota est eorum inventio & dispositio.*

Hoc etiam perpetuò observandum est, si conclusionis prædicarum deest, deesse majorem; si subjectum, minorem: si utrumq; ; syllogismi compositi majorem vel potius majoris antecedentem, quæ cum tota quæstione ut cum consequente disponitur; quod indicat plenum syllogismum fore compositum, & antecedens pars en-

enthymematis erit antecedens majoris ; totumq; enthymema convertetur in maiorem propositionem syllogismi connexi : ut, *virtus reddit beatos ; vitium ergo miseros.* In antecedente huius enthymematis nec antecedens nec consequens quæstionis apparet : totum igitur converte in axioma connexum aut disjunctum, plenum syllogismum compositum esse intelliges ; ut, *si virtus reddit beatos, vitium reddit miseros ; at illud ; hoc igitur. non est nox ; ergo est dies.* Totum converte in axioma disjunctum, maiorem supplebis, & syllogismum plenum disjunctum conicies : *aut dies est, aut nox ; non nox ergo dies.*

Si quid ad tres illas syllogismi partes accesserit, prosyllogismus dicitur. Est enim ad partem aliquam syllogismi addita probatio.

Partium etiam ordo saepe confunditur. Quod utrumq; accidit in dilemmate & sorite.

Dilemma est specialis quædam crypsis non syllogismi, sed syllogismorum ; à duplici propositione dictum, quam lemma Stoici vocant, vulgò *disjunctivus biformis & syllogismus cornutus*, quasi cornibus feriens : cujus vis in duobus axiomatis connexis citra syllogismi formam satis manifesta est : ut illud *Martialis* ;

*hec, si displicui, fuerint solatia nobis ;
hec fuerint nobis præmia, si placui.*

Et illud in evangelio : *si bene locutus sum, cur me cordis ; si male, testare de malo.* Et reciprocum illud insigne Protagoræ magistri ad Euathlum discipulum, apud Gellium, l. 5. c. 10. & 11 : *si contra te lis data erit, merces mihi ex sententia illa*

illa debetur, quia ego vicerò; sin verò secundum te judicatum erit, merces mihi ex pacto debetur, quia tu viceris. Cui contra Euathlus; & ego bone magister, utrovis modo vicerò, &c. Hujusmodi est etiam illud apud Aristot. Rhet. 3. 23. non agendum esse cum populo; quia, si iusta dixeris, hominibus inuisus eris, si iniusta, Deo. Immo agendum esse cum populo: nam, si iniusta dixeris, hominibus gratus eris; si iusta, Deo.

Explicatur autem hac cryptis axiomate disjuncto; tot deinde syllogismis connexis vel etiam categoricis, quot erant disjuncti axiomatis membra: ut illud Biantis consilium de uxore non ducenda: aut formosam duces, aut deformem; si formosam, communem; si deformem, pœnam: neutrum autem bonum; non est igitur ducenda uxor. Vel categoricè sic; communis non est ducenda; formosa erit communis; ergo, &c. pœna non est ducenda; deformis erit pœna; ergo, &c. Sed axioma illud disjunctum partes omnes disjunctas non enumerat: est enim media quæ nec formosa nec deformis est; & neutrius connexi consequens est vera; fieri enim potest, ut nec formosa communis, nec deformis pœna sit futura.

Sorites & syllogismus crypticus multarum propositionum continua serie ita progredientium, ut prædicatum præcedentis propositionis perpetuò sit subiectum sequentis, donec tandem consequens propositionis ultima concludatur de antecedente primæ: ut, homo est animal; animal est corpus sentiens; corpus sentiens est vivens; vivens est substantia; ergo homo est substantia. Græcè autem sorites, acervalis Latine à Cicerone dicitur; quia minutatim addit, & quasi acervum efficit.

Ad.

Adhibetur ferè vel ad summum genus de infima specie, vel ad causam primariam, licet remotam, effecto attribuendam; & illud quidem per genera subalterna, ut in exemplo superiore; hoc per causas medias, ut in exemplo sequente: *quos Deus prænovit, eos prædestinavit; quos prædestinavit, eos vocavit; quos vocavit, eos justificavit; quos justificavit, eos glorificavit; ergo, quos prænovit, eos glorificavit.*

Utitur autem sorites & subalternis generibus & subordinatis causis quasi tot mediis terminis ad probandum conclusionem; tot nempe quot sunt termini inter subjectum primæ propositionis & prædicatum conclusionis: quot autem termini medii, tot sunt syllogismi.

Est itaq; progressio enthymematica syllogismos uno pauciores continens quàm propositiones. Syllogismus principalis habet pro maiore propositionem conclusioni proximam; pro minoris termino minore, subjectum conclusionis; pro termino maiore, subjectum propositionis maioris: ex. gr. *quos justificavit, glorificavit; quos prænovit, justificavit; quos ergo prænovit, glorificavit.* Reliqui sunt minorum prosyllogismi, & præcedens quisq; probatio sequentis.

Unde intelligitur soritæ crypsis triplex, & defectus, & redundantia, & inversio. Si igitur partium, sive species sive causæ sint, non erit recta subordinatio firmâq; connexio, sorites probus non erit: ut, *ex malis moribus existunt bonæ leges; ex bonis legibus salus reip. ex reip. salute bona omnia; ergo ex moribus malis bona omnia.* Hic causæ per se male subordinantur causæ per accidens.

Fallit hic etiam: *si nullum tempus esset, nox non esset; si nox non esset, dies esset; si dies esset, aliquod tempus esset; ergo, si nullum tempus esset, aliquod tempus esset.* Nam si nullum tempus esset, certè nec dies esset: fallit ergo in propositione secunda; quæ non verè continuatur; sed ponit effectum, sublata causa. Cætera sorites vitia habet cum aliis syllogismi speciebus communia.

CAP.

CAP. XVII.

De Methodo.

Methodus est dispositio dianoëtica variorum axiomatum homogeneorum pro naturæ suæ claritate præpositorum, unde omnium inter se convenientia judicatur memoriâq; comprehenditur.

Methodi permagnus est in omni vita usus, magna proinde laus. Hanc Plato, in *Philebo* esse ait donum hominibus divinitus datum. *Aristoteles* etiam ordinem in maximis bonis numeravit. *Fabius*, nec mihi, inquit, errare videntur, qui ipsam rerum naturam stare ordine putant; quo confuso, peritura sunt omnia.

Est autem methodus dispositio variorum axiomatum homogeneorum, i. e. eorum quæ ad eandem rem pertinent, eandemq; ad finem referuntur. Homogenea nisi fuerint, subordinata sibi invicem esse non poterunt, adéoq; ne ordinata quidem. Itaq; Arithmeticum in Geometria, Geometricum in Arithmetica veluti heterogenium & alienum methodus excludit. Pro naturæ autem suæ claritate axiomata quæq; præponenda sunt, prout argumenta priora, notiora, illustriora complectuntur. Prima autem præcedant an orta à primis parum refert, cum utrorumq; eadem affectio sit.

Atq; ut spectatur in axioma veritas aut falsitas, in syllogismo consequentia & inconsequentia; sic in methodo consideratur, ut per se clarius præcedat, obscurius sequatur; omninoq; ordo & confusio

fuso judicatur. Sic disponetur ex homogeneis axiomatis primo loco absoluta notione primum, secundo secundum, tertio tertium, & ita deinceps.

Prius autem sicut & posterius quinque modis dicimus: tempore, ut senem juvene; natura, ut causam effecto, genus specie; quicquid denique existendi consecutione est prius; i. e. quod alio posito, ponitur; & quò posito, aliud non ponitur, ut unitas binario: nonnunquam etiam ubi consecutio reciproca est, quod simul est tempore, natura tamen est prius, ut sol suo lumine. Bisariam etiam dicitur prius natura; generante scilicet, ut partes toto, simplex composito, media fine; vel intendente, ut totum partibus, compositum simplici, finis mediis. Prius dispositione sive loco dicitur, quod initio est propius; ut in dicendo, narratio confirmatione. Prius dignitate; ut magistratus cive, aurum argento, virtus auro. Prius denique cognitione, quod cognitu facilius est: idque vel in se, vel nobis: in se quod naturam est prius; nobis, quod posterius est, & sensibus objectum: illa perfectior est cognitio, hæc imperfectior.

Idèoque methodus ab universalibus, ut quæ causas contineant, ad singularia perpetuò progreditur. Adeoque ab antecedentibus omnino & absolute notioribus ad consequentia ignota declarandum.

Unde intelligitur agi hic de methodo tradendi sive docendi, quæ analytica rectè dicitur, non inveniendi. Methodus n. inveniendi quæ à Platone dicitur *synthetica*, procedit à singularibus quæ tempore sunt priora, sensibusque se prius offerunt; quorum inductione generales notiones colliguntur: methodus autem docendi sive inventa

venta & judcata disponendi, de qua hic agitur. Contraria via ut etiam docet *Arist.* i. *Metaph.* c. 1. & 2 procedit ab universalibus, quæ natura sunt priora & notiora; non quo prius aut facilius cognoscantur, sed quòd posteaquam sunt cognita, præcedunt notionis natura & claritate quanto sunt à sensibus remotiora. Sic generales rerum species (ut *Optici* etiam docent) citius in sensus incurrunt: ut advenientem aliquem, judico prius animal esse quàm hominem, & hominem quàm *Socratem*. Atq; hanc solam methodum *Aristot.* passim docuit.

Sed methodi unitatem exempli doctrinarum & artium præcipuè demonstrant, præcipuèq; vendicant.

Quibus quamvis omnes regule generales sint & universales, tamen earum gradus distinguuntur: quantòq; unaquæq; generalior erit, tanto magis præcedet.

Generalissima loco & ordine prima erit, quia lumine & notitia prima est.

Subalterne consequentur, quia claritate sunt proximæ: utq; ex his natura notiores præponentur, minus notæ substituentur.

Tandemq; specialissima constituentur.

Definitio itaq; generalissima prima erit; causas n. continet Definitioni consecutaria subjungentur, five proprietatum si quæ sunt & ex definitione per se non patent, explicationes Distributio sequetur.

Quæ si multiplex fuerit, præcedet in partes integras partitio, sequetur divisio in species. Partesq; ipse & species eodem ordine sunt rursus tractan-

tractanda ac definienda, quo distributæ fuerint.

Et transitionum vinculis si longior inter eas interfit explicatio, colligandæ sunt : id n. auditorem reficit ac recreat.

Transitio autem vel perfecta est vel imperfecta. Perfecta, quæ breviter & quid dictum sit & quid sequatur, ostendit : qualis illa hujus libri secundi initio ; adhuc prima *Artis Logicæ* pars fuit, &c. Imperfecta est quæ alterutrum duntaxat ostendit vel quid dictum sit, vel quid sequatur : qualis illa l. 1. c. 18. *argumenta simplicia ita fuerunt, &c.*

Exemplo fit Grammatica. Hujus definitio, ut quæ generalissima sit, ex lege methodi primo loco statuatur ; ars scilicet bene loquendi : secundo loco erit Grammaticæ partitio, in etymologiam & syntaxin ; tum etymologia, quæ de vocibus agit, definiatur ; dein vocis partes in literis & syllabis, specièsq; in vocibus numeri & sine numero subsequantur, exituumq; transitiones suis locis collocentur : atq; ita omnium etymologiæ partium definitiones, distributiones, colligationes, exempla deniq; specialissima in singulis disponentur : idémq; in syntaxi fiet. Hanc viam omnes artes sibi proposuerunt.

Moderni quidam duplicem methodum institunt, *syntheticam* & *analyticam* : illam scientiis theoreticis tradendis, Physicæ putà vel Mathematicæ magis accommodatam ; qua partes scientiæ ita disponentur, ut à subjecto contemplationis vniversali ad particularia, à simplicibus ad composita progressus fiat : sic Physica exorditur à corporis naturalis definitione ; ad ejus deinde causas vel partes effectiõesq; generales ad species deniq; progreditur. Methodum analyti-

cam

cam definiunt, qua ita disponuntur partes scientiæ practicæ ut à notione finis fiat progressus ad notitiam principiorum vel mediorum, ad illum finem assequendum : sic in Ethicis à fine, scilicet beatitudine, ad media, nempe virtutes proceditur : Verùm cùm hac utraq; methodus una eadèmq; via, à definitione scilicet generalissima, sive illa subiectum sive finem generalem contineat, ad minus generalia, à notioribus ad minus nota, à simplicibus ad composita æque utrobq; dividendo progrediatur, non videtur ob diversam in definitione generali, illic subiecti, hîc finis mentionem, duplicem esse methodum constituendam ; sed unam potius, artium quidem tradendarum, eamq; analyticam esse dicendam.

Atqui methodus non solum in materia artium & doctrinarum adhibetur, sed in omnibus rebus quas facile & perspicuè docere volumus.

Ideòq; poëtæ, oratores, omnesq; omninò scriptores, quoties docendum sibi auditorem proponunt, hanc viam sequi volunt, quamvis non usquequaq; ingrediantur atq; insistant.

Sic Virgilius, in Georgicis, distribuit propositam materiam in quatuor partes, ut antedictum est : primòq; libro res communes persequitur, ut astrologiam, meteorologiam, deq; segetibus & earum cultu differit, quæ pars operis prima erat ; tamq; transitio adhibetur initio secundi libri,

hactenus arborum cultus, &c.

Dein scribit generaliter de arboribus, tum specialiter de vitibus. Sic toto opere, generalissimum,

num primo ; subalterna, medio ; specialissima, extremo loco ponere studuit.

Eandem *Ovidius*, in *Fastis*, dispositionis huius gratiam sequitur. Proponit initio summam operis :

tempora cum causis Latium digesta per annum, &c.

Mox imploratione facta, partitionem anni statuit. Tum communes differentias interpretatus diei fasti, nefasti, &c. tandem unumquemque mensem suo loco persequitur, & ordinis huius à generalibus ad specialia studium suum præfatione indicat.

*hec mihi dicta semel, totis hærentia fastis,
ne seriem rerum scindere cogar, erunt.*

Oratores in proximo, narratione, confirmatione, peroratione hunc ordinem affectant, eumque artis & naturæ & rei ordinem appellant, & interdum studiosius affectantur.

ut in verrem, Cicero primum proponendo tum partiendo. Questor inquit Cn. Papyrio coisisti ab hinc annos quatuordecim, & ex illa die ad hanc diem quæ fecisti, in iudicium voco, &c. Propositio hæc & definitio summæ rei est, tanquam in hoc iudicio generalissima. Partitio sequitur: hi sunt anni, &c. quare hæc eadem erit quadripartita distributio totius accusationis meæ. Quas partes quatuor earumque partium particulas deinceps suo quamque ordine & loco tractat, & transitionibus copulat ; tres primas tertio libro ; & sic deinceps.

Hæc igitur in variis axiomatis homogeneis suo vel syllogismi judicio notis methodus erit, quoties perspicuè res docenda erit.

At cum delectatione motuæ aliquo majore ab oratore quovis aut poeta, ut quibuscum vulgo potissimum res est, ducendus erit auditor, crypsis methodi serè adhibebitur; homogenea quedam rejicientur, ut definitionum, partitionum, transitionumq; lumina. Quedam assumentur heterogenea, velut digressiones à re, & in re commorationes. Et præcipuè rerum ordo invertetur.

Sed oratoribus & poetis sua methodi ratio relinquenda est; vel saltem iis, qui oratoriam & poeticam docent.

P R A X-



PRAXIS LOGICÆ

Analitica ex Dounamo.

*Ad Cap. Tertium Ra-
miæ Dialecticæ.*

Exemplum primum est: cause procreantis & con-
servantis ex Ovidii primo de Remed.

*Ergo ubi visus eris nostra medicabilis arte,
fac monitis fugias otia prima meis.*

*Hæc, ut ames, faciunt: hæc quæ fecere tuentur;
hæc sunt jucundi causa, cibusque mali.*

*Otia si tollas, periere Cupidinis arcus,
contemptæq; jacent & sine luce faces.*

In singulis, quæ ad efficientis doctrinam illu-
strandam afferuntur, exemplis, tria conside-
randa sunt, efficiens, effectum, efficiendi modus.
In hoc exemplo effectum est amor, efficiens
est otium, quod amorem efficit duplici modo,
tum procreando, tum conservando, ut in secun-
do

do disticho Poeta docet. Dispositio autem hujus exempli (ut pleniorẽ ejus analysin instituam) syllogistica est. Quæstio, quam Poeta concludendam proponit, hæc est; fugiendum esse otium ei, qui ab amore immunis esse velit: eaq; duobus syllogismis concluditur: in priori argumentum tertium ducitur ab effectis quidem otii, amoris verò causa procreante & conservante, hoc modo: amoris procreans & conservans causa vitanda est ei, qui ab amore ipso liber esse velit; otium verò amoris procreans & conservans causa est. Otium igitur fugiendum est ei, qui ab amore liber esse velit. Propositio deest. Assumptio in secundo disticho primò simpliciter proponitur, deinde altera ejus pars de conservante per similitudinem cibi illustratur. Conclusio præcedit in primo disticho. Secunda ratio est confectarium ex assumptione prioris syllogismi deductum. Otium est causa procreans & conservans amoris; ergo sublato otio, amor tollitur. Cujus propositio & fundamentum est Logicum illud axioma; sublata causa, tollitur effectum, quæ propositio si addatur, plenus erit syllogismus.

Exemplum secundum. ibid ex *Aneid.* 4.

*Non tibi dæda parens generis nec Dardanus auctor
perfidæ: sed duris genuit te cautibus horrens
Caucasus. Hyrcanæq; admorunt ubera Tigres.*

Hic effectum est *Aneas*. Causæ efficientes, pater, mater, nutrix, modus autem efficiendi non unus: parentes enim liberos efficiunt procreando, nutrix verò conservando. Disponitur
autem

autem hoc exemplum axiomate discreto. Anchises & Venus non sunt *Æneæ* parentes, ut Didoni placet, sed horrens Caucasus & duræ cautes: Hyrcanæ autem tigres ut nutrices ubera admo-
verunt.

Exemplum tertium est solitariae causæ cap. 4.
ex *Æneid.* 9.

*Me, me: adsum, qui feci, in me convertite ferrum
O Rutuli, mea fraus omnis: nihil iste nec ausus,
nec potuit.-----*

In hoc exemplo effectum est cædes Rutulorum. Efficiens hujus cædis Nysus. Quod autem ad modum attinet efficiendi, effecit, ut ipse de se ait, solus. Dispositio autem hujus exempli syllogistica est. Qui solus auctor est cædis, is solus est occidendus. Ego verò, inquit, solus auctor cædis sum; ergo, &c. Propositio de est: assumptio continetur versu 2. Mea fraus, i. e. culpa omnis, quam probat remotione sociæ causæ, nihil iste nec ausus est, &c. Conclusio versu 1. Me, me scilicet occidite, in me convertite ferrum, &c.

Ejusdem causæ exemplum aliud, in oratione Ciceronis Pro Marcello. Nam bellicas laudes solent quidam extenuare verbis, easq; detrahere ducibus & communicare cum multis, ne propriæ sint imperatorum: & certè in armis militum virtus, locorum opportunitas, sociorum auxilia, classes, commeatus multum juvant: maximam verò partem, quasi suo jure, fortuna sibi vindicat, & quicquid est prosperè gestum, id penè omne ducit suum. At verò hujus gloriæ, Cæsar, quam es
I paulo

paulò antè adeptus, socium habes neminem : totum hoc quantumcunq; est quod certè maximum est, totum, inquam, est tuum. Nihil tibi ex ista laude centurio, nihil præfectus, nihil cohors, nihil turma decerpit : quin etiam illa ipsa rerum humanarum domina fortuna in istius se societatem gloriæ non offert : tibi cedit, tuam esse totam ac propriam fatetur. Hoc exemplum continet plenam comparisonem à minore ad majus, ad amplificandam Cæsaris laudem clementiæ. In primo exemplum est causarum, quæ cum aliis efficiunt. Effectum est victoria ; efficiens imperator, non quidem solus, sed cum aliis, quarum alia principalis est, & imperatori quasi socia fortuna ; aliæ adjuvantes & ministræ, cujusmodi quinq; recensentur, militum fortitudo, locorum opportunitas, sociorum auxilia, classes, commeatus. In apodosi exemplum habemus solitariæ causæ : effectum est clementia in Marcellum, præstita, Cujus causa & quidem sola est ipse Cæsar ; eaq; illustratur remotione causarum adjuvantium. Scopus Ciceronis est, ut ostendat Cæsarem plus laudis ob clementiam mereri, quàm propter res gestas : idq; ostendit ex collatis inter se efficiendi modis, quod nimirum rerum gestarum Cæsar non solus auctor fuerit, clementiæ verò præstitæ solus. Jam verò efficiens plus laudis vel vituperationis meretur, quæ sola quid facit ; quæ verò cum aliis, minus. Sic igitur hæc ratio potest concludi. Cujus Cæsar solus auctor est, id plus meretur laudis, quàm cujus solus non est auctor. Rerum in bello gestarum solus auctor non est ; clementiæ verò in Marcellum præstitæ solus ; proinde clementia Cæsaris plus meretur laudis, quàm res in bello gestæ.

gestæ. Huius syllogismi assumptio tantum in hoc exemplo proponitur; ejusq; prior pars enumeratione causarum adjuvantium, posterior remotione earundem illustratur.

Ibidem exemplum causæ instrumentales primo de Nat. deor. *Quibus oculis animi intueri potuit vester Plato fabricam illam tanti operis, qua construi à Deo atq; edificari mundum facit? Quæ molitio? quæ ferramenta? qui vestes? quæ machine? qui ministri tanti operis fuerunt?* Syllogismus sic sese habet. Qui instrumenta non habuit, is mundum non creavit. Deus instrumenta non habuit; ergo, &c. Huius syllogismi propositio falsissima deest; conclusio præcedit; assumptio sequitur: eaq; per inductionem quandam specierum illustratur. Utraq; autem tum assumptio tum conclusio per interrogationem ἐμφαντικῶς negatur.

PETRI



PETRI RAMI Vita

Ex

JOANNE THOMA FREIGIO,

Recisus digressionibus, descripta.



Etrus Ramus natus est anno millesimo quingentesimo decimo quinto. Ejus avus, ut ipse in præfatione suæ Regiæ Professionis memorat, in *Eburonum* gente, familia imprimis illustri fuit: sed patria à *Carolo*, *Burgundionum* duce, capta & incensa, in *Veromandorum* agrum profugus, ac spoliatus, carbonariam facere coactus est: hinc *Ramo carbonarius* pater probri loco objectus: sed pater Agricola fuit. Puer vix è cunis egressus, ut ipse in *Scheckiano* epilogo de se narrat, duplici peste laboravit. Juvenis invita modisq; omnibus repugnante fortuna, *Lutetiam* ad capeffendas artes ingenuas venit. Erat statura corporis grandi ac generosa, vultu mitissimo, moribus integerrimis, valetudine

dine firma ac rebus, quam perpetua abstinentia continentiaq; & continuo labore etiam firmiorem reddidit. *Lutitiae* Magisterii titulum suscepturus, problema hoc sumpsit; *quaecunque ab Aristotele dicta essent, commentitia esse.* Attoniti novitate atq; insolentia problematis examinatores ac magistri, per diem integrum, sed irrito conatu, Magistrandum, ut vocant, opugnarunt. Ex hoc fortuito successu, ansam deinceps, serio & libere in *Aristotelem* animadvertendi & inquirendi arripuit. Logicamq; imprimis, utpote instrumentum reliquarum artium expolire instituit (ut ipse pluribus persequitur in *epilogo l. 5. Scholarum Dialecticarum*) sed annum agens ætatis primum & vigesimum hæc moliri incœperat. Septimo post, primam, ut putatur, *Dialecticam & Aristotelicas Animadversiones ad Academiam Parisiensem* edidit: sequente anno *Euclidem*, Latine, quam & præfatione commendavit. Ex eo tempore multas adversarios contraxe irritavit, & præsertim duos homines, quos *Taleus* in Academia sua dum contentionem totam enarrat, non nominat tamen. Vix, inquit, *Aristotelicæ Animadversiones* lectæ erant, cum *P. Ramus* repente ad prætorii tribunalis capitalem contentionem per certos homines falso Academia nomine rapitur, noviq; criminis accusatur, quod scilicet, *Aristotelem* oppugnando, artes enervaret: hac enim oratione *Aristotelicæ* actio instituta est. Hinc *Aristoteleorum* clamoribus agitur, ad summum *Parisiensis* curiæ consilium traducitur. Id cum ex adversariorum sententia non procederet, novis artibus à senatu *Parisiensi* ad regiam cognitionem res deferretur: constituuntur iudices quinq; bini ab utraq; parte,

Quintus à rege nominatur; causam de singulis animadversionum capitibus dicere jubetur *Ramus*: qui tametsi de quinque; iudicibus tres infensissimos habebat, tamen ut mandato regio obtemperaret, ad diem constitutam adfuit; scriba unus aderat, qui rationes *Rami* & iudicum sententias exciperet. Biduo magna contentione de Dialecticæ artis definitione & partitione, quæ in Logici Organi libris nullæ essent, concertatum est. Tres *Aristotelei* iudices primo die, contra omnes bene descriptæ artis leges, iudicarunt ad Dialecticæ artis perfectionem definitione nihil opus esse. Qui duo iudices à *Ramo* lecti erant, contrà censuerunt. Postridie tres iudices *Aristotelei* vehementer conturbati, de Partitione assentiuntur, causamq; in aliam diem rejiciunt. Verùm ne non damnaretur *Ramus*, novum consilium initur, Ut ab initio tota disputatio retexatur, iudicata pridie, pro nihilo habeatur. Ab ista iudicum inconstantia provocat *Ramus*; sed frustra; iudicium n. sine provocatione tribus illis iudicibus datur; condemnantur triumvirali illa sententia non solum Animadversiones *Aristotelice*, sed Institutiones etiam Dialecticæ: auctori interdicitur, ne in posterum vel docendo vel scribendo, ullam Philosophiæ partem attingeret: ludi etiam magno apparatu celebrantur, in quibus *Ramus* & *Ramea* Dialectica ludibrio habetur. Ab his difficultatibus unus omnium *Carolus Lotharingus Ramum* liberavit: *Henrico* enim regi persuaserat, Philosophiam semper liberam esse oportere. Hinc *Ramus* pristinæ docendi ac scribendi libertati restitutus, per annos quatuor summa in pace studiis operam dedit. Anno ætatis trigesimo primo Orationem de studiis Philosophiæ

phiæ & Eloquentiæ conjungendis habuit : cum *Taleo* fratre (sic eum perpetuo vocat) professionis partes ita divisit, ut *Taleus* matutinis horis philosophiam, ipse pomeridianis Eloquentiam doceret : in poetis, oratoribus, philosophis omnisq; generis authoribus explicandis, Usum dialecticæ demonstravit : id *Ramo* postea crimini datum est, quòd in philosophico studio non Philosophos, sed, contra leges Academiæ, pro philosophis Poetas explicaret : purgat se *Ramus*; petitq; ut gymnasium suum *Præleum* per probos & doctos homines invisatur. Sed judex quidam, nobilis adolescens, datus, discipulos *Rami* indicta causa, condemnat; publicis & scholis & sigillis & talibus prohibet; omnibus deniq; Academiæ muneribus & præmiis excludit. Ab hac sententia tam nova discipuli *Rami* ad *Julianense* philosophorum comitium provocant, & absolvuntur, modò præceptor eorum jurejurando confirmet, libros, Academiæ legibus definitos, à se esse prælectos. Confirmat *Ramus*: paulò tamen post ab eodem judice adolescente, non discipuli, ut antea, sed magistri eorum oppugnantur : *Ramo* injungitur, ut in publicis scholis disciplinam suam ipse detestaretur & ejuraret. Is ad superiores Academiæ ordines secundò provocat : sed cùm vitandi tumultus causa, scripto se absens, defenderet, adolescens ille judex, etsi duabus appellationibus rejectus, tertio judicat ac damnat. Quarto provocat *Ramus* : cùm provocationis diem accusator antevertisset, coactus est *Ramus* subito in senatum venire : hic iterum *Carolus Lotharingus* unico præsidio fuit : accusationem cujusdam audiit gravissimam *Ramum* Academicum nominantis,

tis, qui de humanis divinisq; legibus dubitaret, qui lubricos *D. Augustini* locos ad effrēnatam atq; impiam libertatem suis auditoribus proponeret, & quo facilius incautis animis abuteretur, omnes Logicas disputationes tolleret. Contra has calumnias facile se defendit *Ramus*. Decretum est itaq; in senatu, uti *Ramus* discipulūq; ejus in pristinum atq; integrum statum restituerentur. Ipse anno ætatis trigésimo sexto cūm *Blessiis Carolus Lotharingus* ad *Henricum* regem de disciplina *Ramea* retulisset, in numerum atq; ordinem Regiorum Professorum per literas regias honorificē ad se scriptas, est cooptatus. Gratias itaque & regi *Henrico* & *Carolo Lotharingo* publicē egit; sibiq; persuasit, se à rege in præstantissima reip. parte esse collocatum; sibiq; adeo dies ac noctes esse summo studio enitendum, ne tanto muneri ac professioni eloquentiæ simul & philosophiæ deesset: unde animos adolescentium tanta audiendi & proficiendi cupiditate inflammavit, ut schola regia, licet ad audiendum amplissima, plerumq; tamen auditorum concursum frequentiamq; capere minime potuerit. Adversariorum petulantiam summa constantia tulit atque pervieit; symbolūq; ejus hoc fuit, *labor omnia vincit*. Anno 1552 cūm in *Cameracensi* schola frequentissimis auditoribus Dialecticam suam auspicaretur, inter strepitus, clamores, sibilos nihil commotus, per intervalla clamorum, incredibili constantia perexit & peroravit: qua ejus virtute consternati inimici, in posterum minus ei molestiæ exhibuerunt. In *Heidelbergensi* etiam Academia, principis autoritate ad profitendum adductus, consimiles æmulorum clamores invicto animo pertulit. Adversus doctos aliquot homi-

nes.

nes Goveanum, Gallandium, Perionium, Turnebum, Melancthonem, pari silentio est usus. Viginti annis abstemius fuit, donec sanitatis causa medici vino uti suaserunt: vini enim fastidium ceperat ex quo infans in cellam vinariam clam parentibus irrepens, se tam immodicè ingurgitavit, ut mortuo similis humi reperiretur. Pro lectulo stramentis ad senectutem usq; usus est. Coelebs tota vita permanfit. *Prelei* gymnasii labore (qui ipsi sine ullo publico stipendio erat mandatus) contentus fuit. A discipulis suis oblata munera, quamvis debita, tamen non accepit. Anno. 1556. *Ciceronianum* edidit de Optima juventutis instituendæ ratione. Pronuntiationem Latinæ linguæ in Academia *Parisiensi* tunc temporis inquinatissimam, corrigendi author cum primis fuit, reclamantibus licet *Sorbonistis*, pravarum omnium consuetudinum propugnatoribus tam obstinatis, ut sacerdotem quendam novatæ pronuntiationis coram senatu *Parisiensi* infimulatum, quasi ob hæresin, ut aiebant, Grammaticam, amplissimis proventibus ecclesiasticis privandum contenderent: & lite quidem superiores videbantur discessuri, nisi *P. Ramus* cæteri q; professores regii ad curiam convolantes, iudicii tam alieni insolentiam dissuasissent. Verùm illius temporis tam crassa ignorantia fuit, ut libris editis proditum sit, in ea Academia doctores extitisse, qui mordicus defenderent, *ego amat* tam commodam syntaxin esse, quàm *ego amo*; ad eamq; pertinaciam comprimendam, autoritate publica opus fuisse. In Mathematicis quid effecerit *Ramus*, Scholæ Mathematicæ aliâq; ejus opera testantur. Ea meditantem, belli civilis calamitas interpellavit;

vit ; acceptis igitur à rege literis , ad regiam *Fontisbelaeui* bibliothecam profectus , Mathematicas prælectiones ab initio plenius & uberius retractavit . Tum in *Italiam* cogitabat , quo ipsum *Bononia* honorificè invitarat ; vel saltem in *Germaniam* : sed viis omnibus terror mortis intentatus , rumor etiam *Prælei* sui indignis modis direpti ac bibliothecæ spoliatae , ad regiam *Vincennarum* proprius urbem revocarunt . Sed & alia vis etiam gravius urgebat , ut é *Vincennis* per invia itinera profugiendum esset , & subinde variis in locis delitescendum : in fuga tamen & latebris otium hospitesque sui cupidissimos reperit ; in eoque otio Scholas Physicas conscripsit , vel potius inchoavit . Erumpente rursus bello civili , in Optimatum castra profugit : eo tumultu post sex menses sedato , reversus , nihil in bibliotheca præter inania reperit scrinia ; mathematicas tantum commentationes *Resnerus* (qui *Parisis* permanfit) direptoribus commodum eripuit . Impendente jam tertium civili bello , impetravit à rege *Carolo* ad invisendas exterarum Academiæ annuam dimissionem , quasi legationem liberam . In extremis regni finibus , vix militum quorundum manus , nisi prolato in medium diplomate regio , effugisset . Ter dimissus , ter repetitus , tandem velocitate summa eo pervenit , ubi sicariis licentia nequaquam parerat . Adventus ejus in *Germaniam* bonorum ac doctorum omnium singulari humanitate & gratulatione exceptus est . *Argentorati Joannes Sturm* , ejus Academiæ author simul & rector , peramanter eum accepit deinde Academia tota adjunctis etiam quibusdam ad ampliorem gratulationem comitibus & baronibus , liberalissimè tracta-

tractavit: quo die, deniq;, nobilissimæ nuptiæ in eo loco celebrabantur, in prytaneum summus urbis magistratus, publicæ gratulationis gratia cum *Sturmio* eum adduxit. *Bernam* præteriens, tantum vidit, nec tamen sine Consulibus *Stegeri* honorifica liberalitate, atq; *Halleri*, *Aretii* aliorumq; doctissimorum hominum amica gratulatione discessit. *Tiguri*, *Henricus Bullingerus* simulatq; in urbem ingressus est *Ramus*, gratulator primus affuit, coenamq; ei apparavit, eruditissimis convivarum, *Josie Simleri*, *Rodolphi Gualteri*, *Lodovici Lavalteri* sermonibus longè gratissimam. Postridie cum ab eodem *Bullingero* in aulam publicam deduceretur, miratus quid sibi vellet in eum locum frequentissimus civium cujusq; ordinis conventus, quæsit ex eo, ecquæ illic etiam, ut *Argentinae*, nobiles nuptiæ celebrarentur. Cui *Bullingerus*, Tibi, inquit, nostra civitas nuptias istas celebrat. Præbuit ei *Heidelberga* amicum *Urfinum*, *Olevianum*, hospitem etiam *Immanuelem Tremellium*, fautorem deniq;, ipsum *Electorem Palatinum*, qui discedentem *Ramum*, aurea imagine sua donavit. Inde *Francofurtum* pergens, à primariis aliquot civibus honorificè est acceptus: deinde *Noribergam* ad præstantissimos opifices & mechanicos aliosq; viros doctos & præsertim *Joachimum Camerarium* profectus, est: hic jurisconsultorum collegio mandatum à senatu est, ut *P. Ramo* convivium publico urbis nomine instruerent. Inde *Augustam* perexit ubi urbis consul primarius eum liberalissimè tractavit, adhibitis in convivium eruditis variæ doctrinæ convivis, sed imprimis *Hieronymo Wolfio*, & *Tichone Bracheo*, cum quo post prandium in suburbanum consulis deductus, varios sermones

mones de studiis mathematicis habuit. Rumore tandem restitutæ pacis revocatus, *Lausannam* contendit: hic à viris doctis exoratus, *Logicam* ἀρχαίῳ dies aliquot maximo concursu exhibuit. *Geneva* cum doctissimis hominibus tum de cæteris liberalibus studiis, tum de *Logicis* collocutio illi assidua fuit, maximè cum *Francisco de Cretensi* & *Andrea Melvino, Scoto*. Cum aliis multis eruditissimis viris, in *Italia* *Commandino* & *Papio*, in *Anglia* *Dio* & *Acontio*, in *Germania* *Chytræo*, aliisq; permultis amicitiam per literas jaxantè coluerat. Nobiles & inclytæ civitates cum magnis & honorificis muneribus, & sexcentorum coronatorum oblato stipendio appetiverunt. *Joannes* electus rex *Pannoni* amplissimo stipendio *Albe Juliae* regendam *Academiam* illi obtulit. *Cracoviam* liberalissimè, immo in *Italiam* mille ducatorum stipendio *Banonian* invitatus, patriam tamen deferere noluit: itaq; *Carolus ix.* petitum undiq; calumniis domi, invidorùmq; moribus, non solum præsentī ope sublevavit, sed honore auxit & amplificavit, eiq; vacationem à laboribus concessit. Tandem, anno 1572 in illa *Parisiensi Christianorum* ac civium internectione, indignissime periit. Necis causam sunt qui in æmulos ejus conferant: pleriq; eandem quæ cæteris ea nocte trucidatis fuisse existimant. Legatum annum *Mathematico Professore* in *Parisiensi Academia* luculentum testamento reliquit.

FINIS.

